

Jiisas Nge Ek Ka Luk Pułum

Luk Ek Ei Połpu Tiopilas Ngum

¹ Nim wu owundu Tiopilas. Ok Gos sin kin oł kombur eririm oł ei, pe keimi sin kin pe punum en enim pei angil ęle mon pulnjung.

² Kumb ok, wumb kombur gupu ęle piik kanik erik Gos nge ek ka kongun ęłmin ku. Ek ei nge sin sinjpin, ek mon pulnjung wumb pei ei oł ei nge pulnjung.

³ Pe akip na yi ku, ek poł ei połup nim ngond. Ek ombu nge kii sip kom sep piip muls kunum kinan, na oł ei ekii sinj. Sip, ei piip kin puls ek ei oł pulk mił kun połup ngond.

⁴ Ek ei ek keimi, enim ok gerik piik. Yi mił erik ei enim pii kun erik mułngii. Pe ek ei yi ku połup ngond.

⁵ Eros eim Jura wumb king multum kunum ei, wu endi Gos kin kułmał kałiim wu endi multum wu ei embe Sekaraiya. Eim kułmał kałiimin wumb ei Apaisa nge tiłap ęle tep to ęłmin. Nga wu ei eim ambił Eron nge tiłap ęle amb ei, Elisembes pa niłmin.

⁶ Pe wu amb yi tał ęł elip, Gos ningil ęle oł ka er mulnjunguł. Pe Gos Owundu nge ek dinga kanim kanim ni pendim, pei ekii sikił kun ka mulnjunguł. Oł kis endi enerkił.

⁷ Ba wu amb yi tał kangil endi mingnenjngil mon! ęł elip wii mendpił mulnjunguł. Wu amb tukui mendpił mulnjunguł.

⁸ Sekaraiya eim Gos kin kułmał kałiim kongun ei ełim kunum ei, Sekaraiya nge tilap wumb ei kongun ełe tonu onjung.

⁹ Kułmał kałiimin wumb ełmin oł ei erik, Gos andan tang wu ei embe pe nik wang to tonu kindnjing. Kindangin kin, eim Gos ngii owundu palting ka ełe mołpu kin, epi muru ka tołum epi ei sipi kin, dup eskił erpi kin, muru ku piilmin.

¹⁰ Kunum ełe Gos kin dup eskił muru ka kałpi ełim kunum ei, wumb pei ok, andaring molk prei erik mulnjung.

¹¹ Pe Sekaraiya eim kenim ni, dup kałim konu angil tundung ełe Owundu nge enjel angpi mułum ei kenim.

¹² Pe eim enjel kanpi eim puku sipi, mund mong tang piim.

¹³ Ba enjel ek nipi Sekaraiya ngopu yi nim, “Sekaraiya, nim mund mong tunerii mon! Gos nim prei en ek ei piim. Nim ambnim Elisembes eim wu kangil endi mengmba. Kangil ei, nim eim embe Jon ninjii,” pa nim.

¹⁴ “Mengang kin, nim noman ka peng, nim ka piinjii. Kangi ei tonu omba ei wumb pei ka piingii ku.

¹⁵ Yi mił kangi ei wu owundu mułang, Gos Owundu eim kangi ei wu num mułmba ni piim. Pe eim noł wain ni noł dinga ombu nunermba. Eim mam kirim ełe multum kunum ei Gos Gui Ka eim kin piki to mułmba,” pa nim.

¹⁶ “Jon eim ek neng kin Esrel wumb pei noman ak tok pii gii nik, Gos Owundu kin orung punggii nge nipi wumb ngumba.

¹⁷ Gos Jon kindang opu, owundu nge ek ei

ni pendim. (Jon eim owundu omba e le kumb se omba). Ek ni pendpi opu eim noman dinga piimba ei ok Elainja ek ni tor kindilim wu pirim mił yi eim yi ermba. Erpi kin, arim kingam noman to ak tungii nge nipi, wumb Gos ek to kindilmin wumb ei neng noman kun ka seng, wumb kun ka molk Owundu omba nge kui er mułngii nipi kongun yi ermba,” pa nim.

¹⁸ Sekaraiya ek nipi Gos nge enjel ngopu yi nim, “Na tukui er poru ninj. Na nam amb tukui erim ku. Nimbil erang na ek ei keimi ni piimbii?” pa nim.

¹⁹ Pe Gos nge enjel ek yi nim, “Na Gepriyel, na Gos kumb e le kun mołup enj. Gos Eim na kindang, na op nim nimbii nge onj. Pe ek poł ka ei nim kanip nind,” pa nim.

²⁰ “Kapli nim piinjii. Nim na ek ei piikin noman e le kindnen kin, nim anmbil ak tang kin, ek tingnenjii, yi pepi pang, o ombu opu poru nimba. Na nind ek ei keimi ekii se tonu omba.”

²¹ Wumb pei Sekaraiya anda omba ni piik kui er muljung. Epi nipe endi eim kin erang mołum ni piinjing; tuk konu Gos ngii owundu e le ka mołum?

²² Ekii se eim anda opu, eim wumb kanpi ek nimba pinerim. Yi erang kin wumb en enim piik, Gos ngii owundu palting ka tuk e le epi nipe endi kenim ni piinjing. Pe eim ek tingnarpi, angil e le minj erpi ek mił tangpi erang kenjing.

²³ Ekii se Sekaraiya eim Gos ngii owundu tuk kongun poru neng eim si kind ngii konu e le pum.

²⁴⁻²⁵ Ekii se eim ambim Elisembes kangil mundii mołum. Pe amb ei eim koi er mułang

oi angil orung o pang kin eim ek yi nim. “Pe Gos Owundu na kin noman ka ngum. Ok na kangil mulerim kunum ele, na wumb kin ngenj singambil peng muls. Ba pe nga na singambil pinerbii,” nim.

Enjel Mariya Kin Jiisas Tonu Omba Ek Nim

²⁶ Pe oi angil orung nga endeim o pang, Elisembes wu kangi endi mengmba ei Gos enjel Gepriyel kindang pupu Galilii mei owundu konu ele orung endi sim konu ei Naseres ele pui ni kindim.

²⁷ Gos enjel kindang pupu kin, ambil endi mulum konu ele pum ambil ei, wu endi simba nik kuimi to mundnjung. Wu ei embe Josep, wu ei King Deipis nge tilap. Pe ambil ei embe Mariya.

²⁸ Pe enjel er pupu ambil kanpi ek yi nim, “Nim molun ei? Gos Owundu nim kin eim noman ka ngopu nim kin molum,” pa nim.

²⁹ Ba eim nim ek ei piipi, eim noman embin tang piim. Eim noman ele yi piipi, ei nipe ek ninim ni piim.

³⁰ Enjel ei ek yi nim, “Mariya, nim mund mong tunerii mon! Gos nim kin noman ka ngopu molum.

³¹ Nim piin min? Nim kangil mundnjii; nga kangil endi mengnjii. Kangi ei embe Jiisas ninjii,” pa nim.

³² “Eim wu owundu mulmba. Pe wumb eim kanik yi ningii, ‘Gos Owundu kingam mendpil,’ ningii. Nga Gos eim King mundang eim kupam King Deipis molulum konu ele eim simba,” pa nim.

³³ “Eim kunum kunum Jeikop nge wumb tilap ele eim King mulmba. Pe eim tep erpi mulmba konu kunum ei poru ninermba!”

³⁴ Mariya enjel kin ek yi nim, “Oł ei erpi tonu omba mił nenj? Na ambił wii moł, wu endi molalim molalim.”

³⁵ Nga enjel ek ni orung kindpi yi nim, “Gos Gui Ka kapli nim nge noman tuk ele omba nim, Gos Owundu mendpił eim dinga kapli nim kin omba. Yi erang nim kapli kangii ei ekii se mengnjii, wumb eim embe sik yi ningii. Ei King ka wii Gos Owundu nge kingam yi ningii.

³⁶ Nim piin min? Bipanin Elisembes amb tukui sim, ba kangii endi kirim ele mołum. Okrii wumb yi niłmin, kangil endi mingnermba niłmin. Ba pe eim kangii mundii mułang, oi angil orung nga endeim o pang mołum. Pe Gos nim kin yi ku enim.

³⁷ Epi endi Gos kapli enermba mił mon? Epi pei ei eim kapli ermba.”

³⁸ Mariya ek yi nim, “Piin! Nam Owundu kongun ambił eim na kin nimbil oł ermba ni piimba ei kapli nim nin ei mił ermba.” Nga Gos nge enjel eim si kindpi pum.

Mariya Elisembes Kenmbii Ni Pum

³⁹ Kunum ei, Mariya eim sikir pupu mei komung ele tonu pum. Jura mei owundu endi sim konu ele pum.

⁴⁰ Sekaraiya ngii ele nirik pupu Elisembes kanpi, “Muliyo!” nipi yi nim.

⁴¹ Elisembes Mariya kanpi, “Muliyo,” nipi erim ek ei piipi eim kangil mundii mułum ei puku sipi piim ni Gos Gui Ka eim kin piki to mułum.

⁴² Pe Elisembes eim wii dinga tum. Topu yi nim, “Gos noman ka nim ngum, ba amb eipi kombur noman ka yi ngonanim mon! Pe kangii mundii mołun ei Gos noman ka kangii ngonum.

⁴³ Na nii epi owundu ei na kin tonu onum? Nim Owundu mam ei na kin on; na kapli enanim.

⁴⁴ Piini! Nim na mułiyo nin, ei piind, na kangii kirim ełe mołum, ei eim noman ka piipi tonu mani erang puku sim. Puku sipi, na piind nam Owundu mam moł ni piind.

⁴⁵ Owundu ek ei nim neng kin nim pii gii nin. Yi eran Gos nim kin noman ka ngonum. Ek ei ekii se yi mił ermba,” Elisembes yi nim.

Mariya Nge Golang

⁴⁶ Pe Mariya ek yi nirim,

“Nam noman ełe Gos Owundu embe ambii tonu kindind.

⁴⁷ Gos Owundu na kin paki tonum nam nge noman tuk ełe ka piind.

⁴⁸ Na eim kongun wii ambii moł ba eim na noman ngonum. Pe ekii se wu amb pei Gos nge eim na kin noman ka ngołum pa ningii.

⁴⁹ Gos Owundu nge dinga wii eim oł Owundu na kin ei nim. Gos eim embe ka wii sim.

⁵⁰ Wumb nii endi Gos Owundu mendpii mołum ba sinim mei wumb minj mołmun ni piinjing. Wumb ei Gos eim wumb ombu nge kingam noł ni mering kingenjing noł pei Gos eim kaimb kułum.

⁵¹ Gos kongun dinga wii erim; wumb en enim wumb Owundu mołum ni piinjing wumb ei en enim noman ełe ełmin. Wumb ei Gos to kindang eipi eipi pułmun.

⁵² Wumb King dinga mołmun Gos wumb ei to mani kindilim. Kindpi, wumb wii mołmun wumb ei Gos wumb num tonu kindilim.

⁵³ Wumb kuni tang mołmun wumb ei eim nge epi kanim kanim ka wii ngołum. Wumb epi pei salilim wumb ei Gos kindang wii punjung.

⁵⁴ Eim Esrel kongun wumb eim paki tang, sinim kupenjpin noł ek keimi dinga nilim. Wumb ei eim ok kaimb sipi eririm. Yi mił ku sinim kin kaimb sinim.

⁵⁵ Yi peng piipi kin, eim ek nipi sinim wumb kupenjpin noł ei ngum, Eiparam nge wumb ekii se tonu ongii kaimb sipi ngum. Nga kunum kinan molk pungii,”

Mariya pa nim.

⁵⁶ Mariya Elisembes kin mułangil oi tekliki mił o pang, nga ekii se eim ngii konu ełe orung pum.

Jon Wumb Noł Pendilim Wu Mengilmin Kunum Tonu Onum

⁵⁷ Elisembes kangi mengmba kunum mandi erang, eim wu kangi endi mengrim.

⁵⁸ Wumb Elisembes nge opam noł wumb kin mandi mołmun wumb kin, molk piinjing ni ek om piinjing ei Owundu kin kaimb topu ngum. Nga wumb en enim eim kin ka piinjing.

⁵⁹ Kunum angil orung nga tekliki o pang, wumb kangi ei tu wuk ngenj kopisngii nge tu wunjung. Pe kangi ei embe Sekaraiya nimin ninjing ei eim arim embe mił.

⁶⁰ Ba kangi mam eim yi nim, “Mon! Sinim kangi ei embe Jon nimin!”

⁶¹ Pe ek yi ninjing, “Nim bipanim embe endi yi pinałim.”

⁶² Wumb eġe ek miġ enjing kangi eim arim yi miġ kii sinjing. Arim kangi embe nipe embe simba erim.

⁶³ Eim ku pirambi ei sipi mon endi poġpu embe Jon ni puġum. Nga wumb en enim kanik puku sik kin piinjing.

⁶⁴ Pe mendpiġ Sekaraiya gupu aki tang kin eim anmbiġ kapli erim. Eim ek nipi Gos embe ambiġ tonu kindpi muġum.

⁶⁵ Pe eim nge wumb konu mandi mulnjung wumb, mund mong tunjung. Oġ ombu nge ek ombu orung orung konu Jura mei owundu ni konu komung ei ombu pang piinjing.

⁶⁶ Wumb ek ei piik en enim noman to piik, nga en enim yi ninjing. “Ekii se kangi ek er muġmba miġ nenj?” Wumb yi piinjing, “Gos Owundu eim kin moġum,” ni piinjing.

Sekaraiya Oġ Ekii Se Tonu Omba Nge Nirim

⁶⁷ Gos Gui Ka arim Sekaraiya kin piki to moġpu eim paki tang yi nim. Pe eim Gos oġ ekii se ermba oġ piipi ek dinga nim.

⁶⁸ “Sinim Gos embe ambiġ tonu kindmin. Eim Esrel nge Gos eim opu sinim orung simba nge onum.

⁶⁹ Eim nge kongun wumb tiġap ei King Deipis, Gos eim Owundu dinga wii endi mundang sinim sipi orung simba nge onum.

⁷⁰ Yi erang Gos eim ek keimi niġmin wumb ei gupu eġe ni tor kindim.

⁷¹ Eim ek yi nim, sinim opu wumb dinga eġe sipi orung simba enim. Pe sinim kin noman kis piik wumb er muġngii konu eġe sinim wumb ei dinga eġe sipi orung simba.

⁷² Sipi pang, eim sinim kupenjpin nol kaimb se ngopu paki tolum. Pe eim kumb ok ek dinga nipi pendpi ol ka elim ol ei piipi kin, yi mił erim.

⁷³ Ei keimi minj nipi sinim kupenjpin Eiparam multum konu ek keimi nipi ngurum.

⁷⁴ Eim sinim opu orung wumb eim nge dinga sipi orung simba. Eim ek dinga sinim ngum ei sinim eim kongun er mulmun. Sinim mund mong tunermin.

⁷⁵ Kunum kunum sinim molpun, eim kongun ka erpin, kunum kunum ka minj molpun, ol kun ka er molpun, eim kumb ele mendpil erpin mulmun,” wumb kin ek yi nim.

⁷⁶ Nga ek yi nim, “Pe nim na kangi, ekii se nim Gos Owundu mendpil nge ek ni tor kindim wu endi mulnjii yi ningii. Pe nim kumb se pukun, Owundu nge kongun er kun er mulnjii.

⁷⁷ Nim sinim eim nge wumb ek nikin wumb ngan, wumb en enim ol kis kil ngangin kin wumb ei Owundu sipi orung simba nge omba.

⁷⁸ Sinim Gos nge kaimb owundu sipi, sinim kin kindpi yi er ngumba. Eim epin konu tonu mendpil tilang ka wii ermba. Yi ermba ei nge Gos sinim wumb sipi orung simba nge omba.

⁷⁹ Tilang ei opu wumb kin emii tuk molmun, ni wumb mandi koltmun ni piik tungu enjing. Wumb ei tilang ngumba sinim endmin nge andlam ei er ka erang sinim noman emin peng endmin.”

⁸⁰ Ekii se kangi ei tonu opu dinga erpi eim noman tuk ele dinga pim. Peng kin, eim wumb mulerngii konu molpu Gos kongun ermba nge opu Esrel

wumb mułngii konu ełe tor omba.

2

Ambil Wenip Mariya Kangi Jiisas Mengim (Masyu 1:18-25)

¹ Kunum ei, Rom wu owundu King mułum wu ei embe Akasas eim ek lo endi yi nipi pendrim. Wumb pei en enim konu ełe mendpił ełe puk kin, en enim embe pułngii nirim.

² Kunum ei kumna kin wumb embe połmun kunum ełe Sairiiniyas ei wu owundu Siriya mei owundu ełe tep er mułum kunum ei.

³ Yi erang kin, wumb en enim konu ełe punjung. Puk kin, en enim embe pułngii. Polk poru neng kin, en enim konu ełe orung punjung.

⁴ Josep eim King Deipis nge wumb tiłap ende. Pe Josep eim Naseres konu ełe Galilii mei owundu si kindpi, pupu Jura mei owundu Deipis nge konu ełe purum konu ei embe Beslem konu niłmin.

⁵ Eim ambim Mariya kin tep to pukuł, eł elip embe ni wumb ngunguł nge pukuł. Punjnguł kunum ei Mariya kangil mengmba mił mandi erang pukuł.

⁶ Wumb tał konu ełe mułangil ei Mariya kangil mengmba kunum mandi erim.

⁷ Pe eim kingam kumna kung kou ngii ełe mengrim. Nimbił erang wumb pałmin ngii pei piki tum. Pe alap endi sipi pandi topu pindang mer kung kou kuni nołmun konu ełe pindang pim.

*Kung Siipsiip Es Tołmun Wumb Kung Siipsiip
Tep Er Mulnjung*

8 Kunum ei, wu kombur kung siipsiip es tołmun wumb Juriya mei konu ele andaring mulk. Wumb en enim kung siipsiip tep erik mulnjung.

9 Pe Owundu nge enjel kindang om. Opu, Owundu nge dinga tilang opu en enim mulnjung konu ele erang wumb ombu en enim mund mong enjing.

10 Ba Owundu nge enjel ek nipi wumb ngum, “Enim mund mong tunerngii! Piik, mułei! Na enim kin ek ka endi tu wund. Enim wu amb konu orung orung pei piik noman ka piingii nge ek tu wund,” pa nim.

11 “Kunum ele King Deipis nge konu owundu ele amb endi kangil kembis mengnim. Kangi kembis ei enim sipi orung simba wu ei Kraiss, ei wu Owundu Gos kindang om.

12 Pe na ek endi nemb enim yi mił piik kin, puk keningii. Enim keningii ei kangi kembis endi alap kin tuk kindik mer kung kou kuni nołmun konu ele palim ei keningii. Kanik kin, enim piingii ni na ek eim kin nind ei keimi pimba.”

13 Owundu nge enjel ei ek yi neng kin; pe sikir enjel pei mani ok eim kin mulnjung. Noman ka piik golang nik Gos ngunjung.

14 “Gos embe ambilk tonu kindngii. Mani mei wumb noman emin pengli! Gos eim enim noman ka ngonum.”

15 Pe enjel pei epin konu orung punjung. Pe kung siipsiip es tołmun wumb ei en enim ek dinga ninjing. “Sinim pamin! Beslem konu sikir pupun, Owundu ek yi mił nim epi tonu onum ei kinamin,” nik punjung.

16 Pe wumb sikir puk, Josep kin Mariya tel muljungul kenjing. Kangi kembis ei mer kung kou kuni nolmun konu ele pim kenjing.

17 Pe kan poru nik, orung puk kangil kembis ei nge ek piinjing mil nik tor kindnjing.

18 Pe wumb pei molk piinjing ni, kung siipsiip es tolmun wumb ninjing ek ei piik kin, kom sek piinjing.

19 Ba Mariya eim ek ei piipi noman ele kindpi, kom se piipi minj mulum.

20 Kung siipsiip es tolmun wumb orung puk Gos embe ambilk tonu kindik punjung. Wumb en enim ka piik, Gos ek piik kanik enjing. Ei Gos enjel ek nipi erim mil kenjing ku.

21 Ekii se kunum angil orung nga tekliki o pang, kangil kembis ngenj kopisnjing. Kopsik, kangil ei embe Jiisas ninjing mil eim mam mingnerim kunum ei Owundu enjel kindang opu nim. Ei kangil embe yi nengin nim mil ninjing.

Simion Kin Ana Tel Jiisas Men Ngii Owundu Kenjingil

22 Kunum poru neng, Mariya kin kingam kin ka mulngul ol enjing ei, Moses lo ek nilim mil enjing. Pe arim mam tel kangil ei Jerusalem konu ele sipkil Gos Owundu kin ngungul nge sipinjngil.

23 Ei yi mil, Gos Owundu lo ek yi er pendilim mil nilmin. "Kangil wu kumna mengilmin kangil ei Gos Owundu kongun ermba nilmin ol ei nge enjingil."

24 Wumb tal el elip Gos kin kulmal kelngil ei Moses lo ek nilim mil yi mil enjingil. Ei Owundu lo ek palim mil ermbil ni piinjngil. Kei Pulmu mil tal

min kei wał eipi tał sikił Gos kin kułmał kełmbił ni sipinjgił.

²⁵ Kapli, wu endi Jerusalem konu ełe mułum wu ei embe Simion. Ei wu kun minj mołum wu ek piipi elim wu, ei eim wumb Esrel wumb sipi orung simba nge wu endi omba, ni kui er mułum. Gos nge Gui Ka ei Simion kin mułum.

²⁶ Gos nge Gui Ka ei eim yi nirim, “Simion sikir kulenjii mon!” pa nirim. “Nim Owundu nge kindang wu Krai kumb se kenjii,” pa nim.

²⁷ Gos nge Gui Ka je erang Simion pupu men ngii owundu ełe nirik pum. Pe kingam arim mam tał sikił tu wukuł lo ek ninim mił ermbił ei Gos Owundu kin ngunguł nge onjnguł.

²⁸ Simion eim kangi ei sipi sipim. Si pang kin, Gos embe ambił tonu kindpi, yi nim.

²⁹⁻³⁰ “Pe Owundu pe ni ninim kongun wu ei er ka eran noman emin sepi piyangli nim. Nam ningił ełe nim sin sikił orung sinjii nge on ei kanip ka piip moł.

³¹ Nim ek ok nirim, ‘Simion, sikir kulenjii mon! Nim Owundu nge kindang wu Krai kumb se kenjii,’ pa nim. Wu amb pei keningii nge en. Wu ei kindang sinim sipi orung simba nge om yi nirim mił en.

³² Gos eim tiłang mani kindim. Kindpi, tiłang ei erang wumb tiłap eipi nim oł ei nge ekii sik noman tok piik erngii. Nga nim nge enjel wumb embe owundu erim,” Simion Jiisas nge ek pei nirim.

³³ Kangi mam arim tał Simion nim ek ei piikił puku sikił piinjgił.

³⁴ Pe Simion Gos ek ka nipi en enim ngum. Nga ek yi mił nipi Mariya ngum, “Piini! Gos eim noman ełe kangi ei yi erang Esrel wumb pei bok tonmun, ba wumb kombur nga angk gii nik dinga mołmun. Eim Gos nge noman ełe tuk mundum mułmba. Mułang kin, wumb pei eim kin ek kis nik ngok erngii.

³⁵ Erangin kin, nim noman tuk ełe tui mił tang yi mił kaimb erang piinjii. Eim wumb en enim noman tuk ełe andan tang kin noman tuk ei to tor kindmba,” pa nim.

³⁶ Gos nge ek ni tor kindiłim amb endi mułum amb ei embe ‘Ana’ niłmin. Eim arim Panul mułum; eim nge wumb tiłap Asir; amb ei amb tukui mendpił mułum. Ok, eim wam kin kung ngii angii orung nga tał mułum.

³⁷ Ekii se wam kułang kin, eim wii mułang kung ngii 84 pei o pum. Amb ei eim men ngii owundu mei wak tunalim. Eim konu kuni mowii nipi eim Gos kin prei tek tek elim. Ei epin, tinga Gos embe ambii dinga kindpi kongun elim.

³⁸ Kunum ei Jiisas arim mam teł eim tu wun-jnguł eim men ngii opu Gos kin noman ka piipi ngum. Pe eim kangi ei nge ek ni tor kindpi nim. “Kangi ei enim wumb pei kui er mulnjung wumb kin Jura wumb pei sipi orung simba nge om,” pa nim.

³⁹ Wumb en enim Owundu nge lo ek niłim mił ełe enjing. En enim Galilii mei orung puk, Naseres konu ełe punjung.

⁴⁰ Pe kangi ei oupu tonu opu dinga er mułum. Mołpu kin, eim noman ka wii peng mołpu, nga Gos eim noman ka Jiisas ngum.

Kangi Jiisas Men Ngii Owundu Ete Pum

⁴¹ Kangi mam arim tał eł ełip ei kung ngii endi o pułum kunum ei kunum kunum Jerusalem konu ełe pułmbuł. Kunum ei konu kor owundu kunum ei yi niłmin, ‘Pasopa kuni owundu numun,’ pa niłmin kunum ei.

⁴² Jiisas eim kung ngii engki nga tał yi mił multum kunum ei, kor owundu ekii siłmin oł ei sik Jiisas arim mam ni Jerusalem konu ełe punjung.

⁴³ Ekii se, ‘Pasopa kunum’ ei poru neng, nga si kindik orung punjung; ba kangi Jiisas Jerusalem konu ełe enj multum. Pe arim mam tał Jiisas multum ei piınerkił.

⁴⁴ Kunum ei arim mam tał Jiisas wu amb kin onmun ni piikił. Yi ni piikił okuł, nga eł ełip wumb tiłap ende kin wumb puł kin endik konu kurkuł endkił mon pirim.

⁴⁵ Nga topultung kurkuł endkił, ba mon pirim. Yi peng kin, nga Jerusalem konu ełe orung pukuł, kur keningił nge pukuł.

⁴⁶ Nga kunum ei, wumb tał kurkuł andangił kunum tekliki o purum. Nga ekii se pu kenkił ni men ngii owundu ełe nirik multum kenkił. Wumb ek mon połmun wumb mulk konu ełe tuk multum. Wumb ei ek ninjing ek ei kii se piipi nga wumb nik ek mił piipi nipi orung kindpi multum.

⁴⁷ Wu ombu eim ek ei piik kin, kangił ei eim noman ka peng ek nipi kii sipi erang, wu ombu en enim puku sik endnjing.

⁴⁸ Arim mam tał Jiisas kankił nga puku sinjngił. Mam ek nipi yi nirim, “Kangił nim nimbił erang sił kin yi en? Nim arnim kin na kin noman embin tang kin, nim kurpuł andinmbił,” pa nim.

⁴⁹ Kangi Jiisas eim ek ni orung kindpi yi nim, “Nimbił erang, elip na kurkuł andinmbił? Elip piinenjngił min; na nam Arnan ngii owundu konu moł?” pa yi nim.

⁵⁰ Ba wumb tał Jiisas ek nim ei ek pułe pii kun enenjngił.

⁵¹ Kaplı, mam arim tał kin orung punjung. Nga Naseres konu ele tor punjung. Pe mam arim tał ek ninjngił ek ei piipi ekii siłim. Pe eim mam eim niłim ek ombu piipi noman ele tuk kind piip mułum.

⁵² Jiisas oupu tonu wang, eim noman ka wii tonu om. Wang kin, wu amb eim kan ka kanıłmin ei nga Gos kan ka kanıłim ku.

3

Jon Wumb Noł Pendilim Wu Gos Ek Wumb Ngum

(Masyu 3:1-12, Mak 1:1-8, Jon 1:19-28)

¹ Kung ngii engki nga angıł orung o pang Taipiriyas Siisa Rom King owundu mił mułum. Nga wu Pansiyas Pailos Jura mei owundu wu num mułum. Nga Eros Galilii mei owundu wu num mułum. Pe angim Pilip Esuriya kin Trakon-aisis ele wu num mułum. Pe wu endi Laiseniyas Apiliin konu ele wu num mułum.

² Anas kin Kaiyapas ni wu owundu kułmał kałımbił wu tał mołmbuł. Kunum ei Jon Sekaraiya kingam eim wumb konu ele mulenjngi konu ele mułum. Pe Gos ek eim kin ek nipi ngurum.

³ Yi erang kin, Jon eim Jura noł Joran konu wumb mulk konu ele orung orung pum. Pupu,

Gos ek piirim mił ni Joran wumb ngang, “En enim piyei! Oł kis si kindik, noman ak tok ok noł pingii,” ei mił nirim. “Pe Gos enim oł kis kil ngumba,” pa nim.

⁴ Ek ni tor kindikim wu endi Aisaiya eim mon ełe ok ek yi mił pułum ei keimi tonu orum.

“Wumb mulenjing konu ełe wu endi wii top yi nim: ‘Owundu nge andłam er kun erei!’ nim.

⁵ ‘Pe mei mani pum ni komung tonu pum ni, peng mei kis tonu mani er punum kin andłam mapi erim ei, enim nge nipi eim er kun ermba,’ pa nim.

⁶ ‘Wumb pei keningii ni Gos kongun erpi wumb pei sipi orung simba nge ermba.’”

⁷ Wumb pei wangin kin, Jon wumb noł pendpi ngumba nge ok. Eim ek yi nim, “Enim ek kend oł ełmin wembii kis mił mołmun. Enim wumb nii nipi ngum, Gos nge oł ekii se enim kin tonu omba ei nge enim kaplı koi erik si kindik punerngii.

⁸ Enim noman ak tok onjung kin, enim noman konj ka sik mułngii, nge nipi ngum. En enim noman piik ełe molk nik, ‘Eiparam ei sin erinpin’ ei ninerei mon! Na enim kanip nind, Gos ya ku ombu, kaplı erang, Eiparam kingam noł mułngii.

⁹ Wu endi tui maimi kin ond tami tumba enim mił yi ku wumb noman tuk to ak tunenjing kin, ond mong tunanim ond ei kołmung to dup kalımin mił Gos eim wumb ombu kin yi ku ermba.”

¹⁰ Eim ek yi neng kin, wumb pei eim kii sinjing, “Pe sin nimbil oł er wamin, nim sin noman tuk ak tunjung ni piinjii?”

11 Pe ek nipi orung kindim wumb ngopu yi nim, “Wu endi konduk tał simba wu ei wu endi ngunjii. Nga wu endi kuni sinermba ei ngunjii,” pa nim.

12 Wumb ku takis silmin wumb ok noł pingii nge onjung. Wumb ei eim kin sinjing, “Ek emb wu, sin nimbił oł er wamin nim sin noman tuk ak tunjung ni piinjii?”

13 Ek yi nipi wumb ei ngum, “Enim lo ku takis singii nimba mił sei! Nga enim ku endi pendik simin ni enerei mon!”

14 Pe opu wumb ok eim kii sinjing ku, “Sin nimbił oł er wamin nim sin noman tuk ak tunjung ni piinjii?” nik kii sik ninjing. Pe Jon ek nipi ngum, “Enim wumb wii kepił tunarik, kos wii enerik, ku wii sinerngii mon! En enim kongun ku ei mendpił ambilk, noman ka piingii,” pa nim.

15 Wu amb epi simin ni noman dinga piik kin, en enim noman ełe kom sek yi er mulnjung. Molk, yi piinjing, Jon ei Gos kindang om wu Kraisin, ni piinjing.

16 Pe Jon ek nipi orung kindim, “Na noł sip enim noł mendpił pendip ngond. Ekii se wu endi omba wu ei eim dinga ei kaplı ermbe ei na dinga ei kaplı enanim. Eim dinga ei kaplı ermbe. Na wu ka mon. Na eim kongun wu eim simb su kan ei na kaplı si kindmbii, ba na kaplı enanim. Eim wu num mołum. Eim enim Gos nge Gui Ka ełe nin dup ełe kin ouni yi mił wumb noł pendip ngumba.

17 Eim kapor sipi ambiłpi kuni wiis nginamin si kindpi er ka ermbe. Pe kuni wiis ei sipi kuni ngii ełe kaplı kułou tumba. Ba wiis tindkan ei dup kełmba. Dup ei nopu kumbulermbe mon! Piram

kunum kunum nopu pimba.”

¹⁸ Jon eim ek kanim eipi eipi neng kin wumb ek dinga ngopu, yi mił, kunum ei Jon eim Gos ek ka nipi wumb ngum.

¹⁹ Ba Jon Eros kin ek ngang, Eros eim wu num endi eim nge angim nge ambim embe Erosiyas sim. Eros eim oł kis kanim kanim eipi erim.

²⁰ Jon Eros kin ek nipi ngum. Ngang kin, eim Jon kan ngii pendim. Pendang, Eros mong owundu sim.

Jon Jiisas Noł Pendim

(Masyu 3:13-17, Mak 1:9-11)

²¹ Wumb pei noł pek mułangin kin, Jiisas noł pim ku. Jiisas noł pepi tonu opu, peri er mułang kin, ei kupu muł ei wuł ał pum.

²² Gos nge Gui Ka ei mani opu eim kin om. Gos Gui Ka ei kenjing ni kei Kurmuł mił mani om. Ei epin Gos ek endi nipi mani opu yi nim. “Nim na kang! Na nim kin noman ngond. Na nim kin ka piip ngond,” nim.

Jiisas Kupam Noł Nge Embe

(Masyu 1:1-17)

²³ Kunum ei Jiisas eim kongun mendpił ermaba erim. Nga eim kung ngii engki nga tekliki o pang eim kongun ermaba erim. Wumb piik eim Josep kingam ni piinjing.

²⁴ Elai nge kingam Josep; Masas nge kingam Elai; Liiwai nge kingam Masas; Melkai nge kingam Liiwai; Janai nge kingam Melkai; Josep nge kingam Janai;

25 Masaraiyas nge kingam Josep; Emos nge kingam Masaraiyas; Neiyam nge kingam Emos; Eslii nge kingam Neiyam; Nakai nge kingam Eslii;

26 Mas nge kingam Nakai; Masasaiyas nge kingam Mas; Semen nge kingam Masasaiyas; Josek nge kingam Semen; Jora nge kingam Josek;

27 Jonan nge kingam Jora; Tesa nge kingam Jonan; Serapapel nge kingam Tesa; Sialsiel nge kingam Serapapel; Nerai nge kingam Sialsiel;

28 Melkai nge kingam Nerai; Endai nge kingam Melkai; Kosam nge kingam Endai; Elmaram nge kingam Kosam; Er nge kingam Elmaram;

29 Josuwa nge kingam Er; Eliyesa nge kingam Josuwa; Jorim nge kingam Eliyesa; Masas nge kingam Jorim; Liiwai nge kingam Masas.

30 Saimon nge kingam Liiwai. Jura nge kingam Saimon; Josep nge kingam Jura; Jonam nge kingam Josep; Elaikim nge kingam Jonam;

31 Meliya nge kingam Elaikim; Mena nge kingam Meliya; Masas nge kingam Mena; Nesan nge kingam Masas; Deipis nge kingam Nesan;

32 Jesii nge kingam Deipis; Oper nge kingam Jesii; Bowas nge kingam Oper, Salmon nge kingam Bowas; Naison nge kingam Salmon;

33 Aminarap nge kingam Naison; Armin nge kingam Aminarap; Arni nge kingam Armin; Esran nge kingam Arni; Peres nge kingam Esran; Jura nge kingam Peres;

34 Jeikop nge kingam Jura; Aisak nge kingam Jeikop; Eiparam nge kingam Aisak; Tera nge kingam Eiparam; Neiyor nge kingam Tera;

35 Serak nge kingam Neiyor; Tiyu nge kingam

Serak; Pelek nge kingam Tiyu; Eper nge kingam Pelek; Sila nge kingam Eper;

³⁶ Keinan nge kingam Sila; Apaksas nge kingam Keinan; Sem nge kingam Apaksas; Nowa nge kingam Sem; Lemek nge kingam Nowa;

³⁷ Mesusala nge kingam Lemek; Enok nge kingam Mesusala; Jeres nge kingam Enok; Manalail nge kingam Jeres; Keinan nge kingam Manalail;

³⁸ Enos nge kingam Keinan; Ses nge kingam Enos; Andam nge kingam Ses; Gos nge kingam Andam.

4

Seisen Jiisas Ermba Mił Kenmbii Ni Erim (Masyu 4:1-11, Mak 1:12-13)

¹ Gos Gui Ka opu Jiisas kin paki to mułang, Jiisas eim nga noł Joran si kindpi orung pum. Pang kin, Gos Gui Ka eim sipi konu wumb mulenjing konu sipim.

² Gos Gui Ka Jiisas paki tang mułum. Mołang kin, wumb mulenjing konu ełe mułang kunum 40 o pum. Kunum ełe Seisen opu Jiisas kanpi ek nipi eim ermba mił ei kenmbii ni erim. Kunum ełe Jiisas eim kuni nunerim, wii minj mułum. Ekii se kuni tang piim.

³ Seisen yi nim, “Nim Gos kingam pim kin, kom ku ei nen kin bres erangli!” nim.

⁴ Pe Jiisas ek nipi orung kindim, “Gos ok połmun ek ełe yi nim, ‘Kuni bres mendpił wumb nołmun ei kapli enalim, wumb konj mulerngii,’ ” pa nim.

⁵ Seisen Jiisas tonu sipi sikir andan topu mei orung orung tep elilim wumb pei mołmun konu ei andan tum.

⁶ Pe Seisen ek yi nim, “Tep elim wumb ele dinga palim ei kin epi ka wii ya mołum ei kin ei na nim ngumbii,” pa nim. “Epi ka ya mołum ei na epi ei nga kapli nanim noman ele wu endi ngumbii,” pa nim.

⁷ “Pe nim na kin prei en kin na epi ei pei nim ngumbii,” pa nim.

⁸ Jiisas ek nipi orung kindpi yi nim, “Gos ok połmun ek ele yi ninim, ‘Nim Gos Owundu embe ambil tonu kindkin eim kongun ei minj enjii ninim,’ ” pa nim.

⁹⁻¹¹ Pe nga Seisen Jiisas sipipi, Jerusalem konu ele men ngii owundu engim ele tonu mondpu ek yi nim. “Gos ok połmun ek ele yi ninim, ‘Gos nge enjel nim kin tep er mułngii. Er mołangin kin, enjel en enim angil nim ambilk tonu singii. Embilangin kin, ku endi simb ele tunermba yi mił ninim.’ Pe nim Gos kingam pim kin, nim ya ele angkin puku si mani punjii,” pa nim.

¹² Jiisas ek nipi orung kindim, “Gos ok połmun ek yi ninim, ‘Nim Gos Owundu ol ei ermba nim kenjii ba ol ei nim kapli enenjii,’ ” pa nim.

¹³ Pe Seisen ek nipi erim ol ombu Jiisas ermba ni kanpi erim, ba mon peng Seisen kunum endi nga op erbii ni piip si kindpi pum.

*Jiisas Galilii Konu Ele Kongun Pułngun Mond Erim
(Masyu 4:12-17, Mak 1:14-15)*

14 Gos nge Gui Ka dinga eġe Jiisas kin moġang kin, Galilii mei eġe orung pum. Pe eim ek ka ei konu orung eġe pei pang wumb piinjing.

15 Kunum ei Jiisas eim, wumb men ngii eġe Gos ek kunum kunum nipi wumb ngoġum. Ngang, wumb pei eim embe ambil tonu kindilmin.

16 Jiisas Naseres konu eġe pum. Konu ei ok Jiisas kangil kembis kin konu eġe moġpu owundu erim ei, konu eġe moġum. Kor kunum ei, pupu men ngii eġe puġum. Pupu, Jiisas kunum kunum Gos ek ka gerpi eġim ei wumb piilmin.

17 Pe wumb, Gos ek ni tor kindilim Aisaiya wu ei ok puġum ek sik ngangin, ek ei gerpi kenim ni ek yi piim.

18 “Gos nge Gui Ka ei na kin muġang kin, eim na kongun ngopu enjii nipi kindim. Ei na op wumb epi sinaġim wumb kin Gos ek ka yi nip ngumbii nge onj. Wumb kan puk moġmun ei tor wii muġngii. Ningil tumbun moġum wumb ei ka nik muġngii. Wumb endi noman embin peng moġmun wumb ei na paki tumbii nge onj.

19 Na op enim nip ngond, pe kunum Owundu nge wumb eim sipi orung simba nge om.”

20 Jiisas ek mon poġmun ni tuk kindpi, ngopu eim mani muġang, wumb men ngii eġe tuk moġangin wumb ei Jiisas kin ningil kanik minj mulnjung.

21 Pe eim ek nipi wumb ngumba nge erim. “Akip Gos ek ei tor onum. Yi miġ enim piik poru ninmin.”

²² Pe wumb eim embe ambilk tonu kindik, eim ek ka nim ni piik mulnjung. Molk, en enim ek yi ninjing, “Wu ei Josep kingam min mon?”

²³ Jiisas eim piipi kenim wumb pei eim ek pii gii ninenjing. Ninerangin kin, eim ek yi nipi wumb ngum, “Ek ekin endi na kin enim yi nik na ngungii, ‘Ond mong ngopu elim wu ninim nge ngenj er ka enjii. Nim Kapaniyam konu eġe oġ en ei sin piinjpin. Pe ya ninim mei eġe oġ ei nge enjii,’ ” pa nim.

²⁴ Eim ek yi nim, “Na ek keimi nip enim ngond. Wu endi ek ni tor kindiġim wu moġpu ek keimi nimba; ei eim nge ngii konu moġmun wumb ei eim ek ei piinerngii.

²⁵ Na ek keimi nip enim ngond ei enim piinmin. Elainja multum kunum ei Esrel amb pei mulk, wenjing noġ kulk kunum ei kupu muġ ei poru nirim. Pe kung ngii tekliki o pang oi angġ orung nge endeim purum kunum ei konu pei orung orung kumb kuni owundu sirim.

²⁶ Ba Gos Elainja kindpi pupu Esrel amb wei endi muġum konu pui ni kindnerim. Mon! Gos Elainja Serepas konu eġe Sairon mei orung pui nirim konu eġe, amb endi wam kultum amb ei, kuni salim konu eġe nim pui nipi kindrim.

²⁷ Gos nge ek ni tor kindiġim wu endi Elainja orung kunum ei wumb kinj wumb pei Esrel konu mulk, konu ei tuk eġe wumb endi ka mulerik mon! Siriya konu eġe kinj wu Neimin ni wu ei minj ka multum.” Jiisas nirim ek ei eim nge wumb tiġap ende ei eim ek piinenjing.

²⁸ Wumb men ngii eġe nirik molk ek ei piik popuġ sinjing.

29 Pe wumb tonu angk, Jiisas ambilk konu owundu anda kindnjing. Kindangin kin, konu owundu ei, tonu komung endi  le sim. Pe wumb eim sik komung  le orung tonu sip komung  le to olkup to kindngii.

30 Ba eim tuk wumb onjung konu opu, tuk  le opu am pum.

*Wu Endi Gui Kis Mułum
(Mak 1:21-28)*

31 Eim Kapaniyam konu  le tor pupu, mei owundu endi sim ei Galilii niłmin. Pupu, kunum ei kor kunum wumb mulnjung Gos ek ka nipi wumb ngum.

32 Wumb eim ek ei piik wumb tuk puku sik enjing. Nimbił erang Jiisas ek ei dinga palim.

33-34 Men ngii  le wu endi gui kis tuk mułum wu ei ngii  le tuk mułum. Mołpu kin wii dinga topu, ek dinga nipi yi erim. “Jiisas, Naseres konu wu, nim ya  le nimbił oł enjii on? Nim sin kin tunjii on min? Nim sin kan wiik to si kindnjii! Na nim piind ei Nim Gos nge wu kun ka wii,” pa nim.

35 Ba Jiisas ek nipi orung kindpi, ek dinga ngum, “Nim ek tingnarkin, wu ei si kind o pui!” nim. Gui kis ni wu ei to kindang mani pupu wumb mulnjung konu tuk pim. Pe gui kis wu ei kin oł endi nga enerim wii si kindpi pum.

36 Wumb pei puku sik, yi ninjing, “Ek ei nipe ek yi ninjing? Wu ei wu Owundu eim dinga sałim ei eim ek dinga nipi gui kis ngang kin, gui kis pei eim ek piik wu endi si kindik punjung,” pa ninjing.

³⁷ Oġ yi miġ erang kin, Jiisas eim erim oġ ei wumb nik pangin, wumb konu eġe orung orung pei piinjing.

*Jiisas Wumb Pei Er Ka Erim
(Masyu 8:14-17, Mak 1:29-34)*

³⁸ Jiisas men ngii ei si kindpi anda opu, pupu Saimon ngii engim konu eġe nirik pum. Pupu, kenim ni, Saimon ambim mam ening owundu tang pim. Pe wumb ok Jiisas kii sengin, “Amb ei paki tunjii,” pa ninjing.

³⁹ Pe eim pupu amb muġum konu eġe mandi angpi ek dinga neng, ening tum ni poru nim!” Neng kin, amb ni sikir angpi kuni wumb pei ngum.

⁴⁰ Eni mani ba erang, wumb pei ening kanim kanim pim wumb, Jiisas muġum konu eġe tu wunjung. Pe eim wumb kis pim wumb, peng eġe endeim endeim ni angil ambilpi pang, wumb pei ka mulnjung.

⁴¹ Jiisas ek nipi ngum. Pe gui kis ombu wumb pei si kindik konu eipi eipi punjung. Gui kis ombu wii dinga tok yi ninjing, “Nim Gos kingam.” Ba eim gui kis ek ngopu, “Ek tingnerei!” nipi ek dinga ngum. Gui kis ombu Jiisas nim ek piik, “Eim Krai wu endi Gos kindang om,” ni piinjing.

⁴² Pe kupiiring ok, Jiisas pupu wumb mulenjing konu eġe pum. Pang kin, wumb eim pum konu kanik, ekii sek punjung wumb ei si kindik punenjing mon! Eim konu eipi punermba nik, eim endim konu ekii sik punjung.

⁴³ Ba eim ek nipi orung kindpi yi nim, “Pe na ek ka nip wumb ngumbii ei nge Gos sinim tep er

mołum mił ei nip wumb tilap eipi kin nip kongun ei nge ermbii,” pa nipi kindim.

⁴⁴ Pe eim Jura konu wumb, men ngii engim konu ełe pupu Gos ek nipi wumb ngum.

5

Jiisas Ek Neng, Piisa Eim Ekii Sim (Masyu 4:18-22, Mak 1:16-20)

¹ Kunum endi noł wer ełe mandi Genesares noł gop ełe Jiisas eim angpi mułum. Nga eim wu amb pei Gos ek ni ngang piimin nik wumb pei eim kin ok wumb piki tok mulnjung.

² Eim kenim ni noł kanu tał noł gop wer ełe pinjngił, omu tołmun wumb tor punjung. Wumb omu kon polk omu tołmun wumb en enim omu kon ei noł was er kun erik mulnjung.

³ Jiisas eim noł kanu endi ełe tonu purum. Purum noł kanu ei Saimon nge kanu. Nga eim Saimon kanpi yi nirim, “Nim noł kanu ei noł ełe pip to tuk kindii!” nirim. Pe eim noł kanu ełe mołpu, Gos ek ka nipi wumb ngurum.

⁴ Eim ek ni poru nipi, ekii se eim Saimon kanpi nim, “Nim noł kanu pip to sipkin, omu kon tuk noł ełe mani kindkin omu sinjii nge kindii,” nim.

⁵ Saimon ek nipi orung kindim, “Epin kunum endi sin kongun enjpin omu tunenjpin. Pinerang, sin omu endi tunenjpin mon, ba nim nin, ei kapli nga omu kon pułmbii,” pa nipi mani kindim.

⁶⁻⁷ Omu tołmun wumb kombur yi erangin kin, omu kon omu piki top mułum. Mułang kin, omu kon kilip tumba nge erim. Yi erangin kin, omu tołmun wumb ei en enim kongun ende ełmin

wumb noł kanu eipi se mulnjung ei tu wangin nik angil pinou enjing. Erangin wangin kin, noł kanu tał omu kindnjing piki topu noł kanu tał noł ełe mandring simba erim.

⁸ Saimon Piisa eim jep oł ei kanpi Jiisas simb ełe mani pupu yi nim, “Nim si kind po! Na oł kis ełe wu moł,” pa nim.

⁹ Pe eim omu pei sinjing omu ei kanpi, eim puku sim. Pe wumb eim kin tep to mulnjung wumb, puku sinjing ku.

¹⁰ Sependii nge kingam tał, Jeims kin Jon tał ei Saimon kin tep to andilmin, wu tał yi ku puku sinjingil. Pe Jiisas ek nipi Saimon ngum, “Nim mund mong tunerii! Ekii se wumb na ek piimin nik ongii ei nim wumb pei nik tuk sikin, na ek ni wumb ngunjii ei omu yi mił, wumb yi mił tuk ongii.”

¹¹ Omu tołmun wumb ei noł kanu noł wer ełe tu wunjung. Tu wangin kin, en enim epi kanim kanim pei si kindik Jiisas kin ekii sinjing.

*Wu Endi Kinj Tum Ei Jiisas Er Ka Erim
(Masyu 8:1-4, Mak 1:40-45)*

¹² Eim konu owundu ełe multum konu ełe, nga wu endi multum. Multum wu ei, eim ngenj kinj owundu tum. Eim Jiisas kanpi, opu Jiisas simb ełe mani mołpu prei erpi yi nirim. “Owundu, nim noman ełe erim kin kapli, nim na er ka enjii,” pa nirim.

¹³ Jiisas eim angil ei kinj tum wu embilmbii ni erpi ek yi nim. “Na noman ełe nim ka mulnjii,” pa nirim. Neng kin, kunum ełe mendpil Jiisas kinj tum wu ei er ka erim.

14 Nga Jiisas ek dinga nipi eim ngopu yi nim, “Nim wu endi ek ninenjii mon! Nim ngenj sipkin Gos kułmał wu ei andan tunjii. Tan kin, ngenj ka salim ni piingii nikin kułmał kelnjii ei Moses lo ek ełe pałim mił erang, wumb yi piingii nim ening ni poru nim ni piingii. Nim nga ek wumb ninenjii mon!”

15 Ba Jiisas oł erim ombu konu orung orung pei eim ek pang wumb pei piinjing. Piik kin, Jiisas mułum konu ełe onjung. Ok Jiisas ek ei piimin nik wumb kis pim ei tu wunjung kin er ka nge ermba.

16 Ba eim wumb mulenjing konu pupu kunum ei eim prei elim.

*Wu Endi Simb Angił Kis Mułum Ei Er Ka Erim
(Masyu 9:1-8, Mak 2:1-12)*

17 Kunum endi eim wumb ei ek nipi ngopu mul-tum kunum ei lo ek piilmin wu kombur kin lo ek emb tołmun wu kombur mulk ku. Wumb ei Galilii mei orung orung kin Jura mei nin Jerusalem konu owundu ełe ni wumb ombu onjung. Owundu nge dinga Jiisas ngang, Jiisas ening pirim wumb ei er ka ermba nge om.

18 Wu kombur wu endi peł ełe pendik tu wuk. Wu ei embil poru, dinga pineririm wu, ei en enim nirik sipik Jiisas mułum konu ełe kumb ełe mandi pendngii sipik.

19 Ba konu ełe wu amb pei piki topu pirim. Nga wu ening pim wu ei nirik sipngii konu ełe tuk sineririm. Yi erang kin ngii andaring ełe sipik tonu ngii beł ełe ambil wuł ał kindik peł ełe pim wu mani Jiisas mułum konu ełe kun mani kindik.

²⁰ Jiisas wu ombu pii gii pirim wu ei kanpi kin yi nirim, “Wu puł, nim oł kis ei kil ngum,” pa nim.

²¹ Wumb lo ek połmun wumb ni lo ek piłmin wumb en enim noman nendii to piik yi kii sinjing. “Wu ei wu nii opu Gos kin ek ambilim? Wu endi wumb oł kis ei kil ngunermba; ba Gos endeim minj yi ermba.”

²² Jiisas wumb ombu noman ełe piipi si kindim. Pe eim ek nipi orung kindpi, yi nirim, “Nimbił erang en enim noman ełe ek eipi eipi nik punmun?”

²³ Nipe ek endi enim noman ełe embin tonum? Na ninj ek ei embin tonum min? Na nim, ‘Oł kis ei si kindind!’ min ‘Na nim angkin pui!’ nind? Pe na oł endi eramb enim kanik keimi nik piingii.

²⁴ Ba na enim piingii ni piind, na wu kingam noman dinga ya mei ełe salim. Kapłi wumb oł kis kil ngumba, yi erang kin eim ek nipi wu endi embil dinga punerim ei nge er ka erim. Na nim kanip nind, ‘Nim angkin, peł sikin, ninim nge ngii konu ełe orung pui!’ ” nind.

²⁵ Yi erang, pe mendpił wu amb ningił ełe eim engim. Angpi peł sipi eim ngii konu ełe pupu Gos embe ambil tonu kindim.

²⁶ Pe wumb pei Jiisas erim oł ei ka nik puku sik enjing. Ba wumb Gos embe ambil tonu kindik. En enim noman ełe piik nik minj endnjing. Yi mił ninjing, “Pe sin oł eipi minj endi kenjpin,” pa ninjing.

*Jiisas Liıwai Wii Tum
(Masyu 9:9-13, Mak 2:13-17)*

²⁷ Ekii se Jiisas eim andlam andpi pupu, kenim ni wu endi ku takis silim wu, ei eim ku takis ngii ele mulum wu ei embe Liiwai. Jiisas ek nipi wu ei ngum, “Nim na onj konu ele oi!” nim.

²⁸ Pe eim angpi epi pei si kindpi Jiisas pum konu ele ekii se pum.

²⁹ Liiwai eim ngii konu ele kuni owundu endi erpi Jiisas ngum. Pe ku takis silmin wumb pei kin, wumb eipi pei kulou tok wu tal kin kuni ei nunjung.

³⁰ Pe lo ek ekii silmin wumb ni, peng lo ek mon polmun wumb ni wumb ok Jiisas nge ekii silmin wumb muljung konu ele noman kis piik mulk kii sinjing. “Nimbił erang enim ku takis silmin wumb kin nga ol kis elmin wumb kin enim kuni ende nonmun?”

³¹ Jiisas ek nipi wumb ngopu yi nim. “Enim wumb ening endi pinałim wumb ei, ond mong ngopu elim wu kin punałmin min, ba ening pim wumb ei minj ond mong ngopu elim wu pangin kin ond mong ngolum.

³² Na wumb ol kis er molmun wumb ei ol kis kil ngop sip orung simbii nge onj. Ba wumb kun ka molmun ni piinjing wumb, ei kin na onenj,” pa nim. “Nimbił erang na nga wumb ol kis enjing ei kin ngii konu pup onermbii ku?” pa nim.

³³ Pe wumb kombur ek nik Jiisas ngok yi ninjing, “Jon nge ekii silmin wumb kuni mowii elmin. Erik, Gos prei kunum kunum elmin. Lo ek ekii silmin wumb nge ekii silmin wumb ombu yi ku elmin. Ba nim nge ekii silmin wumb kuni nok yi elmin. Ei nimbił erang elmin?”

³⁴ Jiisas ek nipi wu ombu ngum, “Enim wu endi

amb simba elim kunum ei kapli ei wumb puł kuni mowii erngii min? Ei mon!

³⁵ Ba ekii se opu wumb wu amb simba er mołum wu ei si tor singii kunum ei eim kan se nołum kin tep to mulermba kunum ele kuni mowii erngii.”

³⁶ Jiisas ek ekin endi nipi ei nge wumb noman konj kin wumb noman ok nge ende punermba ek ei wumb ngum. Eim yi nim, “Wu endi konduk konj ei kilip to kembis kembis erpi, aninga konj endi sipi konduk ok nge ele mui tumba. Pe wu endi yi ermba ei eim konduk konj er kis mondpu ermba ei, konduk konj ei kanim eipi mił pimba. Nga konduk ok nge kanim eipi mił pimba ku.

³⁷ Pe wu endi kung meme ngenj ming, mił ok nge ele noł wain konj tuk kindnałmin. Ei mon! Wu endi yi mił erbii ni ermba wu ei eim kung meme ngenj ming mił ok nge tok neng, noł wain konj ei tor pułum. Nga kung meme ngenj ming mił nge ei kis mołulum ku.

³⁸ Ba wu endi noł wain konj kułpu kung meme ngenj ming mił konj ele tuk kindmba.

³⁹ Pe wu endi eim noł wain ok nge nołum, ‘Ei noł wain ka wii,’ pa nim. Eim noł wain konj singin ka pinalim.”

6

Gos Kor Kunum Ei Kongun Mon Nilim (Masyu 12:1-8, Mak 2:23-28)

¹ Kor kunum Jiisas eim tuk kuni mong wiis palilim konu ele andpi mułum. Jiisas nge ekii silmin wumb ombu ok kuni wiis mong ei sik ambil winin tok nuk.

² Ba lo ek ekii sinjing wu ombu yi ninjing, “Gos kor kunum, ei kongun mon nilmin kunum ei, ba enim nimbił erang enmin?”

³ Jiisas ek ni orung kindpi yi nirim, “Enim king Deipis sin kupenjpin eim epi erim mił enim piinarik na ek yi nind. Kunum ei eim kin eim wumb kin kuni kulnjung.

⁴ Deipis eim Gos ngii owundu ełe nirik pupu, bres Gos nge kumb ełe sim bres ei sim. Pe bres ei wumb pei nunerngii mon nik, Gos kin kulmał kalmin wumb minj ambił nungii nilmin. Ba Deipis eim bres nopolu nga eim nge wumb ei bres ngang nunjung ku. Ek ei enim gerik piinjing min?” Ei kii sipi nim, “Nimbił erang enim King Deipis kin ek ninanmin, ba na sin kin ek ninmin?”

⁵ Jiisas ek dinga nga nipi yi nim, “Gos kindang mei ełe na wu kingam moł. Mołup, kor kunum owundu moł.”

Wu Endi Angił Kis Mułum Ei, Jiisas Kor Kunum Er Ka Erim

(Masyu 12:9-14, Mak 3:1-6)

⁶ Pe nga kor kunum endi eim pupu men ngii ełe pupu Gos ek nipi wumb ngum. Kunum ei wu endi mułum wu ei angił tundung orung miyem poru nim.

⁷ Lo ek emb tołmun wumb kin lo ek ekii siłmin wumb kin ei Jiisas ermba oł ei kenmin nik kui er mulnjung. Molk kin, yi piinjing ni kor kunum wumb endi kis pimba er ka ermba ni kanik mulnjung. Molk kin, Jiisas kos er ngumun nik mulnjung.

⁸ Ba Jiisas eim wumb noman tuk ełe piinim. Piipi kin, wu angił miyem poru nim wu ni, “Angkin

Oi!” Neng, wu ni sikir opu wumb mulnjung konu tuk engim.

⁹ Pe Jiisas eim ek nipi wumb ngum, “Na pe enim kii simbii end. Sinim lo ek nipi kunum oł ka ermin min oł kis ermin, ei ninim min? Wumb kin paki topu er ka ermin, min wumb topu er kis ermin?” a nim.

¹⁰ Jiisas wumb mulnjung konu tuk kanpi andpi, wu endi angil miyem poru nim ei kan sipi nim. “Nim angil tun kindii!” Yi neng kin, wu ei yi erang eim angil ni ka erim.

¹¹ Ba wumb en enim noman kis dinga piinjing. En enim ek nik piik piik enjing. Erik, en enim yi ninjing, “Jiisas kin nimbił oł ermin,” ninjing.

*Jiisas Nge Ek Se Andilmin Wu Engki Nga Tal
(Masyu 10:1-4, Mak 3:13-19)*

¹² Kunum ei Jiisas eim prei ermbii ni piipi komung endi ełe tonu purum. Eim prei erpi Gos ngurum kunum ei eim prei er mułang kin, konu tengrim.

¹³ Tengmba erang kin, Jiisas ekii sinjing wumb wangin nim. Neng, wangin wu engki nga tal sipi wumb embe ‘Ek se andilmin wumb’ pa yi nirim.

¹⁴ Wu embe endi Saimon, Jiisas embe Piisa ni ngum. Nga endi Endru ei Saimon nge angim. Embe nga Jeims kin Jon tel, Pilip ni Barsolomu.

¹⁵ Pe Masyu ni Tomas ni Jeims Alpiyas nge kingam Saimon wu ei lo ekii silim wu.

¹⁶ Pe Jeims nge kingam Juras nin nga Juras Eskeriyas konu wu eim Jiisas opu orung wumb mulnjung konu ni peni ełe kindmba.

*Jiisas Wumb Pei Kin Kongun Erim
(Masyu 4:23-25)*

¹⁷ Pe Jiisas wumb ei kin mani punjung. Nga puk konu kun sim konu eim nge ekii silmin wumb kin pei tep to engnjing. Pe wumb pei Jura mei konu ele orung orung ni Jerusalem konu owundu ele ep noł wer ele konu ele Taiya konu ni Sairon konu ni wumb pei ok mulnjung.

¹⁸ Wumb ei ok eim ek piimin nik onjung. Pe eim wumb ening pim wumb ombu er ka erpi, wumb gui kis tuk mułang onjung wumb ei Jiisas wumb ombu er ka erim.

¹⁹ Wumb pei angil Jiisas embilngii enjing. Nimbil erang Jiisas dinga pupu wumb pei, wumb ening pim wumb ei Jiisas er ka eririm.

²⁰ Jiisas eim nge ekii silmin wumb ombu kanpi ek yi nim,

“Enim wumb wii epi sinerang mołmun wumb ei, ka piyei! Gos sinim tep er kanpi mołum oł ei enim nge salim.

²¹ “Enim kumb kuni palmin, enim ka piyei! Ekii se enim noman ka piik mułngii. Pe enim wumb ke ninmin, ei enim ka piyei! Ekii se enim tokuł erngii.

²² “Ekii se wumb enim wu kingam ei kin ekii se punmun ei keningii. Kanik kin, wumb en enim noman kis peng piingii. Piik kin, enim kon si kindngii ni, enim kin ek kis ningii ni, enim embe sik epi kis mił ombu nge singii kunum ei, enim ka piingii.

²³ “Pe wumb enim kin yi erik ninjing kin enim ka piik noman ka seng mułngii. Enim piingii, epin konu ele enim kumep singii ei owundu salim.

Kumb okrii enim kupenjing noł oł ei, Gos nge ek ni tor kindilmin wumb kin yi ku elmin. Yi mił ku enim kumep ka singii. Ei Gos nge ek ni tor kindilmin wumb kin tep to singii.

²⁴ “Ba enim kom ku ngenj ele peng, enim noman ka piik er mułmun ei enim noman ka piik erngii. Erangin, oł ei er poru nik mołmun ei enim wumb ei kan kun er mułngii.

²⁵ “Enim wumb epi pei kanim kanim sinjing kin enim noman ka simba. Ekii se enim epi sinerang kin kuni kułngii. Enim wumb pe tokuł er ka piinmin wumb ei kan kun er mułngii. Ekii se enim ke nengin ningił ka mani omba.

²⁶ “Pe enim wumb pei enim embe ambił tonu kindik ninjing kin enim pii kun er mułngii. Ok en enim kupenjing noł ek kend tok, ek ni tor kindilmin kend wumb embe ambił tonu kindik elmin oł yi erngii ei kanik mułngii,” pa nirim.

*Wumb Opu Orung Wumb Kin Noman Ngunjii
Oł Ei
(Masyu 5:38-48, 7:12a)*

²⁷ Ba enim na ek piik mołmun wumb ei, na ek nind ei piyei! Enim opu orung wumb mułngii, ei kapli noman ka ngok mułngii. Pe wumb enim noman kis piingii, ei enim wumb ei kin epi ka erngii.

²⁸ Wumb enim kin ek bultung ningii ei, enim kengip ek ka nik wumb ombu noman ka ngungii. Nga wumb enim kin oł kis erngii wumb ei, enim Gos kin prei erik paki tungii,” pa nim.

²⁹ Wu endi nim kon taki tum kin, nga orung ak tan orung tumba ku. Wu endi nim kon takis ei

simbii nipi erim kin, nim konduk ei kin ouni mon ninenjii ku.

³⁰ Wu endi epi endi kii sipi nim kin, nimba epi ei ngui! Pe wu endi nim epi wii sipim kin, nim nga orung tu wii nikin, ek dinga ninerii!

³¹ Enim ermin ni piingii oł ei, wumb enim kin enjing kin, nga enim wumb ombu kin oł yi ku erngii.

³² Wumb enim kin noman ngołmun wumb ei, nga enim noman ngangin enim nipe noman piingii? Pe wumb oł kis enmin wumb ei, wumb kombur noman ka piik ngołmun ku.

³³ Pe enim wumb kombur oł ka er ngangin kin, nga wumb enim kin oł ka er ngungii. Nga ei enim nipe noman piingii? Wumb noman kis piik oł kis elmin wumb ei kombur oł ka yi mił elmin.

³⁴ Enim epi kombur wumb ngunjung kin, nga orung simin ningii ei enim noman nipe noman piingii? Wumb oł kis elmin wumb oł ka erik wumb eipi ngołmun ku. Pe wumb ombu epi ende mił silmin.

³⁵ Ba enim opu erii wumb ei noman ka ngok, enim oł ka erik wumb ngungii. Enim wumb ngungii epi ei nga ngok orung kindmin ni pi-inereii! Enim oł ei erik epi ka wii owundu singii. Enim ele yi erik molk punjung kin enim Gos kingam noł mendpił mułngii. Wumb Gos kin noman ka piinalmin ei Gos wumb ombu kin noman ka ngołum. Ngopu kin, wumb kis kin noman ka ngołum. Ngopu, wumb kis kin ouni ngołum.

³⁶ Enim wumb eipi kaimb singii, ei enim Ernjing Gos kaimb silim mił ku singii.

*Wumb Eipi Kin Kos Ninmin Ei
(Masyu 7:1-5)*

³⁷ Enim wu endi ek ei nge nik mok tolum wu ol ei mił enerngii. Enim wumb ol kis ei si kindangin kin, Gos enim ol kis ei kil ngumba ku. Pe nga enim epi endi mok tolum wu er kun elim mił enerngii. Yi mił enjing kin Gos enim epi embin tui ei mok tumba. Wumb ol kis ei ni ka enjing kin enim ol kis ei Gos kil ngumba ku.

³⁸ Pe enim ol kanim kanim yi erngii mił yi ku Gos enim kin yi ermba. Pe wumb enim kin pimba mił ngungii ei, pei ngungii. Ei ngok pangin piki topu bein tumba ermba, ei enim ngungii. Pe enim epi wumb ngungii yi mił ku Gos enim ngumba.

Jiisas Ek Ekin Nga Ngum

³⁹ Jiisas ek ekin endi nipi wumb ngum ku. Ei yi nim, “Wu ningił tumbun mołum wu ei, nga wu endi ningił tumbun mułmba wu ei, andlam andan top simba min? Ei mon! Wu tał ouni tukpu ełe bok tunguł.

⁴⁰ Mon kangił ei ek mon wu ek nipi ngołum wu ei to mani kindnermba. Eim mon kanpi poru nimba ei kapli eim ek mon wu mił mułmba.

⁴¹ Enim wumb eipi kanik ol kun pinermba mił ermba ei ni kun enerngii mon! Ei nimbil erang ninim ol yi nge elin ku? Nimbil erang nim angnim ningił ełe epi moł palim ei kankin nin? Ba ninim epi moł owundu endi ningił ełe palim ei piin min?

⁴² Nimbil erang nim angnim ek nin? ‘Angnan, nim ningił ełe epi moł endi palim, na si kindmbii,’ nin. Ba ninim ningił ełe epi owundu palim ei ninim piinan min? Nim ek kend wu, nim epi

owundu endi ninim ningil ele palim ei si kindkin, ekii se ninim angnim ningil ele kun kankin epi moł pimba ei kapli si kindnjii,” pa nim.

Ond Kis Ei Mong Kis Tolum
(Masyu 7:16-20, 12:33-35)

⁴³ Ond ka ei, mong kis tunałim. Yi ku ond kis ei nga mong ka tunałim.

⁴⁴ Wumb en enim ond angłim ei kanik piłmin. Piik kin, ond ei ond ka min mon, ni kanılmin. Wumb en enim ond pik ei gał mołpu mong tołum ei tingnałmin. Nga ond wain yi ku, ond wain ei ond kembis angpi gał mołpu mong tołum ei tingnałmin mon.

⁴⁵ Wu endi eim noman ka pałim wu ei oł ka elim ku. Erpi, oł ka wii elim. Nga wu kis ei eim noman kis piki topu peng, eim oł kis elim. Noman ele oł yi mił pałim ei gupu ele tor ołum.”

Ngii Takılmin Ei Oł Tał Palim
(Masyu 7:24-27)

⁴⁶ “Nimbił erang enim na ‘Owundu, Owundu’ niłmin, ba na ek nind ek ei enim piinanmin?

⁴⁷ Wu endi na kin opu na ek piipi ermba wu ei na eim kanip moł. Mołup, eim ermba oł ei andan tamb enim piingii.

⁴⁸ Wu ei yi mił, wu endi ngii tekmbii ni tukpu sipi mer mani pupu, mei ele ku owundu pei kindpi siimen elim. Ekii se ngii tonu ele takilim, noł owundu topu ngii ei nirik omba, ba kapli onermba. Nimbił erang wu ei eim ngii dinga wii tekim.

⁴⁹ Ba wu endi na ek piipi nga ekii sinermba wu ei yi mił wu endi ngii tonu mei peł ele tekim. Eim

mei mani ei ku dinga kindnarpi siimen enerim. Ekii se noł owundu topu, noł ngii ełe nirik wang kin, ngii sikir er kis mułum. Nimbił erang wu ei ngii mił dinga pinerim.

7

Jiisas Opu Ełmin Tep Ełim Wu, Ei Eim Nge Kongun Wu Endi Er Ka Erim.

(Masyu 8:5-13)

¹ Jiisas ek ei nipi wumb ngopu poru nipi, ekii se eim Kapaniyam konu ełe pum.

² Rom wu endi opu ełmin wumb 100 pei opu ełmin wumb pei tep ełim, wu ei kongun wu endi mułum. Opu tep ełim wu eim kongun wu eim noman ka ngołum wu ni ening peng erang kułmba mandi erim.

³ Opu tep ełim wu ei eim Jiisas kin ek ei piipi mułum. Pe eim Jura wu num kombur kindang puk ek nengin kin, Jiisas opu, na kongun wu ei er ka ermba nipi kindim.

⁴ Wumb puk Jiisas multum konu ełe tor puk ek dinga nik, Jiisas nik yi ninjing, “Wu ei wu ka nim wu ei paki tunjii min?”

⁵ Eim sinim Jura wumb kin noman ka ngołum. Eim mendpił men ngii ei takpi sinim ngurum.”

⁶ Pe Jiisas wu ombu kin tep to purum. Jiisas opu, opu tep ełim wu eim ngii konu mandi pang kin, opu wu 100 tep ełim wu ni wu puł kombur kindang puk Jiisas kin ek ningii nge puk. Puk yi nik, opu tep ełim wu ni yi nim, “Jiisas, nim wu Owundu! Nim na ngii konu ombii nikin okun kis

piinjii; na wu ka mon. Nim na ngii nirik onerii!”
yi ninim pa nik.

⁷ “Pe yi ku, na wu ka pim kin, nim ngii konu eɛ na ombii min, ei mon. Ba nim ek ei nen na kongun wu ei ka muɔmba,” pa nim.

⁸ “Nimbiɔ erang, na yi ku wu num kombur kongun ngokuɔ eɔmin oɔ ei na kongun er moɔ. Pe na nge opu wumb ei na ek piiɔmin. Pe wu endi ‘Pui’ nimbii, ei kapɔi ba. Nga wu endi ya ‘Oiyoi!’ nimbii, ei kapɔi omba. Pe nam kongun wu, ‘Nim oɔ ei erii!’ nimbii, ei kapɔi ermba. Na nge wu num ombu kongun ei na ngunjung miɔ na yi end. Ba nim noman dinga peng ening ei nge er ka eɔin ei kapɔi nim na nge kongun wu ening ei kapɔi er ka enjii,” pa yi nim.

⁹ Pe Jiisas ek ei piipi, eim wu ei noman ka jii sim ni piim. Pe eim ak topu wumb eim orung konu ekii se ok ei kanpi yi nirim. “Na enim kanip nind, Esrel wumb pei moɔmun konu eɛ wu endi noman ka peng, pii gii yi miɔ peng na kinenj mon!” pa nim.

¹⁰ Opu eɔmin wumb tep eɔim wu, wu puɔ kombur kindang ok wu ni nga orung puk kenik ni, kongun wu kuɔmba erim ni nga konj multum.

Jiisas Nein Konu Eɛ Kang Wu Endi Er Konj Sim

¹¹ Ekii se nga Jiisas eim konu owundu endi purum konu ei embe Nein. Jiisas eim nge ekii sinjing wumb kin, wumb pei eim purum konu puk.

¹² Eim pupu konu owundu eɛ andɔam ondu paɔim eɛ mandi pang, wu endi kultum wu ni tu wuk wu kultum ei, mam eim kingam endeim

mendpił mułum ei, kułang kui tunjung nge ei tu wuk. Tu wangin kin, amb ei wam kumb ok kultum. Pe wumb konu ełe wumb pei amb ei kin ouni ok.

¹³ Jiisas Owundu amb ei kanpi, kaimb piipi yi nirim. “Amb, nim ke ninerii mon!” pa nirim.

¹⁴ Pe eim mandi pupu, wu kulii pirim konu ełe eim peł ełe embiltim. Pe wumb wu tu wuk wumb ei angik mulk. Pe Jiisas nipi yi nirim, “Kangi wu, kanpi nind, nim engnjii!” pa nim.

¹⁵ Pe nga kultum wu ei tonu mułum. Mołpu, ek nipi multum. Mułang kin, Jiisas wu ei sipi mam eim ngurum.

¹⁶ Yi erang kin, wumb pei mund mong tok, Gos embe ambilk tonu kindnjing. Wumb yi ninjing, “Gos ek nipi oł ekii se ermba wu owundu sinim konu ełe tuk onum,” ninjing. Wumb ek nga yi ninjing, “Gos eim opu eim wumb si orung simba nge opu wumb paki topu enim,” ninjing.

¹⁷ Jiisas erim oł ei pang kin, wumb Jura mei konu ni wumb konu orung orung pei piik punjung.

Jon Wumb Noł Penditim Wu Eim Ekii Sinjing Wu Tał Jiisas Kin Kindim.

(Masyu 11:2-19)

¹⁸ Jon nge ekii sinjing wumb ei epi pei ek nik eim ngunjung.

¹⁹ Jon eim ekii sinjngił wu tał wii tum. Eim yi nim, “Elip pukuł Owundu kankił yi kii singił,” pa nim. “Ok Gos wu endi kindmbii neng, sin kui er mulnpjun wu ei nim min? Min sin nga wu endi omba ni kui ermin min?”

20 Wu tał Jiisas kin okuł ek yi ninjingił. “Jon noł sipi wumb noł pendilim wu, ei sił nim kin peł neng onmbuł ninjingił. Nikił yi ninjingił, ‘Ok Gos wu endi kindmbii neng sin wu endi omba ni kui enjpin wu, ei nim wałim min?’ ”

21 Kunum ei Jiisas wumb ening kanim kanim pirim wumb kin, wumb ening kis pirim wumb ni, wumb gui kis tok multum wumb ei pei er ka erim. Pe wumb pei ningił tumbun multum ei pei er ka eririm ku.

22 Pe Jiisas ek nipi wu tał ngopu yi nirim, “Elip pe pukuł Jon konu ełe kankił, na ya pe nipe oł erip ek nipe ek nip eramb elip piikił, kankił enmbił ei pukuł, Jon kan ningił peł nim. Wumb ningił kis mułum wumb ei, kenjing. Simb kis mułum wumb, nga ka seng andłam endnjing. Wumb kinj tum wumb ei, ka sim. Wumb kom ngum wumb ei ek piingii neng ek piinjing. Pe wumb kulnjung wumb ei nga ok tonu konj mołmun. Wumb epi endi sinałim wumb ei Gos ek ka ngang piki tołum.

23 Wumb na Jiisas kin pii gii ninjing, en enim pii gii ei mani punerim, wumb ei ka piingii.

24 Jon ek ni kindang onjnguł wu tał nga orung pangił; Jiisas Jon nge ek nipi wumb pei ngopu yi nim. “Ok, enim Jon mułum konu ełe wumb mulenjing konu ełe puk epi nipe endi kenjing? Min enim puk konu pop tang goł kembis ei kenjing min mon? Wu ei goł mił mon?”

25 Enim epi nipe kengii nge punjung? Enim wu endi epi konduk ka wii erpi mułum ei keningii punjung min? Ei mon! Wumb konduk ka wii kindik, en enim ngenj ełe epi ka ełmin ei King ngii owundu ełe minj mołmun.

26 Ba enim puk epi nipe keningii nge punjung? Enim puł wu endi Gos oł ekii se ermba ei nge nipi mułum wu ei kenjing min? Ei keimi; wu ei eim nge kongun ende ek ni tor kindilim wu pei to mani kindilim.

27 Wu ei mendpił Gos nge ek yi ninim, ‘Piini! Na ek se endmba wu endi kindmbii wu ei, na ek ok sipipi nim, kumb se pupu nim andłam ei to ka er sipi mułmba.’ ”

28 Jiisas ek yi nim, “Na ek keimi nip enim ngond, ‘Kunum ełe Jon ya mei ełe wumb pei ei kamb mani kind poru ninim. Ba akip kunum ełe wu endi Gos sinim tep er kanpi mołum oł ei wu wii mił pii gii nim kin, wu ei Jon to mani kindnim,’ ” pa nim.

29 Wumb ek ei piik poru nik, wu amb ni wumb ku takis silmin wumb pei ek yi ninjing, “Gos eim kun ka wii mołum wumb ei Gos noman ełe ekii sengin ok Jon angil ełe wumb noł sipi wumb noł pendpi ngum.”

30 Ba lo ek piilmin wumb kin, lo ek emb tołmun wumb ei Jon angil ełe noł pinenjing yi mił erik, Gos nge noman ełe wumb ei buł ngok kin, andłam andan tum ei si kindnjing.

31 Jiisas ek yi nirim, “Akip kunum ei na enim wumb ekii sinenjing mił wumb sip mondup ei nimbił oł erngii? Wumb ei jili wumb?”

32 Pe wu ombu yi mił, kangil kembis kombur konu endi tuk ełe molk, kangil kembis kombur eipi kin wii tunjung. Tok yi ninjing, ‘Sin mingal kepil tonmun nimbił erang enim golang ninanmin?’ a ninjing. ‘Pe nga sin golang kaimb er

ninmin ei enim ke ninanmin. Ei yi mił en enim noman endi pinałim eipi eipi punum.'

³³ Jon sinim noł pendpi ngołum wu ei tonu om. Eim opu noł wain ni bres ei endi nunerim. Pe enim wumb yi ninjing, 'Wu ei gui kis tuk mołum,' ninjing. Ei mon!"

³⁴ Pe na wu kingam op kuni nop, noł wain nop end. Pe enim wumb molk yi ninjing, 'Wu ei kuni pei minj nołum,' ninjing. 'Wu ei noł wain pei minj nopu,' yi elim niłmin. Nik, 'Eim wumb ku takis siłmin wumb kin wumb oł kis erik ełmin wumb ei kin puł pałim,' pa niłmin.

³⁵ Ba wumb noman ka pałilim wumb, ei yi niłmin. 'Gos nge noman ka ei epi ka wii niłmin.'"

Oł Kis Elim Amb Endi Jiisas Simb Ełe Kopung Erim

³⁶ Lo ek piłim wu endi embe Saimon Jiisas kin ek nipi eim kin kuni numbuł nirim. Eim lo ek piłim wu ei ngii konu ełe pupu kuni no multum.

³⁷ Amb endi oł kis elim amb, konu owundu ełe mułum. Pe amb ei mołpu piim ni Jiisas pupu lo ek piłim wu ngii konu ełe kuni nonum nik. Nengin, piipi kin amb ei eim kopung muru ka ming endi sipi om.

³⁸ Pe eim pupu Jiisas buł morung orung angpi, simb ełe mołup ke nipi mułum. Ke nim ningił ka ei, Jiisas simb ełe purum. Ei kanpi eim peng enjin olt sipi, Jiisas simb ełe kil ngum. Ngopu kin, Jiisas simb ełe kum su sipi er mułum. Mołpu kin, kopung muru ka ni sipi, Jiisas simb ełe kindrim.

³⁹ Lo ek piłim wu ei, Jiisas wii tang om wu ei, eim epi ei kanpi eim noman yi piim. "Wu ei, Gos

oꞗ ermba oꞗ ei, keimi nipi elim kin amb ei piipi mon. Amb ei, yi elim nimba ni piim amb ei, amb oꞗ kis elim.”

⁴⁰ Yi erang kin, Jiisas eim wu noman eꞗe, piinim ek nipi ngumbii ni piim. Piipi kin, Saimon kanpi neng, “Saimon,” yi nim. “Ek mon wu, nim ek ninjii pim ek ei ni!” a nim.

⁴¹ Pe Jiisas ek yi nim “Wu taꞗ, wu endi kin kom ku sikiꞗ, nga ekii se ngo orung kindmbiꞗ ni sikiꞗ, wu endi kom ku 100 pei miꞗ sirim. Nga wu endi, kom ku kum endeim mendpiꞗ sirim. Wu taꞗ kom ku yi miꞗ si ngokuꞗ, pendkiꞗ pirim,” pa nim.

⁴² Wu taꞗ epi endi ngo orung kindngiꞗ pinerang, wu ni kan wiik turum. Yi erang kin, wu taꞗ eim kin noman ngunjnguꞗ wu endi nii eim noman ka wii piipi eim ngumba?”

⁴³ Saimon ek nipi, orung kindpi yi nim, “Na yi ni piind, wumb endi oꞗ kis pei kil ngo si kindmba wumb ei,” pa nim. Neng kin, “Nim ek kun nin,” pa ni Jiisas yi nim.

⁴⁴ Pe eim ak topu amb ei kanpi kin, ek nipi Saimon ngum. “Nim ya amb ei kan min? Na nim ngii konu onj ei, nim noꞗ kulkun, na simb eꞗe noꞗ kindnen; ba amb ei na simb eꞗe, noꞗ kindpi enim ei eim ke nim ke noꞗ sipi na simb eꞗe noꞗ kindnim. Pe eim peng enjin sipi, na simb eꞗe kil ngonum,” pa nim.

⁴⁵ “Nim nam kin kum su sinen. Ba na tuk op muꞗamb, pe amb ei opu, na simb eꞗe kum su sipi enim,” pa nim.

⁴⁶ “Nim nam peng eꞗe kopung kindnen; ba amb ei eim kopung ka wii na simb eꞗe kindim.”

⁴⁷ Yi miꞗ peng kin, na nim kanip nind, “Eim na

kin noman ka ngum. Ngopu kin, nim ei piinjii; eim nge oł kis ei pei elim; ba na eim oł kis kil ngop poru nind, Gos wu endi kin oł kis aninga er kil ngum kin, wu ei Gos noman pei ngunalim; ba aninga ngołum.”

⁴⁸ Jiisas ek nipi amb ei ngum, “Na nim nge oł kis ei si kindin.”

⁴⁹ Wumb eim kin peł ele ende mulnjung wumb ei, en enim ek nik piik piik enjing. Nik ek dinga nik, “Wu ei nii, wumb oł kis ei kil ngonum?”

⁵⁰ Jiisas ek nipi, amb ei ngopu yi nim, “Amb, ninim nge pii giı je erpi, nim si orung sinim. Pe nim pukun, noman emin ka peng mulnjii.

8

Amb Kombur Jiisas Pum Konu Ele Tep Tok Punjung

¹ Pe nga Jiisas konu owundu ni konu kembis andpi Gos ek ka nipi wumb ngopu, Gos sinim tep er mołum mił ei nipi wumb ngum. Jiisas eim nge ekii siłmin wu engki nga tał eim kin andik mulnjung.

² Pe amb kombur ok, ening pim amb ombu ni, gui kis tuk mołum amb ombu, Jiisas er ka eririm. Amb ombu, Jiisas pum konu ele punjung ku. Amb endi ‘Mariya’ niłmin, ei ‘Mariya Makandala,’ pa niłmin. Ok Jiisas eim amb ei, gui kis angıł orung nga tał pei tor kindrim.

³ Pe Jo Ana, Susa nge ambim wu ei King Eros ngii ele tep er mołulum ei, eim embe Susana. Pe Susana ni amb pei onjung ku. Amb ombu puk,

Jiisas kin, Jiisas nge ekii silmin wu ombu, kom ku paki tok elmin amb ombu, ouni puk ku.

*Pe Ek Ekin Wu Endi Kuni Emb Kindim Ek Poł
(Masyu 13:1-9, Mak 4:1-9)*

⁴ Wumb tilap owundu endi ok, kulou tunjung wumb ei, konu owundu eipi eipi wumb pei Jiisas mułum konu ele onjung. Wangin kin, Jiisas ek ekin endi topu nipi ngum.

⁵ “Wu endi kuni wiis emb sipipi emb kindrim ei kombur wumb andlam endik konu ele mani pang, wumb kimbangin, kei ok nok nok enjing.

⁶ Pe kuni wiis emb kombur pupu, mei ku mułum konu ele mani pum. Pe kuni wiis ei sikir tonu om, ba mei noł muł erang, kuni ei kulii erpi, kolpu poru nim.

⁷ Pe kuni wiis kopur, pupu kan gał pim konu ele mani pum konu ele, kan gał mul ei tonu opu, kuni wiis ei to mani kindim.

⁸ Pe kuni wiis emb kombur mei ka ele mani pum ei sikir tonu om. Opu kin, kuni wiis pei topu mułum. Tum, ei 100 pei pei kuni wii yi tonu mułum.” Jiisas ek yi nipi ek dinga wii nim, “Wu endi kom pimba, wu ei kom sepi ek ei piyangli!”

⁹ Jiisas eim nge ekii silmin wumb ei, ek ekin topu ninim, “Ek ei, pułe piimin nik kii sinjing.

¹⁰ Pe eim yi nim, “Gos sinim tep er mułum mil ei eim ek koi er palim ek ei piipi kin nipi enim ngonum. Ba torung wumb eim ek ekin top nim ek ei mendpil piinjing, ba ek ekin ei pułe pii poł tunenjing. Tunarik kin, en enim konu orung orung kind keningii, ba epi endi kinenjing. Pe nga ek ei pingii, ba pułe piinerngii mon!” pa nirim.

11 “Ek ekin tum ek puḷe yi paḷim. Kuni wiis mong ei Gos nge ek.

12 Pe kuni wiis kopur pupu andḷam eḷe mani pang kin, wumb andik kambinmin ei Gos ek wumb piinmin, ba nga Seisen opu Gos ek ka ei topu eipi kindnim. Eim yi piinim, wumb Gos kin pii gii nengin kin Gos sipi orung simba ni piipi enim.

13 Pe kuni wiis emb kombur pupu, mei ku muḷum konu eḷe mani pum, ba dumbuḷ mer mei eḷe mandring punaḷim mon. Puḷe yi miḷ wumb Gos ek piik sik, noman eḷe kindik ka moḷuḷmun. En enim pii gii dinga ninarik muḷangin kin, epi embin tui endi tonu oḷum ei, wumb en enim dinga muḷalmin kin, bok toḷmun.

14 Pe kuni mong kombur pupu, kan gaḷ muḷum konu puḷ eḷe mani pum ei wumb Gos ek ka piik, nga kongun erik, ba mei eḷe epi kanim kanim noman peng, kom ku ni epi ka wii ka ka piik, yi er muḷangin kin Gos ek ei piinarik, to mani kindinmin. Yi erangin kin, en enim kongun ei tonu opu mong tunenim mon, ba mani pupu koltum.

15 Ba kuni wiis mong kombur, pupu mei ka eḷe mani pum ei yi miḷ; wumb Gos ek piik, ambii gii nik mulnjung. Molk kin, en enim noman dinga peng, kongun kunum kunum yi erik mulnjung ei, kuni wiis mong pei tum miḷ yi er mulnjung.

Dup Alam Ek Ekin Endi
(Mak 4:21-25)

16 Wumb endi dup alam kaḷpi, ming eḷe mani kind pendmba min? Dup alam kaḷp peḷ mandring pendmba, ei kapli tiḷang erip tor omba min?

Ei mon! Dup alam kalk tonu peł ęle sengin kin, wumb kanik nirik puk anda ok yi erngii.

¹⁷ Epi pei nim kinan koi er salim ei, ekii se kenjii wumb nii oł pei koi er pendmba ei ekii se, wumb eim pii poł tungii.

¹⁸ Enim kan kun er molk, ek ka piik erngii. Wu endi eim noman dinga peng, eim piipi kun er mołpu pii gii nipi mułmba, wu ei Gos nga eim dinga ngumba. Nga wu endi eim noman ka ni oł kun ka ombu piipi kun enarpi mułmba wu ei, Gos wu ei noman ka ni oł kun aninga pimba ei Gos sipi orung sipi si kindmba.

¹⁹ Kunum ęle Jiisas nge mam ni angim noł ok, ba wumb konu ęle piki topu peng kin, wumb ei mulk konu tuk ongii konu endi sineririm.

²⁰ Wumb kombur molk yi nik, “Jiisas nim nge wumb, manim ni angnim noł ok, nim kenmin nik anda mołmun,” pa nik.

²¹ Ba Jiisas ek nipi orung kindpi yi nirim, “Wumb Gos ek ka ei piik, ekii singii wumb ei, na nge engnan noł ni, minan noł mułngii,” nirim.

Jiisas Ek Neng Konu Pop Owundu Tum Ei Poru Nim

(Masyu 8:23-27, Mak 4:35-41)

²² Kunum ęle Jiisas kin eim ekii silmin wumb, noł kanu endi ęle puk. Pe Jiisas ek yi nirim, “Sinim noł gop mołum konu ęle orundung pamin!” nirim. Neng, noł tuk ęle puk.

²³ Pe noł kanu sikir pang kin, Jiisas eim or pirim. Konu pop owundu endi noł gop ęle pop owundu endi turum. Topu, noł mer kanu ęle tuk pang, wumb kułngii kunum mandi eririm.

²⁴ Pe wumb en enim puku sik andik Jiisas or pirim konu ełe to konj kindik yi nik, “Owundu! Owundu! Sinim kułmun pałim,” pa nik. Pe Jiisas eim angpi konu pop owundu ei kin, noł topu tonu omba eririm ei ek dinga nipi ngurum. Ngang kin, konu pop kin noł owundu tumba eririm ei wii sirim. Noł ołup enerim, wii pim.

²⁵ Pe Jiisas eim ek nipi, eim ekii siłmin wumb ngum, “Enim pii gii ei konu jiki pum?” Yi neng kin eim ekii siłmin wumb en enim mund mong tok noman embin tang mołmun. Molk kin, yi nik, “Wu ei nii? Eim ek nipi konu pop kin noł ei ek neng, eim ek ei piinmbi!”

*Wu Wulu Endi Ei Gui Kis Pim, Jiisas Tor Kindim
(Masyu 8:28-34, Mak 5:1-20)*

²⁶ Ekii se Gerasiin konu ełe tor punjung. Galilii konu noł gop ełe orundung sipim konu ei, orung sim.

²⁷ Jiisas eim noł kanu si kindpi tor pum. Pang kin, konu ełe wu endi eim mułum konu ełe tor om. Wu ei gui kis kombur eim kin mułum. Wu ei kumb ok eim alap pandi topu tilałim mon! Eim ngii endi pinałim mon ku. Eim pupu wumb guimeng ełe pu pałim.

²⁸ Wu ei Jiisas kanpi, eim ek dinga nipi wii tum. Topu kin, Jiisas simb ełe mani pupu pim. Pepi ek nipi, wii dinga topu yi nim, “Jiisas, nim Gos Owundu mendpił kingam. Sinim kongun ende enałmin mon. Nim na kin nimbił oł enjii on? Na nim kin prei ermbii, ei nim na ngenj kumbii ngunenjii mon!” pa nim.

²⁹ Gui kis ei ek yi nim. Nimbił erang Jiisas eim ek dinga nipi wu ei kin si kind kin tor punjii nim. Eim ek nim mił erim. Kunum kunum gui kis ei, wu ei kin mołum. Pe wumb wu ei ambił gii nik, kan tok angil ełe, kan tok er pendilmin ei, wu eim to kilip tołum. Pe gui kis ei yi erpi mił wu ei si mengpi wumb mulałmin konu ełe si pang, eim mołum.

³⁰ Jiisas wu ei gui kis mułum wu, ni ek nga ngopu kii sim, “Nim embe nii?” Pe eim yi nim, “Na embe, ‘opu ond wumb,’ ” nimbił erang, gui kis pei eim kin pei mołumun.

³¹ Pe gui kis ombu wii dinga tok yi ninjing, “Jiisas nim sin konu kis ełe kindnenjii!”

³² Kung tilap pei konu komung endi ełe mandi kuni nok er mołmun. Yi nik kin, gui kis ombu Jiisas kin wii tok ek dinga ninjing, “Nim kapli sin kung ombu kin pei! Neng kin, bin,” ninjing. Pe Jiisas wak tang, punjung.

³³ Gui kis ombu wu ei si kindik, kung mulnjung konu ełe tuk punjung. Pe kung ombu andlam dinga sikirik puk konu kis endi ełe punjung. Punjung, konu ei noł gop ełe tuk puk noł nok kulnjung.

³⁴ Kung es tok mulnjung wumb ei, oł ei kanik tungu erik punjung. Puk kin, konu kembis ni konu owundu sim konu wumb kanik ninjing.

³⁵ Pe wumb pei puk, erim oł ei kenmin ni punjung. Puk kin, kenjing ni Jiisas kin wu gui kis mułum wu ei kin, mulnjunguł ei kenjing. Wu ei gui kis pei eim si kind pangin, eim alap tałpi mułum kenjing. Pe eim noman ka peng, eim Jiisas mułum konu ełe simb ełe mani mułum. Wumb pei

onjung wumb ei kanik mund mong enjing.

³⁶ Kung es tołmun wumb ei ok kanik puk, wumb ei Jiisas wu ei kin erim oł ei ek poł tok er mulnjung. Ok eim gui kis eim kin mułang, Jiisas opu gui kis topu tor kindang, wu ei er ka erim.

³⁷ Gerasiin konu ełe wumb pei onjung. Wumb ei ek nik Jiisas ngunjung, “Nim, sin konu ełe si kindkin pui!” pa ninjing. Wumb en enim mund mong erik ninjing. Nga Jiisas eim noł kanu endi ełe tonu pupu, orung bii ni pum.

³⁸⁻³⁹ Gui kis wu ei si kind punjung wu ei eim prei erpi yi nim, “Jiisas, na nim kin tep to bii,” pa nim. Ba Jiisas wu ei, “Orung pui!” nipi yi nim. “Ni ninim ngii konu ełe orung pukun, Gos owundu nim kin nimbił oł erim, ei nikin wumb ngunjii,” pa nim. Yi neng kin, wu ni orung pupu wumb konu owundu ełe pupu Jiisas eim kin nimbił oł erim ei nipi wumb pei nipi ngum.

*Jiisas Wu Num Ei Ambılam Er Ka Erpi Nga Amb Eim Kon Embılim Ei Er Ka Erim.
(Masyu 9:18-26, Mak 5:21-43)*

⁴⁰ Pe Jiisas noł gop nga orung wang kin, wumb pei ka piinjing. Nimbił erang wumb Jiisas orung omba ni piik kui er mulnjung.

⁴¹ Pe wu endi om wu ei embe Jairas. Wu ei eim wu num endi, eim Jura wumb men ngii tep erpi mołulum. Wu ei Jiisas simb ełe mandi mani pupu, prei erpi ek dinga nim. “Nim na ngii konu ełe onjii!” pa nim.

⁴² Wu ei eim ambılam endeim mendpił multum ambıł ei kung ngii engki nga tał multum. Multum, ambıł ei kulmba mandi erim.

Pe Jiisas Jairas ngii konu eġe bii nipi andġam eġe pang kin, wumb pei eim pum konu eġe ambil gii nik punjung.

⁴³ Pe amb endi muġum amb ei eim kung ngii engki nga taġ, ei pei eim miyem o tor minj pupu muġum. Pe wumb endi eim miyem o tor pum, ei er ka erngii wumb endi mulenjing mon.

⁴⁴ Pe amb ei Jiisas muġum konu eġe mandi om. Opu, eim Jiisas kon takis eġe minjin tamb kin, “Nam nge miyem tor pum ei kep ermba,” ni piim. Pe opu yi erang kin, sikir miyem tor pum ni kep erpi nga tor onerim mon, ka muġum.

⁴⁵ Pe Jiisas ek yi nim, “Wumb nii na kon takis ei minjin tonum?” Pe wumb pei molk, “Na mon! Na mon!” pa ninjing. Piisa ek yi nim, “Owundu, wumb tilap pei nim kin moġun konu eġe angik moġmun. Ei sin er kan poġ tumun miġ nenj?”

⁴⁶ Ba Jiisas ek yi nim, “Wumb endi na minjin tang piinj. Piyamb kin, na dinga kombur tor pang piinj,” pa nim.

⁴⁷ Nga amb erim amb ei koi ermba miġ pinerim, Jiisas eim piim. Yi peng kin, amb ni opu, Jiisas muġum konu eġe mani mei eġe kan mani kanpi muġum. Muġang kin, wumb pei kumb eġe eim Jiisas kon takis minjin tang ek ei puġe nipi wumb pei mulnjung konu ni tor kindim. Kindpi yi nim, “Na oġ ei eramb kin na ening ei sikir poru ninim,” pa nim.

⁴⁸ Pe Jiisas ek nipi amb ei ngum, “Nim pii gii je ninim er ka enim, nim orung pukun, ninim noman emin ka seng punjii!” pa nim.

⁴⁹ Pe eim ek nipi muġang kin, wu endi om. Om

wu ei Jairas wu num Jura men ngii tep elim wu num ei ngii konu eŕe wu ei muŕpu om. Opu, yi nim, “Wu num! Nim ek mon wu owundu ei kongun dinga ngunenjii! Nim ambilaŕanim ok kuŕum,” pa nim.

⁵⁰ Ba Jiisas ek ei piipi, ek dinga nipi orung kindim, “Nim mund mong tunenjii! Nim pii gi nen, ninim ambilaŕanim ei konj muŕmba,” pa nim.

⁵¹ Pe Jiisas wu ei ngii konu eŕe pum. Wumb punjung ei kan wiik tang nirik onerngii, mon nim. Jiisas kin Piisa ni Jon, Jeims ni eim arim mam taŕ mendpiŕ nirik punjung. Wumb ei mendpiŕ eim kin nirik punjung.

⁵² Wumb pei en enim ambilaŕ ei nge nik ke dinga nik mulnjung. Jiisas opu ek nipi wumb ngopu yi nim, “Ambilaŕ, ei mendpiŕ kulerim mon, ba eim or miŕ palim,” pa nim.

⁵³ Pe eim ek nim ei wumb kanik tokuŕ enjing. Nimbiŕ erang, ambilaŕ eim kuŕum poru nim, wumb ei kanik tokuŕ enjing.

⁵⁴ Ba Jiisas ambilaŕ ei angilaŕ ambilaŕpi, ek dinga nipi ngum, “Ambilaŕ kembis, nim engii!” a nim.

⁵⁵ Pe ambilaŕ ei noman konj opu eim kin tuk wang, eim sikir engim. Engang kin, Jiisas yi nim, “Enim kuni endi ambilaŕ kembis ei ngei!” pa nim.

⁵⁶ Pe ambilaŕ kembis ei arim mam taŕ puku sinjngilaŕ. Ba Jiisas ek dinga nipi wumb taŕ ngum, “Eŕip wumb kankilaŕ na oŕ endi ei, kankilaŕ ninerngilaŕ mon!” pa nim.

9

Jiisas Eim Ek Se Andilmin Wu Engki Nga Tal

*Eim Kongun Kindang Puk.**(Masyu 10:5-15, Mak 6:7-13)*

¹ Pe Jiisas eim nge er se endilim wu engki nga tał wii tum. Wangin kin, eim noman dinga wu ombu ngopu kindang puk kin wumb gui kis to kindik, ening pimba wumb ei er ka erik, erngii pa nipi, eim nge noman dinga ngopu kindim.

² Wu ombu kindang, puk wumb kanik Gos ek ka nik wumb ngok, nga Gos sinim tep er mołum ek ei nik, wumb ening pimba ei nengin wii mułngii pa nip kindang punjung.

³ Pe eim ek nipi wu ombu ngum, “Enim andłam turii pungii pendik, siłmin epi ei sinerngii. Pe dolu ni, kon kembis ni kom ku ni, kuni bres ni, epi endi sipnerngii. Konduk tał er sipnerngii mon!” pa nim.

⁴ “Enim puk konu endi tuk puk, ngii endi mułngii ngii ełe minj mułngii. Molk kin, ek nik wumb ngok er molk poru nik. Nga ekii se enim ngii konu ełe pinjing konu ei si kindik pungii.

⁵ Pe nga enim konu eipi pangin wumb enim ngii konu ełe sipnarik enjing kin, enim konu ełe si kindik pungii. Puk kin, mer simb ełe mei kułman mułmba ei tami to kindik pungii. Yi erik pangin kin, wumb en enim enjing oł ei piingii,” pa nim.

⁶ Yi neng kin, wu ombu puk konu pei andik punjung. Puk kin, Gos ek ka ei nik wumb ngok, wumb ening pepi erim, ei er ka erik punjung.

⁷ King Eros eim mołpu Jiisas nge ek ombu pei piipi, eim noman embin to piim. Nimbił erang wumb kombur molk, “Jon wumb noł pendilim wu mer tukpu ełe tonu onum,” ninjing.

⁸ Pe wumb kombur yi ninjing, “Ok ek ni tor kindilim wu endi Elainja tonu onum,” ninjing. Nga kombur, yi ninjing, “Ok Gos oł ekii se ermba oł ei piik niłmin wu ni nga endi onum,” pa ninjing.

⁹ Wumb yi nengin kin King Eros yi nim, “Na Jon peng ei kołmung enj, ba ek ei er piik ninmin mił nenj nipi opu kin, ‘Jiisas kenmbii,’ ” ni piim.

Jiisas Wumb 5,000 Pei Kuni Ngum

(Masyu 14:13-21, Mak 6:30-44, Jon 6:1-14)

¹⁰ Jiisas nge ek se andilmin wu orung ok, en enim erik oł ombu Jiisas kanik ek poł to nguk. Pe Jiisas wu eipi ombu si kindpi, en enim mendpił Beseira konu owundu ełe punjung.

¹¹ Ekii se wumb eim ek ei piik, eim pum konu ełe ekii se punjung. Eim pum konu pangin kin, eim ka piim. Piipi, eim Gos sinim tep er mołum, ek ei nipi ngum. Ngopu, wumb ening pim wumb, ei er ka erim.

¹² Ekii se pou neng, eim nge er se andilmin wu engki nga tał, orung ok yi ninjing, “Nim wumb ombu kindan, en enim konu orung pungii. Puk kuni simba, kan sik nungii,” pa ninjing. “Ya konu ełe sinim mołmun, konu ei kuni sinalim mon. Nga wumb konu ełe mulałmin.”

¹³ Ba Jiisas ek yi nim, “Enim kuni endi wumb ei ngungii. Kuni endi sałim min?” Pe eim nge er se andilim wumb ombu yi ninjing, “Sin kuni endi sinalim. Ba bres angil orung kin omu tał, ei mendpił sałim,” pa ninjing. “Pe sin pei kapli pupun, wumb pei ombu nge kuni pei top ermin min?”

¹⁴ Wumb pei mulnjung wu ei 5,000 yi pei mulnjung. Jiisas eim nge er se andilim wumb

kanpi nim, “Enim wumb kułou konu eipi eipi wumb 50 mił to munde!” pa neng yi enjing.

¹⁵ Jiisas nge er se andilim wu ombu, eim nim mił yi enjing. Erangin kin, wumb pei mani mulnjung.

¹⁶ Jiisas eim bres angil orung ei sipi, omu tał ei sipi, ei epin konu ełe kanip, Gos kin prei erim. Erpi, bres engin topu, eim er se andilim wu ombu ngum. Nga eim er se endim wumb sik, kuni mok tok wumb pei mulnjung wumb ei ngunjung.

¹⁷ Pe kuni ngunjung kuni ei, wumb pei nunjung. Pinang pang kin, kuni orung pei mułum ei sik gerenj kon engki nga tał to piki tunjung.

¹⁸ Kunum endi, Jiisas eim mendpił prei er mułum. Pe eim nge er se andilim wumb ei eim kin ouni mulnjung. Mułangin kin, Jiisas ek nipi, wu ombu kii sim. “Wumb na nii, pa ninmin?”

¹⁹ Wu ombu ek ni orung kindik yi ninjing, “Wumb kombur, nim Jon wumb noł pendilim wu pa ninmin. Nga wumb kombur, nim wu Elainja pa ninmin. Nga wumb kombur yi ninmin, ‘Gos oł ekii se ermba ei, piipi nilim wu ok kultum, nga konj tonu onum, ninmin,’ ” pa ninjing.

²⁰ Pe Jiisas ek nipi, eim er se andilim wu ombu ngopu yi nim, “Enim na nii pa ninmin?” Piisa ek nipi orung kindipi yi nim, “Nim Gos kindim wu Krai, mendpił mołun,” pa nim.

Jiisas Eim Kołpu Nga Ngenj Kumbii Sipi Ermba Nge Nim

(Masyu 16:20-28, Mak 8:30-9:1)

²¹ Pe Jiisas ek dinga nipi eim nge er se andilim wu ombu ngum, “Enim wumb endeim, endeim kanik, ek ei ni tor kindnerngii, mon!” nipi ngum.

²² Pe eim ek yi nim, “Na Wu Kingam ei, ngenj kumbii kułmbii,” pa nim. Kułmał kałımin wumb owundu ni, lo ek połmun wumb pei, na kin buł ngungii. Ngok kin, na to kundngii. Kundangin kin, na mei konu ełe kunum tekliki pimbii. Pep, nga angip tonu ombii,” pa nim.

²³ Jiisas ek nipi, eim nge er se andıim wumb ngum, “Pe wu endi na kin ekii simbii ni piimba wu, ei eim noman ełe oł kanim kanim ermbii nipi piimba noman ei to mani kindpi, kunum kunum eim ngenj kumbii sipi, kongun dinga erpi, endmba ei yi mił eim ond peri ei kan sipi andpi, na ekii simba,” pa nim.

²⁴ “Wu endi eim noman ełe er endmba wu ei, eim noman konj am ba. Pe wu endi na nge noman piipi, eim noman ełe to kundmba ni erim, ei eim noman konj punermba; ba eim kunum kunum konj mułmba.

²⁵ Pe wu endi eim, kongun owundu erpi, eim mei epi pei simba wu, ei eim noman konj am ba. Pang kin, mei ełe epi, ei opu, eim paki tumba mił nenj? Ei kaplı enanim.

²⁶ Pe wu endi na ek ni tor kindnermba; eim na kin buł ngang piipi, yi ermba wu ei, na Gos kindang na mani op wu kingam moł; na wu ei kin buł ngop piimbii ku. Wu kingam eim nge tiłang owundu kin, eim nge arim Gos kin, Gos nge enjel ka wii ouni ongii kunum ei, eim kin yi ku erngii.

²⁷ Na ek keimi nip enim ngond, ‘Wu kombur ya ełe angımin wu ombu, ei kulerngii. Nga molk kin, Gos sinim tep er mołum ei nge noman dinga ei keningii.’ ”

*Jiisas Nge Ngenj Ei Kanim Eipi Mił Pim
(Masyu 17:1-8, Mak 9:2-8)*

²⁸ Jiisas ek ei nipi, mułang kunum angil orung nga tekliki poru neng, eim Piisa, Jon ni Jeims sipi, eim prei ermbe nge, komung endi ełe tonu punjung.

²⁹ Eim prei er mułang kin, eim kumb ningil ei eipi mił kułum. Eim konduk ni kupu kuru mendpil mił tilang erim.

³⁰ Pe wu tał eim kin tor okuł, ek tang mulnjung. Sin ok kupenjpın noł wu tał ei Moses kin Elainja teł kin ek tengnjing.

³¹ Wu tał tilang owundu erim konu tor okuł, Jiisas Jerusalem konu oł endi ermbe ei nikił, nga Jiisas mei ełe si kindpi ba, ei nikił enjngil.

³² Pe Piisa kin eim angim tał, ningil se andpi erang kin, mani pu pingii pim. Ba yi er mułangin kin, Jiisas nge tilang owundu ni wu tał tilang owundu mulnjung konu ełe erim.

³³ Wu tał Jiisas mondkuł si kindkił punguł enjngil. Pe Piisa ek dinga nipi yi nim, “Wu Owundu, sinim ya mołmun ei ka; sin ngii wii tekliki ełe tekmin. Ngii endi nim nge, endi Elainja nge, endi Moses nge,” pa nim. Ba Piisa eim ek ei pii poł tunarpi nim.

³⁴ Pe ek ei nipi mułang kin, konu kupu endi opu, wu kei kin peli erim. Erang kin, kon kupu ei en enim pandi tang kin, mund mong enjing.

³⁵ Konu kupu peli erim, konu tuk ełe, ek endi tor om. Ek yi nim, “Ei na kangi, na eim noman ngop moł. Enim eim nimba ek, ei piingii,” pa nim.

³⁶ Ek tor om, ei poru neng kin, kenjing ni Jiisas

eim, endeim mendpił mułum. Mułang kin, en enim ek tinenjing. Ekii se kunum ei wu kei epi endi kaninmin pa nik, yi ninenjing mon.

*Kangi Endi Gui Kis Mułum Ei Er Ka Erim
(Masyu 17:14-18, Mak 9:14-27)*

³⁷ Kupiiring komung ei si kindik, mani punjung. Puk, kenjing ni wumb tilap owundu endi andlam ełe ok Jiisas kan sinjing.

³⁸ Wumb onjung konu, tuk ełe wu endi om, wu ei wii dinga topu yi nim, “Owundu! Na nim kin prei end, nim na kangil ei kenjii. Na kangil endeim mendpił mułum.

³⁹ Gui kis endi, eim ambil gii nipi, sikir wii topu yi elim. Pe gui kis ei, ol kis eim kin elim. Erang kin, jipambil kuru endi eim gupu ełe tor olum. Pe gui kis ei ngenj tuk, er kis mondpu, eim tor punalim,” pa nim.

⁴⁰ “Pe nam nim nge, er se andilim wu ombu kanip nemb, to tor kindngii, nemb puk; ba nim nge er se andilim wumb ei enjing kapli enerim mon!

⁴¹ Jiisas ek dinga nipi, orung kindpi yi nim, “Enim wu amb pei kunum ełe, enim pii gii dinga ninanmin. En enim noman ełe kun pinalim. Kunum nimberii na enim kin mołup ol embin tui ei nge, er kun er mułmbii? Nim kangil ei ya tu wa!”

⁴² Pe eim kangil ei andpi wang kin, gui kis ni elim ol ei erang, kangi ei olkup topu kindang, am pupu bok kis topu pim. Ba Jiisas eim gui kis ei ek dinga ngopu kindpi, kangil ei er ka erpi, arim mułum konu ngo orung kindim.

⁴³ Wumb pei molk kenjing ni, Gos nge noman dinga ele oł ei erang, wumb puku sik enjing. Nga epi pei erim ele nge, enim embin to piinjing.

Pe Jiisas eim er se andilim wumb kanpi, ek dinga nipi ngum.

⁴⁴ “Enim kom ka sek, molk ek ei piingii. Kunum kinan mon; pe nga wu Gos kindang mani opu wu kingam ei, wu kombur sipik, wumb pei angil ele ngungii.”

⁴⁵ Ba eim er se andilim wumb, en enim ek nim ek ei, pule pii poł tunenjing. Tunarik kin, nga ek ei pule koi er pim. En enim mund mong tok Jiisas kin ek ei kii se piimin, min mon ni piik muljung.

Nii Owundu?

(Masyu 18:1-5, Mak 9:33-37)

⁴⁶ Jiisas nge er se andilim wu ombu, en enim ek mił enjing. Erik, yi ninjing, “Sinim mołmun, tuk ele wu nii owundu mułmba?”

⁴⁷ Pe Jiisas eim yi piim, en enim noman tukrung yi pałim, ni kenim. Kanpi, eim kangil kembis endi tu wum. Kangi ei eim kin tep to engim.

⁴⁸ Jiisas eim ek nipi yi nim, “Wumb endi kangil ei kanpi nam kangil ni piipi paki tumba, ei yi mił eim na paki tum ku. Pe wu endi na paki tumba, ei Gos Owundu na kindrim wu ei paki tumba ku. Kangil kembis tuk mołum ei mił wumb endi yi erpi kangil kembis noman pałim mił, yi peng na kongun yi erpi mułmba ei wu owundu mendpił.”

⁴⁹ Pe Jon ek ni orung kindpi yi nim, “Owundu, sin kenjpin wu endi nim nge embe ele nipi gui kis piim wu ei to tor kindrim. Ba eim sinim andinmin

konu eġe ekii se onanim. Sin yi nipin kin mon ninjpin.”

⁵⁰ Ba Jiisas ek nipi eim ngum, “Enim mon nik yi enerngii mon! Wu endi enim kin ek ka nipi ermbe, ei enim opu orung wu mon!”

⁵¹ Gos eim Jiisas sipi, ei tonu nga orung simba, kunum ei mandi erim. Yi erang kin, Jiisas noman dinga kindpi Jerusalem konu eġe ba erim.

⁵² Jiisas eim ba pendpi, wu kombur ok puk, wumb kanik ningii nge, nipi kindim. Pe wu ombu ok puk, Sameriya konu eġe ok tuk puk, eim omba nge er kun er mulnjung.

⁵³ Ba wumb konu eġe wumb, en enim ngii konu Jiisas sipngii kis erang piinjing. Nimbiġ erang, wumb en enim yi miġ piinjing; Jiisas Jerusalem konu eġe ba onum ni piinjing.

⁵⁴ Pe Jiisas nge, er se andiġim wu taġ, Jon kin Jeims teġ Sameriya konu eġe wumb oġ ei kankiġ orung onmbuġ, ek nikiġ Jiisas ngunjnguġ. “Owundu! Nim er piin miġ nenj? Sin ei epin konu eġe dup opu wumb ombu nangġi nimin min?”

⁵⁵ Ba Jiisas kan ak topu, wu taġ kanpi ek ngum.

⁵⁶ Ek ngang kin, nga konu eipi endi punjung.

*Wumb Endi Jiisas Kin Ekii Singii
(Masyu 8:19-22)*

⁵⁷ Andġam eġe andik puk, pangin kin, wu endi tor opu ek yi nirim, “Nim pe punjii on konu ei na bii. Nim konu eipi endi punjii konu ei, na bii ku.”

⁵⁸ Jiisas ek nipi wu ei ngum, “Owu simbii ei mei tukpu eġe or paliġmin. Nga kei ei ngii salim. Ba mei mani opu wu kingam ei, peng sipi or pimbe konu

ele sinalim,” pa nim. “Pe nim na kin kii yi sikin ekii simbii nin, ei ninim pii pol ton min?”

⁵⁹ Pe wu endi eipi kanpi, ek dinga nipi ngum, “Nim na ond konu ele ekii se wa!” nim. Wu ei ek yi nim, “Nim na kapli pup arnan kulum ei, tukpu top pendip ombii min?”

⁶⁰ Pe Jiisas ek nipi wu ei ngum, “Wumb na noman konj sinanim ei wumb kulii mił mołmun ei kapli wu ei tukpu tungii; ba nim pukun wumb kankin, Gos sinim tep erpi, mołum mił ei ninjii,” pa nim.

⁶¹ Wu endi opu yi nim, “Owundu! Na kapli, ok pup nam nge wumb tilap ei, angil sip pendip kin, na nim kin ekii sip ombii min?”

⁶² Pe Jiisas ek yi nim, “Wu endi eim andlam kun bii ni pupu, nga kan orung kindpi, nga na noman palim mił er nimba wu ei Gos sinim tep er mołum kongun palim ei kapli enermba mon!”

10

Jiisas Wu Engki Angil Orung Nga Tal Gos Kongun Ele Kindim

¹ Ekii se Owundu eim wu nga engki angil orung nga tal to tonu kind mondpu, eim wu tal tal ni kindang punjung. Ei ekii se eim omba konu ele ok ni kindang punjung. Eim wu ombu puk konu owundu ni, konu wii ni pei nipi kindim. Ekii se eim konu ombu pei andpi ba nge piipi nim.

² Kindpi yi nim, “Kuni pei pol top mołum, ba kongun wu pei mulamin. Yi piik kin, enim kuni arim ei kin prei kunum kunum er mulangin kin,

kuni arim eim kongun wu pei kindang kuni kułou tungii nge pungii,” pa nirim.

³ “Piinmin! Enim pei! Na enim kung siip-siip wał mił tuk owu simbii mulnjung konu ełe kindind.

⁴ Enim ku kon min simb su min kon erik se mołmun ei mendpił sipngii. Enim epi eipi endi sipnerngii. Andłam ełe puk wumb kin ‘Wei!’ a ningii; ba enim ek kinan tangk yi erik mulerngii mon!” pa nim.

⁵ “Pe enim puk, wumb ngii endi ełe, nirik punjung kin, ok enim ek yi ningii. ‘Enim ngii ełe wumb noman emin seng mułngii!’ ek yi ok ningii,” pa nim.

⁶ Pe wu endi eim noman emin peng, ngii ełe mułum kin, eim ek noman emin ningii ek ei wu ełe kin ba, min wumb endi noman yi pim endi mulenjing kin, enim noman emin ningii ek ei; nga en enim kin orung wang kin, ‘Enim kin noman ka pimba; ba wumb ei kin noman ka piinenmba, mon!’

⁷ Pe en enim konu endi tuk puk kongun erangin kin, nga wumb endi enim ngii konu ełe sipik kuni mok to nungii kuni ei minj. Nga ngii endi puk, endi puk enerngii mon.

⁸ Nga enim ngii ełe minj molk, kuni ni, noł ni, nipi epi endi ngungii ei nungii minj. Nimbił erang kongun enmin wumb ei ku kaplı silmin enim ngii ełe puk yi enerngii mon!

⁹ Wumb kombur ening tang, piingii ei er ka erei! Erik yi ningii, ‘Gos sinim kin tep erpi mołum, kunum ei ya mandi onum,’ pa ningii.

¹⁰ Pe enim konu owundu, endi tuk pangin kin,

wumb enim sik ngii konu ɛle sipnarik, ninjing kin, enim puk andlam wer konu owundu ɛle angk, molk, ek yi ningii.

¹¹ 'Enim nge kulman, sin simb ɛle mułum, ba nga en enim kin orung kindinmin. Ba enim piik kun erngii, Gos sinim tep er mołum, omba kunum mandi enim.'

¹² Na enim kanip nind; kunum poru nimba kunum ei, Sorom konu ɛle oł embin tui tonu orum ya konu ɛle tonu onermba. Ba konu ɛle oł embin tui owundu mendpił tonu omba.

*Konu Owundu Kombur Wumb Noman Ak Tunanmin Ei Kaimb
(Masyu 11:20-24)*

¹³ Enim Korasin ni Beseira konu ɛle wumb piik kun er mułngii. Pe na jep oł yi enim kin enj oł ei Sairon konu ɛle kin Taiya konu ɛle ok yi ɛłamb kin, wumb ombu molk, kon mił epi geltii kend munduk, dup sik ɛle molk sik, pakik andan tok, en enim oł kis buł ngok, noman to ak tunjung ni wumb, keningii nik yi ɛłmin.

¹⁴ Gos wumb mok tumba kunum mandi ermba ei, Taiya kin Sairon konu ɛle oł embin tui, tonu orum ei kembis. Ba akip oł embin tui, enim kin tonu omba ei, owundu tonu omba. Nimbił erang, enim noman ak tunenjing.

¹⁵ Pe enim Kapaniyam konu ɛle wumb ei, epin konu ɛle ambilk tonu pungii erngii ei mon! Ba enim dup konu ɛle mani pungii."

¹⁶ Pe Jiisas ek yi nipi, eim nge er se andiim wumb ngum, "Wu endi enim ningii ek ei piipi nim kin, ei na ek piimba. Wu endi enim kin, buł ngopu nim kin, ei na kin buł ngonum ku. Pe

wu endi na ek piinarpi; buł ngopu mułmba ei, Owundu na kindang onj ei, eim kin buł ngumba ku,” pa nim.

¹⁷ Ekii se wu engki angil orung nga tał, 70 pei orung ok, ka piinjing. Jiisas kanik yi ninjing, “Owundu! Nim embe ele nemin, gui kis ni ombu, sin ek piik, ekii sik tor punjung,” pa ninjing.

¹⁸ Pe Jiisas Seisen eim dinga poru nipi yi nim, “Na mołup kenj ni, Seisen ei epin konu ele kupu kuru mił, boi ni mani om. Opu, gur gałi owundu nipi kumb kinang erim.

¹⁹ Enim piyei! Na enim dinga ngunj. Ngamb kin, enim ka wembii ni epi, enim kin tumbii ni ermba, ei eim piik kanik, enim opu orung wumb ongii ei, enim to mani kindngii. Enim pungii konu ele epi endi, enim to mani kindnermba mon!

²⁰ Ba enim ka piik yi ninerngii, ‘Gui kis enim sin ek ekii sik, tor punmun.’ pa ninerngii mon! Enim Gos kin ka piingii, Gos enim ei epin konu ele enim embe poł pendim pałim. Nimbił erang enim Gos kingam noł mołmun.”

*Jiisas Eim Ka Piipi Arim Gos Ngum
(Masyu 11:25-27, 13:16-17)*

²¹ Kunum ele Gos Gui Ka je, Jiisas kin ka piipi ngang kin, Jiisas ka piipi, ek yi nirim, “Gos Owundu! Nim tonu epin ni mani mei ele owundu mołun. Ei na nim kin ka piind. Nim wumb noman ka pepi, peng pim wumb ei kin, oł ka dinga ei en enim kin koi erkin pendin, ba nga kangil kembis mił noman yi peng mołmun ei kin, oł ei andan tokun en, ei ka ninim noman ka pim mił en.

22 Na arnan eim epi pei na angil e le pei ngolum. Eim kingam ei wumb endi pii pol tunałmin mon! Arim, eim mendpil, kingam pii pol tołum. Nga arim wumb endi pii pol tunałmin. Kingam mendpil arim piilim. Pe kingam mendpil eim noman e le Ernjing wumb andan tumba, wumb ei Ernjing piingii.”

23 Jiisas nge er se andilim wumb mendpil eim kin muljung. Mol k kin, eim kan ak topu ek nim, “Enim piik kanik enmin o le ei, wumb kombur yi kenjing kin, wumb ei ka piyangin.

24 Na enim kanip nind, kumb ok Gos nge o le ekii se ermbe o le ei piik nilmin wumb kin, wu King ni, wumb ei ok, enim pe kaninmin o le ei nge kenmin nik mulk. Ba en enim kinerik mon. Enim pe piinmin ek ei piimin ni mulk, ba en enim piinerik.”

Sameriya Wu Endi Eim Wumb Kaimb Sim Ek Pol

25 Pe wu endi lo ek piipi elim wu, ei eim yi piim. Nam ek nemb Jiisas nimba mi le ei kenmbii nip nirim. “Ek andan wu! Na nimbi le o le erip, noman konj sip kunum kunum ka mulmbii?”

26 Pe Jiisas ek nipi yi nim, “Gos lo e le nipe ek palim? Nim er gerin mi le nenj?”

27 Pe eim ek dinga nipi orung kindpi yi nim, “Owundu, ei Gos nim nge, nim eim kin noman ka ngunjii ei, ninim noman nge ninim noman tuk, ninim dinga pei eim kin ngunjii. Pe ninim kapli wumb nii endi ninim piikin, nanim wumb nii ni piimbii ei nanim wumb ende mi le na kin mandi

pep mołum; yi mił ninim noman kultun mił yi kulkun wumb ei ngunjii.”

²⁸ Pe Jiisas ek nipi ngopu yi nim, “Nim ek kun nin, ninim nin mił yi enjii! Erkin nim noman konj kunum kunum ka sikin mulnjii.”

²⁹ Ba lo ek piilim wu ei, eim embe ambil ka ermbii ni piim. Piipi kin, nga Jiisas kii sim. Sipi yi nim, “Na wumb nii ni piimbii ei nanim wumb endi mił na kin mandi mołum?”

³⁰ Pe Jiisas ek yi mił nipi orung kindim, “Jura wu endi Jerusalem konu ełe si kindpi, wuł mani Jeriko konu ełe pum ni, wumb waning ełmin wumb kombur, eim andłam ełe kan sinjing. Wu waning ełmin wu ombu ok, eim epi pei sik, eim kepil tok erik pendik, en enim pangin kin, wu pupu kułmba peng pim.

³¹ Pe kunum ełe kułmał kałilim wu endi, eim andłam ełe wuł mani pum. Pupu, andłam ełe pum ni wu pim ei kan si kindpi pum.

³² Yi ku, pe nga Liiwai kułmał kałilmin paki tołum wu endi andłam ełe tor opu pum. Pupu kin, wu ei kanpi si kindpi, opu orung andłam ełe pupu pum ku.

³³ Ba Sameriya konu ełe wu endi andłam ełe opu, pupu mer wu ei pim konu ełe tor pum. Eim wu ei kanpi, eim mund mong ełe kaimb kis piim.

³⁴ Pe wu ni eim mandi pupu, kepil mundum konu ei kanpi, kopung kindpi, noł wain kindpi yi erim. Yi erpi sipi, tonu sipi, eim nge kung dongkii ełe tonu kindim. Kindpi sipipi, sing ngii ełe pendpi, tep ka er mułum.

³⁵ Pekil kupiiring, eim ku mong engki sipi, ngii sing ngii tep elim wu ei ngopu yi nim. ‘Nim na

wu ei tep ka er mułii! Pe nim epi endi ya wu ei kin ngun kin, na ya orung ombii kunum ei, na nim kum epi top orung kind ngumbii,' pa nipi eim pum.

³⁶ Pe nim er piin mił nenj? Wu tekliki andlam ełe andik onjung. Nim wumb nii piinjii ei ninim wumb endi mił nim kin mandi mułang wumb kis ei ok wu ei tunjung?"

³⁷ Lo ek piilim wu ei ek yi nim, "Eim wu ei kan kaimb piipi wu ei, paki tum." Pe Jiisas ek nipi, wu ei ngopu yi nim, "Nim pukun oł yi ku erii!" pa nim.

Jiisas Opu Amb Masa Kin Mariya Tel Kenim

³⁸ Pe andik puk, Jiisas pupu konu endi ełe tuk pum. Amb endi mułum amb ei, embe Masa. Eim Jiisas sipi eim ngii konu ełe sipim.

³⁹ Masa ni amb ei eim angim endi mułum amb ei, embe Mariya. Mariya eim Jiisas mułum konu simb ełe mandi opu mołpu Owundu ek nim mił piipi mułum.

⁴⁰ Ba Masa eim kongun pei erpi, kuni kelim. Pe eim noman eipi eipi pum. Masa pupu, Jiisas kanpi yi nim, "Owundu, na nge engnan ei, na wak tang, na mendpił kuni er ka end. Ei nim piinan min; eim kindan opu, na paki tumba," pa nim.

⁴¹ Ba Owundu ek nipi orung kindim, "Masa! Masa! Nim noman ełe epi kanim kanim piikin nin.

⁴² Ba epi endeim mendpił ka wii ei, pe Mariya epi ka ei, piipi simba enim. Ei wumb endi eim epi ka ei sinermba mon!"

11

Prei Erngii Oł Ei (Masyu 6:9-13, 7:7-11)

¹ Jiisas eim konu orung endi prei er mułum. Ekii se prei er poru nipi wang, eim nge er se andilim wu endi opu yi nim, “Owundu, nim sin prei ermin mił ei, andan to!” pa nim. “Ok Jon wumb eim se andilim wumb prei erpi eim nge kongun wu ombu andan tum mił yi, sin prei ermin mił enjii,” pa nim.

² Pe eim ek nipi ngum, “Enim prei enjing kin yi erngii.

‘Sinim Erinjpin, nim embe ełe kun ka wii mendpił tonu mułmba. Nim sin tep er mołun konu ei tor omba.

³ Sin nge kuni nim kunum kunum ełe sin ngo!

⁴ Nim sin oł kis enjpin ei kil ngunjii. Nimbil erang, sin yi ku, wumb oł kis sin kin erik ei, ninim noman palim mił, sin kin yi enanmin, ei pei si kindinmin. Nim sin oł embin tui endi tonu opu, sin kin erang kin, sin oł kis ermin ei kapli, nim sin paki to si orung sin kin, sin konu ełe mandi punenmin.’ ”

⁵ Pe eim ek yi nipi ngum, “Enim mołmun konu tuk ełe, eim wu angim endi mołum ei, eim pupu, epin tuk memb, ngii andaring pupu angim ek dinga nipi ngopu yi nim, ‘Engnan, nim bres tekliki na ngui!’ a nim.

⁶ ‘Na nge wu puł endi konu turii andpi om. Na kuni ngumbii sinerang kin; na op nind,’ pa nim.

⁷ Angim ngii nirik pim wu ei, ek dinga nipi yi nim. ‘Na angip tonu ombii pinałim; ngii ondu

pałim. Na kangil kin or pałmin. Na angip, nim epi endi sip ngumbii pinałim.'

⁸ Kapli, ei nimbił oł ermbe? Na ek nip enim ngond, 'Eim na engnan nipi piinarpi, epi endi ngunerim, eim yi piimba; wu ei wii tek tek top mołum nipi, eim kapli angip opu, angim epi sinerang om, ei paki top ngumba.'

⁹ Na enim kanip nind, nim Gos kin kii sin kin nim ngumba sinjii. Enim epi endi kuruk endngii ei, kapli keningii. Enim ngii ondu, to seki ningii ei Gos kapli aki tumba.

¹⁰ Wumb Gos kin prei elmin ei epi silmin. Wu endi epi kurpu andlim ei, kan silim. Pe wu endi Gos kin mandi mołpu, ngii ondu to teki teki nimba ei, Gos kapli aki topu ngumba.

¹¹ Enim mołmun konu tuk ełe, wu nii endi eim kingam opu, kii sipi, omu endi ngumbii nimba; ba eim arim ei ka wembii kis endi ngumba min? Ei mon!

¹² Wu endi kingam ei, kei muł numbii nimba; ba eim arim ei ka ep min, epi endi ngumba ei numba min? Ei mon ku!

¹³ Pe enim wumb kis, ei en enim kingenjing epi ka ngołmun. Ei en enim piingii ku. Yi mił, enim Ernjing ei epin konu mołum ei, enim prei erik, Gos Gui Ka simin ningii ei, enim kapli ngumba. Ngang kin, Gos sin kin oł ka pei erpi ngonum."

*Jiisas Biyelsipul Kin Kongun Ouni Enim Ninjing
(Masyu 12:22-30, Mak 3:20-27)*

¹⁴ Jiisas wu endi gui kis mułang, ek tingnalim ei, to tor kindim. Gui kis ei pang kin, wu ei ek tangpi yi er mułang kin, wumb kanik, noman embin to piinjing.

15 Ba wumb kombur yi ninjing, “Eim gos kend owundu Biyelsipul nge  le gui dinga kis ombu, to tor kindnim. Ei gui kis nge tep elim wu,” pa ninjing.

16 Pe wumb kombur eim ermba jep  l ei, kenmin nik,  l endi ermin, ninjing. Nik yi ninjing, “Nim jep  l endi ei epin konu  le  l endi erii!” ninjing.

17 Ba Jiisas wumb noman tuk  le eim piim. Piipi kin, eim ek dinga nipi ngum, “Pe wumb mei ende wumb en enim eipi eipi puk, paltik opu ermin nik erngii. Ei en enim konu kunum kinan olt ka sinermba. En enim mei konu kis mu mba. Nga ngii endi eski l topu pupu, ngii endi  le pimba ei ngii endi eski l topu, mani ba ku.

18 Seisen nge ti ap ei ok eipi eipi puk, opu ermin nik erngii ei, kapli ka mu ngii mi  nenj? Enim nik na gui kis tor kindind; ei nimbi l erang Biyelsipul nge dinga  le gui kis ombu to, tor kindind, ninmin ei na nind.

19 Enim yi ninmin, “Na gui kis to tor kindinj ei Biyelsipul dinga  le to tor kindinj pim kin, kapli en enim Jura engnjing no  gui kis to tor kindinmin ei kindinmin mi  nenj? Yi mi  ku en enim ek  le ni peni  le kindpi kos er ngumba.

20 Gos angil  le erang, na gui kis top kindinj pim kin, kapli Gos sinim kin tep ermba om ni piimin.

21 Pe wu dinga endi, opu kileng ambilpi, eim ngii  le mu mba ei eim ngii konu ka simba.

22 Ba wu endi eim dinga pupu wang kin, wu ei kin opu erngil ei, wu ei kapli, eim wu endi opu kileng ni kumb tepii ei kapli simba. Eim opu ermbii nip piingii ni opu, wu ei topu eim epi sipi,

wumb mok to ngopu yi ermba pend piipi omba.

²³ Wu endi na kin opu ermba wu ei, na kin wu puł mon! Wu endi na nge kung siipsiip kin, tep er kun enermba, ei eim na kung siipsiip ombu, to eipi eipi kindiim.”

²⁴ “Gui kis wu endi si kindpi pułum ei, pupu mei kep ka sałiim, konu mołum. Gui kis ei konu endi kan sinałim kin, yi ni piikim. ‘Ok nam muls, ngii konu si kindip onj konu ei nga bii,’ ni piikim.

²⁵ Pe pupu ngii ełe kurpu kenim ni, ngii ei er kun er sałmin ei sim.

²⁶ Ka seng kanpi, pupu gui kis angil orung nga tał nipi tu wum. Ei eim dinga ei to mani kindik oł kis ełmin. Erik, ngii ełe nirik puk mołumun. Ok wu ei kis aninga mołum, ba pe kis mendpił mołum.”

²⁷ Jiisas eim ek ei nim, kunum ei wumb pei muljung. Konu tuk ełe amb endi mołum. Amb ei ek dinga nipi wii yi mił tum. “Amb ei ok nim mengpi nim am ngurum amb ei eim ka piyangli.”

²⁸ Jiisas ek nipi yi nim, “Ei minj mon, ba wumb Gos kin ek piik ekii sinmin wumb ei kapli ka piyangli.”

*Wu Kombur Jep Oł Kenmin Nik Wii Tunjung
(Masyu 12:38-42)*

²⁹ Wumb pei ok kułou tangin, Jiisas ek yi nim, “Akip kunum ełe, wu amb pei wumb kis mołmun. En enim kii sik ek nik, jep oł minj kenmin ninmin. Ba na jep oł endi andan tunerbii. Ei Jona nge jep oł mendpił ei andan tumbii.

³⁰ Gos kumb ok Jona Ninipe konu ełe pui nipi kindrim, ba Jona Gos ek nirim mił ekii sinerang

kin, Gos jep oġendi erpi andan tang, omu owundu eim kirim eġe tuk pupu kunum tekliki pirim. Ei Ninipe konu eġe moġmun wumb keningii nipi enerim miġ yi ku wu kingam moġum. Ei eim Gos oġ ei ermba ei akip wumb moġmun kunum eġe keningii nipi ermba.

³¹ Ekii se Gos eim wumb, mok tumba kunum ei, wumb tep er muġum amb kuin konu mei orundung muġum amb ei tonu opu, wumb oġ kis enjing ei ni peni eġe kindpi ermba. Nimbiġ erang amb kuin mei wer orung mendpiġ muġum. Pe eim opu King Solomon eim noman ka piim ei piimba nge om. Ba pe wu endi Solomon to mani kindim wu endi ya eġe moġum; ba en enim eim ek piinenjing mon.

³² Ekii se Gos eim, wumb pei mok tumba kunum Ninipe konu eġe moġmun wumb kin, wumb akip kunum ei wumb ouni orung tonu ongii. Ok oġ kis ombu nik tor kindngii. Nimbiġ erang Ninipe konu eġe wumb Jona nirim ek ei piik, noman ak tok. Ba pe ya moġum wu ei Jona ek to mani kindim, ba enim noman ak tunanmin.

Ngenj Eġe Tiġang
(Masyu 5:15, 6:22-23)

³³ Wumb dup alam kaġiġmin ei sik ngii nirik mandring, peġ eġe kindngii eġe mandring kindik pendngii ei mon! Wumb dup kalk tonu peġ eġe pendġmin, wumb ngii eġe nirik ongii ei, dup tiġang ei kanik ongii.

³⁴ Nim ningiġ, ei ninim ngenj eġe nge tiġang. Pe ninim ningiġ ka piimba ei ninim ngenj tiġang ka

ermba. Pe nim ningiŕ kis muŕum kin, nim ngenj pei emii ermba.

³⁵ Ei piik en enim, kan kun er muŕngii. Mon pim kin tiŕang noman tuk saŕim ei nga emii ermba.

³⁶ Pe ninim noman tiŕang pei pim kin, noman eŕe emii endi pinermba mon. Ninim noman pei tiŕang ermba. Ei dup alam tiŕang enim miŕ yi ninim noman eŕe tiŕang erpi pimba,” pa nim.

Ek Mon Wu Ni Kuŕmaŕ Kalimmin Wumb Oŕ Kis Enjing

(Masyu 23:1-36, Mak 12:38-40)

³⁷ Jiisas ek ei nipi poru neng kin, lo ek piŕim wu endi opu, “Jiisas, nam ngii konu wang kuni numbuŕ,” pa nim. Yi neng kin, Jiisas pupu peŕ eŕe muŕum.

³⁸ Lo ek piŕim wu ei moŕpu kenim ni, Jiisas noŕ was enarpi, kuni ok num. Nang kanpi wu ei, eim noman embin to piim.

³⁹ Ba Owundu yi nim, “Enim lo ek piŕimin wumb enim kuni noŕmun ming torung was er ka eŕmin wumb tukrung penj moŕum. Yi miŕ enim noman tuk eŕe oŕ kis ni, waning epi ernгии nge piki top paŕim.

⁴⁰ Enim wumb noman pinaŕim. Gos enim nge ngenj torung erim, ba eim enim ngenj tukrung enerim min?

⁴¹ Ba enim noman tuk paŕim oŕ ka epi yi ernгии nge wumb kaimb er moŕmun wumb ei paki tungii. Enim yi erangin kin, enim noman tuk ka seng kin, enim wumb paki tungii,” pa nim.

⁴² “Ba enim lo ek piik kin wumb, piik kun er muŕngii. Enim keming ni tem ni epi mok tok engki erik, epi orung endeim sik Gos ngoŕmun. Ba enim

wumb noman ngok ełmin, oł ei si kindik, andłam kun si kindik, Gos kin noman ngunałmin. Enim oł ei erik, nga oł endi si kindnałmin mon ku.

⁴³ “Enim lo ek piik ełmin wumb, piik kun er mułngii. Enim yi mił piilmin, sin men ngii ełe kumb se mułamin kin, wumb keningii nik ełmin. Pe kunum endi, wumb kułou tołmun kunum ei, sin onmun nik angil sik, yi erangin wumb eipi, ei sin keningii nik. Enim noman yi piilmin wumb. Yi erngii ei kan kun erik mułngii.

⁴⁴ Enim mołmun ei yi mił, wumb tukpu tołmun, ba jep oł er pendnałmin, mei mandring koi er pałim ei kan kun enarik tonu peł ełe andłam andilmin, ba mandring mei konu ełe ka sinałim mił enim yi mołmun. Ba wumb kan kun enarik kin, nga wumb ok emin mołmun mił yi ku molk kapli enanmin.”

⁴⁵ Wu endi lo ek piik nik ełmin wu ei nge endi ek nipi orung kindpi yi nim, “Ek mon wu! Nim ek yi nikin, sin kin ek embilin ku,” pa nim.

⁴⁶ Pe Jiisas ek ni orung kindpi yi nim, “Enim lo ek piilmin wu, enim kan kun er mułngii. Enim oł embin tui er wumb ngołmun. Ngangin kin, wumb kongun dinga ełmin; ba en enim angil endi tuk kindik, wumb ei wurii wii paki tunałmin mon!

⁴⁷⁻⁴⁸ Enim kan kun erik mułngii! Ok enim kupenjing noł Gos oł ekii se ermba oł ei piik nilmin wu ombu to kundnjung. To konduk kin, tukpu ełe en enim epi kuk moke ngok pendnjung. Yi enjing ei, en enim kupenjing noł enjing oł ei en enim noman ełe kapli en enim ni piik enjing. Keimi, nimbił erang enim kupenjing noł Gos ek ka ni tor kindilmin wumb to kundnjung? Nga enim tukpu

sik epi kuk moke ngok enjing. Oł ei ngenj torung oł keimi mił pim, ba noman tukrung oł keimi enenjing, mon!

49 Yi erangin kin, Gos eim noman ka piim ek ei ok eim nim, ‘Pe na Gos oł ekii se ermbii oł ei, piip nimba wu kin, Gos ek ka ei si endngii wumb kindamb ongii. Ei wumb kombur konu eipi eipi pangin, embii monduk to kundngii.

50 Pe kunum ełe, wumb ei ok Gos oł ekii se ermba ei piik ni tor kindiłmin, wumb to kunduk. Akip kunum ełe en enim oł embin tui singii. Ei ok wumb ombu to konduk mił ni, pe kunum ełe erik mił singii.

51 Am kumb ok, wu Eipel kultum. Nga mering wu Sekaraiya kultum. Ei Gos ngii kulmał kałiłmin konu kin men ngii konu tuk ełe kultum. Ei ngenj kumbii singii nim ei, pe mołmun wumb ei keimi. Na enim kanip nind, enim wumb tilap ei pe ngenj kumbii singii.

52 “Enim ek ka piik sinjing, ba wumb kombur tuk puk ek ka simin ni enjing, ba en enim singii andłam ei, enim ondu ngunjung ei, enim kaplı konu ełe tuk punerngii mon!”

53 Jiisas ngii ełe si kindpi anda pupu pum. Pe lo ek połmun wumb kin, lo ek piik niłmin wumb en enim ek nik, eim ngunjung. Ngok kin, eim gupu ełe ek kanim kanim kopur kii sipin, yi nimin nik piik enjing.

54 Eim ek endi nipi ngumba min, nik kui er mulnjung. Eim Jiisas ek endi nipi nim kin, ek nipin eim kos er ngumun ni piinjing.

12

Oł Kend Oł Ei Kan Kun Er Kindngii (Masyu 10:26-27)

¹ Wumb pułe mam pei ok kułou tunjung, ba konu wumb pei piki topu pim, wumb endi kombur kembangii pim. Kunum ei Jiisas eim ek ok, nipi eim er se endim wumb ngum. “Enim kan kun er mułngii. Lo ek piik niłmin wumb ei ek kend tok niłmin ei, yiis bres tuk kindiłmin mił.” Jiisas ek ei pułe yi mił nirim, “Lo ek piik niłmin wumb ek kend tok, ek ei wumb eipi ngangin piik kin en enim er kis mondułmun.

² Pe epi pei koi er salim ei ekii se nga peni ele omba,” pa nim. Epi pei kum topu palim ei, ekii se nga peni ele wang wumb keningii.

³ Yi palim ei, enim ek koi erik emii peng ninjing kin, ei nga kupiiring eni topu tiłang enim mił ek ei tiłang erpi, peni ele wang kin, wumb piingii. Enim ek aninga ngii nirikring ninjing ek ei, nga tonu ngii tondrung ele angk nik tor kindiłmin mił pimba,” pa nim.

⁴ “Enim na wumb puł, na enim kanip yi nind. Wumb enim ngenj ei to kundngii ei mund mong tunerngii! Mon!” pa nim. “Pe nga ekii se wumb ei oł endi nga kapli enerngii mon!

⁵ Ba na enim mund mong tungii wu, endeim na enim andan tumbii,” pa nim. Enim wu ei kin mund mong tungii; wu ei wumb to kondułum. Nga ekii se, eim wumb sipi dup konu kis ele kindmba ku. Na enim kanip nind, enim eim kin mund mong tok mułngii.

⁶ “Enim piinmin! Kei Winu angil orung ei, ku kundii tal ngok silmin ei, enim piinmin. Ba Gos kei ei pei kanpi piinim. Nga endeim Gos ourun tunanim mon!

⁷ Na ek keimi nind. Gos enim peng enjin tukrung, ei pei gerpi kanpi poru ninim. Enim mund mong tunerngii! Enim kei Winu kembis mił ei, to mani kindinmin. Yi mił ku Gos enim kin pei tep er kanpi mołum.”

⁸ “Na enim kanip nind, wumb endi na embe ele ek nipi wumb kumb ele kanpi nimba wumb ei, eim na kin nimba ei wu kingam yi ku nimba. Ei eim Gos enjel kumb ele wu ei embe ambil tonu kindmbii.

⁹ Pe wumb endi na kin, wumb ningil ele bul ngopu nim kin, na eim Gos enjel ningil ele eim bul ngumbii ku.

¹⁰ “Wumb nii endi wu kingam kin, ek ambilpi ek kis nimba wu ei, Gos eim ol kis kil ngumba. Ba wumb endi eim yi nipi Gui Ka dinga kongun owundu erim, ei embe ambil mani kindpi, yi nimba wumb ei Gos kapli ek kis yi mił nimba wu, ei kil ngo si kindnermba mon!

¹¹ “Pe wumb enim sik sipik men ngii ele wu owundu mułngii ningil ele ni, wumb num mułngii konu ningil ele sipngii ei, enim mund mong enerngii mon! ‘Pe sin nipe ek ei nimin?’ Nik, yi ni piinerei mon!

¹² Wumb enim kin ek ningii kunum ei mendpil, Gos Gui Ka, enim ningii ek ei, enim ek andan tumba. Nipi ngang kin, enim ningil ek ei mił ningii.”

Ku Ni Epi Ambil Nołum Wu Wulu Pum Ek Ekin

13 Wumb pei mulnjung konu tuk eġe, wu endi opu Jiisas kanpi, ek nipi ngum, “Ek mon wu! Nim ek nikin na angnan ngunjii. Ngan kin, eim siġ erinjpil epi ei pei mok to simbiġ,” pa nim.

14 Ba Jiisas ek nipi orung kind ngopu yi nim, “Nimbiġ erang wumb nii na ek kos miġ piimbii nik to tonu kindnjing min, nga eġip erinjngiġ koġ epi eġip kin mok top kapil kapil erpi eġip ngumbii min ei kapli enanim mon!”

15 Pe Jiisas eim ek nipi orung kindpi wumb ngopu yi nim, “Enim kan kun er muġngii. Wumb epi pei simba ei nik, kan bun bun kulerngii mon! Pe epi pei simba wumb ei, eim kuġmba kunum ei, epi ombu eim paki tunerngii mon!”

16 Pe eim ek ekin endi topu wumb ngopu ek dinga nim, “Wu num endi epi ni ku pei saġim wu ei, eim kuni teġim ei, poġ pei topu moġum.

17 Pe wu num ei eim noman eġe piipi, ‘Na nimbiġ oġ endi ermbii?’ ni piim. ‘Na kuni tuk kindmbii ei ngii pei sinaġim,’ ni piim.

18 Eim yi nim, ‘Nam ermbii miġ nenj?’ ni piim. ‘Na yi ermbii, kuni ngii kembis kembis ombu to kis erpi, kuni ngii owundu konj tekmbii,’ nim. ‘Takip kin, kuni tem ni kuni kanim kanim sip nam ngii eġe tuk kindmbii. Nam kuni pei saġim, kung pei nop muġmbii,’ nipi kin, kor muġum.

19 Moġpu kin, eim ei ek nipi yi nim, ‘Nim kung ngii pei kor molkun, kuni ni epi saġim. Nokun kin, ka ka piikin mulnjii,’ pa nirim.

20 Ba Gos ek nipi wu ei ngum, ‘Nim wu kom noman ka pinerang nikin moġum. Nim epin mendpil nim kulnjii. Kuġan kin, epi pei ka er sin,

ei wumb nii simba?’

²¹ Ei yi mił, wumb en enim epi pei kułou mondułmun wumb ei, Gos kumb ełe ok epi sinerii mił mołmun,” pa nim.

*Gos Kin Noman Pii Gii Nimin
(Masyu 6:25-34)*

²² Jiisas eim er se andiłim wumb kanpi, ek dinga nim, “Na enim kanip nind, ‘Enim noman konj ełe noman to minj kulerngii mon!’ Enim yi ningii, ‘Sinim kuni nipe kuni numun? Nga enim ngenj ełe piik kin, alap ni epi nipe endi kindmin,’ yi ni piinerngii mon!

²³ Noman konj sikin konj mulnjii ei, kuni minj ni piinerngii; nga ngenj ełe alap minj ni piinerngii!

²⁴ Enim kei Goi ni kei kanim kanim ei piingii. Enim kei piin min? Kei ei kuni tilałmin; nga kuni kełngii ngii sinałim; nga kuni tu wuk kułou tunałmin; ba Gos eim kei kuni ngołum. Enim wu amb ei kei to mani kindinmin ei, enim wumb owundu mołmun.

²⁵ Pe enim mołmun konu tuk ełe wu endi noman dinga pimba. Ei eim nga nipi, pupu eim noman konj ei kung ngii kopur nga sipi, mułmbii ni pimba, ei kaplı enanim; ba Gos mendpił ei kaplı ermba.

²⁶ Pe enim epi kembis endi erngii ei kaplı enerim kin, Gos mendpił kaplı ermba. Nimbil erang enim epi kanim kanim pei noman to piinmin?

²⁷ Enim epi kuk ka wii ei piin min? Ei kongun endi enałmin mon. Ei wii tonu onum. Pe enim alap enałmin; ba na enim kanip nind, kumb ok

King Solomon, eim alap ka wii kindim. Ba ei ya epi kuk ka wii ei mił alap endi kindnerim mon!” pa nim.

²⁸ “Pe kuni taliłmin konu epi ka wii tonu opu mołum ei, pe mołum; ba topuł tok tor kindik dup kełngii. Pe epi wii ei nge Gos kan wiik tołum. Ei enim kan kun erngii. Gos enim tep ermba ku; ba enim wu amb pii gii dinga pinałim.

²⁹ Yi piik, enim noman embin to piinerngii. Sin nipe kuni kin noł numun, epi nipe epi simin nik yi piinerngii mon!

³⁰ Mei konu orung orung torung mołmun wumb ei, epi pei er simin mił nenj ni piik mołmun; ba enim Ernjing ei epi ei nge singii ni piinim.

³¹ Enim Gos enim tep er mołum oł ei, kan kun er mułngii. Pe Gos eim enim epi ombu kapli ngumba ku.”

*Ei Epin Konu Epi Pei Sałim
(Masyu 6:19-21)*

³² “Enim wumb tilap kembis kung siipsiip mił ombu, enim mund mong tunerngii. Enim Ernjing Gos ka piipi, eim tep er mołum konu ei, ‘Enim ngumbii mułngii,’ pa nirim, ek ei pałim.

³³ En enim epi pei wumb ngangin kin, wumb top tok singii ku ei, wumb wii mułngii wumb ei, paki tok ngungii. Ngangin kin, enim ku nin epi ombu am punermba. Pe ninim kon endi sinjii kon, ei sikirpi kilip topu numun tunermba; ba kon dinga wii seng kindnjii. Pe enim epi ka wii kanim kanim, epin konu kułou tungii ei am punermba. Konu ełe waning wumb tuk ok waning sinerngii; nga ka pila min, epi kis endi tuk ok epi ombu, nok

erik kis mundnerngii mon! Pe enim epi ka wii, ei epin konu kulou tungii, ei am punermba. Epin konu ele waning wumb tuk onerngii; nga ka pila min, nga epi kis endi tuk onerngii mon.

³⁴ Enim nge epi ka konu ele salim konu ele, kunum kunum enim noman tuk konu ele salim ku.”

Kongun Wu Ek Er Kun Er Muŋgii Ek

³⁵ “Enim kan talk, dup alam si kalk, konduk kindik, nipe epi endi erik, en enim er kun erik muŋgii.

³⁶ Jiisas ek nipi yi nim, “Enim muŋgii ei, wu owundu endi omba. Nik kin, wumb en enim or pinarik, er molmun miŋ muŋgii. Ei yi miŋ, wu ei eim kuni owundu nok erngii ei, orung omba ei si kindpi kin, opu ngii ondu to teki teki nimba, ei sikir ok aki tungii.

³⁷ Wu owundu ei opu kanilim ni, eim nge kongun wumb or pinaŋmin ei, wumb ka piingii. Na enim kanip nind, wu owundu eim alap sipi osii er taŋpi, kan taŋpi, eim nga kuni er kun er sepi yi nimba. ‘Na nge kongun wumb ok peŋ ele molk, kuni owundu nungii nge ngumbii,’ pa nim.

³⁸ Pe wu owundu ei epin tuk mii memb omba min, kei kultu kumna tumba kunum ei omba min, eim opu kenmba ni, eim kongun wumb or pinarik omba nik, kui muŋgii wumb ei ka piingii,” pa nim.

³⁹ “Enim oŋ ei piinmin! Wu endi eim ngii konu waning wumb ongii ni piipi kin, eim ngii konu tep ka wii er molum ei, tuk punaŋmin mon!

⁴⁰ Enim yi ku er kun erik muḅngii. Wu kingam eim omba kunum ei, enim piik kunum eḅe, omba ni piinerngii.”

Kongun Wu Ka Min Kongun Wu Kis Nge Ek Ekin

(Masyu 24:45-51)

⁴¹ Pe Piisa ek ekin yi nim, “Owundu, nim sin kin ek ekin pei ni ngon min, sin wumb eipi kin ek ouni nin min?”

⁴² Pe Owundu yi nim, “Pe tep enim ei nii tep moḅum? Moḅu kin, eim noman ka paḅim. Peng kin, eim kongun tep ka moḅulum. Moḅu kin, owundu eim wu endi to mundang moḅu, kongun wumb tep er nim min? Nipi kin, wumb kuni kunum simba kunum ei ngopu erangḅi nim min?”

⁴³ Ekii se wu owundu ei orung opu, eim kongun wu ei ok ek nim miḅ, ei piipi kin, kongun er moḅum wu ei eim ka piimba.

⁴⁴ Na ek keimi nip enim ngond, wu owundu eim, ‘Epi pei tep er mulii!’ nimba. Neng kin, tep er muḅmba.

⁴⁵ Ba kongun wu ei eim noman yi piim, ‘Na wu owundu ei sikir orung onermba,’ ni piipi, kongun wumb ei wu amb ni kep̄ii topu kin, eim pupu kuni nopu, noḅ nopu, wulu pang er andpi muḅum.

⁴⁶ Pe eim yi er muḅum ei, eim wu owundu ei kunum nenj omba nipi kin, kui er mulerim. Pe kunum endi eim pii poḅ tunarpi muḅum. Pe wu owundu opu, eim kongun wu ei kep̄ii topu, wu sipipi wumb wii molk kongun pii poḅ tunarik mulnjung konu eḅe mundum. (Konu eḅe wumb pii gii ninenjing wumb).

⁴⁷ Kongun wu ei eim wu owundu elim oł ei piilim; ba eim wu owundu noman ełe kongun kun enarpi mułum. Wu ei wu owundu opu, ek ngopu kin, kepii dinga wii tumba.

⁴⁸ Pe kongun wu ei, eim wu owundu kongun elim oł ei piinarpi kin, oł eipi er mułum kin, wu owundu ei opu, ek ngopu kin kepii aninga er tumba pałim. Wumb endi epi pei ngang sim pim kin, wumb ei epi yi ku erpi kin nga pei ngo orung kindmba. Nga wumb endi ek ka min, kongun ka ni, epi pei kanim kanim ngum ei, wumb kin kongun oł yi mił ku erpi ngo orung kindmba.

*Jiisas Eim Wumb Tiłap Mok Tumba Wu
(Masyu 10:34-36)*

⁴⁹ “Na op dup owundu kindamb, mei ełe opu dup numba. Nam noman dinga ni piip, nam dup ei sikir numba.

⁵⁰ Na noł endeim pimbii ei yi mił, na kin oł embin tui owundu endi tonu onum. Onum oł ei na kin sikirip poru nimba. Nip moł; ba sikirpi poru ninerang kin, nanim noman embin enim.

⁵¹ Pe enim piinmin! Na op enim opu erik erngii oł ei (opu ond wu mił op) mon nimbii onj min? Mon. Na enim kanip nind, “Na op wumb tiłap ende en enim opu erngii, nge onj.

⁵² Akip ni, nga ekii se, wu amb kangil kombur ngii ende mułngii wumb ei, ok eipi eipi puk, tiłap tał er mułngii. Pe tiłap endi, opu orung erpi tiłap tał ngumba. Ngang kin, nga tiłap tał opu orung er eim kin ngunguł.

⁵³ Yi er puk kin, kangi ei arim kin opu ermba ku. Nga arim kingam kin opu ermba ku. Nga amb

mam eim ambilam kin opu ermba; nga ambilam eim mam kin opu ermba ku. Pe amb mam eim kingam ambim ei kin opu orung erang; nga kingam ambim ei kingam mam kin opu orung erang kin yi erngii.”

*Epi Nipe Tonu Omba Ei Piilmin Oł Ei
(Masyu 16:2-3)*

⁵⁴ Pe eim ek dinga nipi wumb ngopu nim, “Enim konu eni tonu opu, mani pupu, enim konu ei kon kupu endi tonu onum ei kaninmin. Kanik kin, enim yi ninmin, ‘A konu kumb tumba.’ Enim yi nilmin oł ei keimi, konu kumb tołum.

⁵⁵ Pe enim mułangin kin, konu pop owundu endi mer ełe tołum kunum ei, enim yi nilmin, ‘A konu eni owundu pimba,’ pa nilmin. Yi nilmin, oł ei keimi tonu ołum.

⁵⁶ Enim ek kend wumb! Enim kupu kin mei ełe oł ermba ei kan poru nilmin. Ba nimbił erang, enim Gos oł kombur pe tonu onum, nga tonu omba ei, kan kun enanmin?

*Pe Nim Giyeng Ni Molkun Wumb Nim Kin Kos
Ningii Ei Er Kun Enjii.
(Masyu 5:25-26)*

⁵⁷ Nimbił erang enim oł ei ek nik kun kind piinarik, oł kun nilmin?

⁵⁸ Kunum endi nim wu endi nim kin kos er ngumba wu ei kin, tep to punjii. Ei andłam ełe pukuł, wu ei kin ek ni ka enjii. Mon pim kin, wu ei nim sipi, kos piilim wu endi angil ełe ngang kin, kos piilim wu ei nim sipi opu ond wumb angil ełe ngang, opu ond wumb nim sipik, kan ngii ełe kindngii.

⁵⁹ Na enim kanip nind, nim kan ngii eġe sikir tor onenjii mon! Ok ninim kom se piikin, ku epi owundu endi min, ku kembis pei ei ngo orung kind poru ninjii,” pa nim.

13

Wumb Endi Gos Kin Noman Ak Tunermba Ei Eim Am Ba

¹ Kunum eġe, wumb kombur moġangin kin, enim nik Jiisas ngunjung. Galilii wumb kombur moġangin kin, Pailos eim kuġmaġ kelnjing wumb ei, topu miyem sipi nga kuġmaġ kelnjing, kung miyem ei sip endi kindim.

² Jiisas ek dinga nipi orung kindpi yi nim, “Galilii wumb ei er molk, Galilii wumb kombur to mani kindinmin, ni piik ninmin min? Pe Galilii wumb tilap ei oġ kis eġmin, wumb ni piik ninmin min? Eġe nge kapġi wumb ei oġ embin tui sinjing min?”

³ Na enim kanip nind. Ei mon! Ba enim yi ku, noman ak tunenjing kin, enim pei yi miġ ku kolk am puk poru ningii.

⁴ Kumb ok kunum Sailom ngii olt endi eskiġ topu mani pupu wumb engki nga kapġi kapġi pei to kundum. Wumb ei oġ kis erik oġ ei, wumb eipi Jerusalem konu moġmun wumb oġ kis ei to mani kindim ni piik ninmin min?

⁵ Ei mon ku! Na enim kanip nind, ‘Enim noman to ak tunenjing kin, enim yi miġ ku kolk am puk poru ningii,’ pa nind.

Ond Pik Mong Tunanim Ei Nge Ek Ekin

⁶ Pe eim ek ekin endi nipi ngopu yi nim, “Wu endi eim ond pik tuk kuni wain pin talim. Ba ekii se opu, ond pik ei mong tonum min? Op, mong tang numbii ni piipi opu kin, kenim ni mon pim.

⁷ Mon peng kin, ek nipi eim kongun wu ngum, “Nim piin! Kung ngii tekliki mołup op kin, ond pik mong numbii ni onj, ba mong tunerim. Pałim, ei nim kołmung to kindii! Nimbił erang ond ei mei noł wii nonum?” pa nim.

⁸ Kuni mong nge kongun elim wu ei ek nipi orung kindpi yi nim. “Wu owundu! Nim kaplı nen, kung ngii endeim minj nga mułmba min? Mułang kin, na mer ond puł ele mei akip kung kou enj tu wup, kindip kin, yi ermbii,” pa nim.

⁹ “Yi erpi pindamb kin, nga kung ngii endi ele kaplı mong tumba. Yi eramb kin, mong tunerim kin, nga kołmung tui nen kin, to si kindmbii,” pa nim.

Kor Owundu Kunum Jiisas Amb Endi Er Ka Erim

¹⁰ Kor kunum endi Jiisas Gos ek ka nipi wumb ngum. Ei men ngii endi ele mołpu ek nipi ngum.

¹¹ Kunum ele amb endi mułum, amb ei gui kis endi mułum. Gui kis ei, amb ei ening ngang kin, kung ngii engki nga kapıł kaplı pei o pum. Gui kis ei erang kin, amb ei ening kan sipi pim ei eim buł engin tang kin, kun ba pinerim mon.

¹² Pe Jiisas amb ei kanpi yi nim, “Nim ya wa!” Amb ni wang kin, Jiisas ek yi nim, “Na nim ening ei er ka er poru nind,” pa nim.

¹³ Amb ei wang kin, Jiisas angil sipi, amb ei embilim. Embilang kin, amb ni sikir kun engim. Angpi kin, Gos embe ambil tonu kindim.

¹⁴ Ba men ngii ele tep molulum wu ei, Jiisas amb ei kor kunum er ka erim ei, mon nipi, Jiisas kin popul sim. Sipi kin, ek dinga nipi wumb pei ngopu yi nim, “Kongun ermin kunum ei kongun minj ermin. Kunum angil orung nga endeim ele kongun ermin. Enim ei ngenj er ka ermaba ni pingii wumb ei, kongun kunum wangin kin, er ka ermaba. Enim ele nge piik kin, kor kunum wumb yi nge, ya ele tu wunerei!” pa nim.

¹⁵ Pe Owundu ek nipi orung kindpi yi nim, “Enim wumb kanik ek kend nik pendik, nga puk ol eipi eipi elmin wu, kor kunum enim kung kou ni, kung dongkii ni konu kuni ngo pendilmin konu ei kan posik sipik, nol ngok, nga tu wuk, yi elmin ol ei piinarkin nin min?”

¹⁶ Ba amb ei, Eiparam nge tilap ambilam, Seisen ambil gii nipi mulang kin, kung ngii engki nga kapil kapli pei opu pum. Ei akip kor kunum ei na eim kan mil pe mulum ei, pilngan to kindind,” pa nim.

¹⁷ Eim ek yi neng kin, opu orung enjing wumb ei singambil sinjing. Pe wumb pei eim erim ol ka ei kanik ka wii piinjing.

*Ek Ekin Kombur Jiisas Wumb Ngum
(Masyu 13:31-32, Mak 4:30-32)*

¹⁸ Jiisas ek ekin nga topu yi nipi ngum, “Na nipe epi endi su sip kin, nga Gos wumb tep enim ei tonu ok pei molmun ei nip ngumbii?”

19 Ei yi mił, kuni emb kembis wii endi sinim embe ‘maser,’ pa ninmin. Wu endi kuni emb maser ei sipi kin eim kuni talim konu ełe talpi pendim. Pe kuni maser ei ekii se ond mił tonu om. Ond ei engim konu kei ok mołumun.”

20 Ek ekin nipi nga nim, “Na Gos wumb konu orung orung wumb pei tep er mołum oł ei, na epi nipe endi mił su sep nimbii?”

21 Ei yiis bres tuk kindiłmin mił, amb endi bres plawa ming owundu endi sipipi, yiis kin endi kindim ei, ekii se bres plawa ei oupu tonu om. Ei yiis ninmin epi ei konu orung orung pang kin, yi elim.

*Ngii Ondu Kembis
(Masyu 7:13-14,21-23)*

22 Jiisas eim pupu, konu owundu ni konu kembis kombur sim konu tor pum. Pup andpi kin, Gos ek emb topu, wumb ngopu yi erim. Erpi kin, eim Jerusalem konu ełe ba nge pum.

23-24 Pang kin, wu endi opu yi nim, “Owundu, Gos wumb endeim, endeim ni sipi orung simba min?” Ba Jiisas ek nipi wumb ngopu yi nim, “Enim embił dinga kindik, kongun dinga erik, ngii ondu kembis wii ełe tuk pungii. Ei yi mił enim kan kun er mułngii nge Gos erim. Na ek nip enim ngond, ei nimbil erang wumb pei ngii ondu kembis wii nirik bin nik erngii; ba kapli enermba mon!”

25 Ekii se ngii arim ei opu kin, ngii ondu ngumba. Ngang kin, enim ok andaring ok, molk yi ningii. ‘Owundu, ngii ondu aki to!’ yi ningii.

Pe eim ek yi nipi ngumba, ‘Enim jili wumb, na piinand.’

²⁶ Nga enim yi ningii, ‘Sin nim kin ende mołpun, kuni nopun, noł nopun, nim andlam ełe andpin, ek emb topun, sin konu owundu ngołan,’ pa ningii.

²⁷ Ba eim ek yi nipi enim ngumba, ‘Enim jili wumb, na enim piinand. Enim oł kis ełmin wumb, na moł konu kunerei!’

²⁸ Ba enim molk ke ningii ni, Eiparam ni, Aisak ni, Jeikop ni, Gos ek ka ni tor kindilim wumb pei Gos konu sinim tep enim konu ełe, tuk mułngii ei keningii. Ba en enim mon, si kindik torung mułngii. Molk kin, en enim gupu mong kongk kin ke nik mułngii.

²⁹ Pe wumb konu eni tonu onum konu wumb ni, eni mani punum konu wumb ei ni, ei orung wumb ni, mer mani orung wumb ni, wumb ei tonu ok, Gos sinim kin tep er mołum konu peł ełe, kuni owundu nok er mułngii.

³⁰ Keimi! Pe wumb kombur en enim ekii se omun ni erngii wumb ei, nga ok kumb se pungii. Wumb kombur pe o kumb se bin ni erngii wumb ei, am ekii se mendpił ongii.

*Jiisas Jerusalem Konu Ełe Kanpi Kin Ke Nim.
(Masyu 23:37-39)*

³¹ Kunum ełe mendpił lo ek piik nilmin wumb kombur ok, ek yi ninjing, “Nim konu ełe si kindkin, konu eipi endi ełe pui! King Eros nim tumba enim,” pa ninjing.

³² Jiisas ek nipi orung kindim, “Enim eim kanik ek ningii, ‘Piimin! Akip min, topuł endi, gui kis ei

na to tor kindip, ening pimba wumb ei, er ka erip, ermbii. Toi na kongun poru nimba.

³³ Ei yi mił, pe min, topuł min, tał kunum na andip kongun ermbii. Ei nimbił erang wumb, wu endi Gos oł ekii se ermba oł, ei piik niłmin wu, endi to kundngii ei, Jerusalem konu tu wuk minj, to kundngii.

³⁴ “O Jerusalem konu ełe wumb! Jerusalem konu ełe wumb! Enim wumb Gos nge ek keimi nik oł ekii se ermba oł ei piik nik ełmin wumb, ei enim to kundmun. Gos kindiłim wumb ei ku tok yi ełmin. Kunum kunum na enim kei kultu mam wał ombu sipi eim kong mandring kindiłim mił, na enim yi ermbii; ba en enim mon niłmin.

³⁵ Piinmin! Gos enim konu owundu si kindpi, enim to anda kindim poru nim. Na enim kanip nind, ekii se na enim kinarik, ek yi ningii, ‘Wu endi Gos owundu nge embe ełe om wu ei, eim embe ambił tonu kindamin,’ ningii ei, enim na kinerngii mon.”

14

Jiisas Wu Ngenj Owum Wu Endi Er Ka Erim

¹ Kor kunum endi, Jiisas pupu lo ek ekii sik ełmin wumb nge wu num endi ngii konu kuni num ni, Jiisas eim ermba oł ei kanik kui erik mulnjung.

² Wu endi simb ni angil ngenj ombu pei oupu mułum wu ni, Jiisas mułum konu ełe mandi opu mułum.

³ Jiisas wu ei kanpi kin, ek nipi, wu lo ek piłmin wu kin lo ek ekii sik ełmin wumb kin wu ombu kii

sim, “Sinim lo ek kapli ninim ni, kor kunum wu ei endi ening pimba er ka ermin min mon?”

⁴ Ba en enim ek tinarik muljung. Mułangin kin, Jiisas wu ni sipi, er ka er kindang pum.

⁵ Pe ek nipi yi nim, “Enim mołmun konu ęle wu nii endi eim kingam endeim mułmba min; wu endi eim kung kou ni endi pupu kin noł tukpu ęle mani pupu pimba ei, kor kunum kapli sikir sipi kin, tonu simba min mon?”

⁶ Pe wumb en enim eim nim ek ei ni orung kindnenjing.

Wumb En Enim Nge Embe Ei Ambil Mani Kindngii

⁷ Jiisas mołpu kenim ni, wumb kuni owundu ngungii onjung. Wumb ei pe kumb se ęle konu ka wii mułmun ni piinjing, yi kanpi Jiisas eim ek ekin endi nipi, yi nim.

⁸ “Wu nii eim amb simba pendpi nim kunum ęle; ‘Oi!’ nimba. Ei nim pukun peł kumb ęle mulenjii. Mułang kin, wu owundu endi wii tangin kin, opu peł kumb ęle mułang, nim enjii mił nenj?”

⁹ Nim ‘Oi!’ nin wu ni, opu yi nim, ‘Nim peł kumb ęle sim peł ei, ya wu ei ngui!’ nimba. Yi neng kin, nim singambil owundu peng kin, pukun buł morung peł ęle mulnjii,” pa yi nim.

¹⁰ “Ba wu endi nim wii topu, kuni numbuł oi nikin, nim pukun, buł morung peł ęle mulnjii. Wu endi wii topu opu nim kanpi yi nimba, ‘A—na wu puł, nim ya peł tonu ęle mulii!’ nimba. Yi neng kin, nim embe tonu pang kin, wumb pei ningił ęle kuni ende nunjii,” pa nim.

11 “Ei yi mił, wu endi eim embe ambił tonu kindmba wu ei, wu eipi endi wu ei nga to mani kindmba ku; ba wu endi eim embe to mani kindmba wu ei, wu eipi endi eim embe ambił tonu kindmba.”

12 Pe wu ei kanpi kuni owundu ngumbii oi nirim wu ei, ek yi nim, “Nim kuni owundu endi en kin, angnim noł ni, wu puł ni, ninim tiłap ende wumb min, konu ende wumb ku pei simba wumb ei min, pei kan ninenjii! Yi en kin, ekii se wumb ei nim wii tangin kin, nim pan kuni nunjii kuni ei, nga ngo orung kindngii!” pa nim.

13 “Mon! Pe nim kuni owundu endi en kin, pukun wumb epi sinerang kaimb wii mołmun wumb ni, wumb ningił kis mułum wumb ni, wumb simb angıł kis mułum wumb ni, wumb ening peng pimba wumb ei nge ninjii!” pa yi nim.

14 “Pe wumb ombu nge nim kuni owundu ngunjii wumb ei, nga ngo orung kindnerngii! Nimbił erang ei ninim ekii se Gos epi ei ngo orung kindmba kunum ei, wumb kun ka molk wumb ei, nga angk, tonu konj ongii kunum ei, Gos nim epi ka ngumba.”

*Kuni Owundu Nonmun Ei Nge Ek Ekin
(Masyu 22:1-10)*

15 Pe tuk ełe wu endi en enim kuni endi no muljung wu ei mołpu, piim ni, Jiisas ek nim ek ei piipi, ek yi mił ngum, “Wu endi Gos sinim tep er kanpi mołum konu ełe, wu endi kuni konu ełe nopu mułmba wu ei, ka piyanglı!” nim.

16 Jiisas wu ei ek nipi ngum, “Wu endi eim kuni owundu endi er sepi kin, wumb pei tung kindim wumb ei, kuni owundu ełe ngungii ongii.

17 Pe kuni nungii kunum ei, eim kuni er kun er sepi kin, eim kongun wumb kindang, puk ok, eim kan nirim wumb ei wangin kin, 'Kuni er kun er sep moł,' nirim. Neng kin, eim kongun wumb puk, 'Kuni er kun er sim, enim wei!' pa nik.

18 Ba eim ek kanpi nirim wumb ei, pei ek yi minj ku nik, 'Sin omun pinałim ku,' nik. Wumb endeim opu yi nirim. 'Na aka pin konj endi top enj ei, pup kenmbii pałim. Na ombii pinałim, ei kapłi min?' pa nim.

19 Nga wu endi ek yi nirim, 'Na kung kou kongun erngii nge kung engki top er sinj. Na kung kou kongun erngii kanip bii. Na kapłi bii pinałim mon!' nirim.

20 Pe nga wu endi eipi ek yi nirim, 'Na pe minj amb konj sinj kin, na kapłi bii pinałim,' pa nirim.

21 Pe kongun wu ni orung pupu, eim wu owundu ni kanpi nirim. Pe ngii arim ni, popuł sipi yi nirim. 'Nim sikir pukun, konu andłam owundu ni, kembis ni, pei pukun, wumb epi sinerang mułngii wumb ni, simb kis mułmba wumb min, ningił tumbun wumb ni, wumb simb angii kilip to pum wumb min, wii to sikin, ya na ngii ełe nirik tu wunjii pui!' ni kindim.

22 Pe ekii se kongun wu ni, orung opu yi nirim, 'Wu owundu, nim nin ek ei na piip enj; ba ond peł kopur wii simba pałim,' pa nim.

23 Nga wu owundu ek dinga nipi kin, eim kongun wu ngum. 'Nim pukun, andłam owundu nim konu owundu ełe tuk mołmun wumb ei, se kułou to kinan kapłi erim kin, nga konu owundu taring wumb talip epi ni, wumb mołmun ei ni, tu wunjii ku! Na ngii ełe wumb piki tumba,' pa nipi,

kindang pum.

²⁴ ‘Na nim kanip nind; wumb kumb se kuni owundu nungii pa nir wumb ei, na kuni owundu eġe, kapġi nunerngii mon!’ pa nim.”

Wumb En Enim Ok Noman To Piik Jiisas Kin Ekii Singii

(Masyu 10:37-38)

²⁵ Wumb tiġap owundu Jiisas pum konu eġe ekii se punjung. Jiisas kan ak to yi nim.

²⁶ “Noġ ei wakin to si kindnarpi, nga eim noman eġe oġ kanim kanim ermbii. Nip, piimba noman ei top mani kindnerim kin, op nanim kongun wu mendpiġ mulermba mon.

²⁷ Wu endi eim na kin noman to piipi kin, eim ngenj kumbii sinarpi, kongun dinga enarpi, eim nge ond peri kon sinarpi yi ermba wu ei, na kin ekii se omba ei, na nge kongun wu mulermba mon!

²⁸ Nimbiġ erang enim moġmun konu eġe wu endi ngii oġt takpi ei, tonu bii ni piimba wu ei, eim moġpu kin, ngii ei ku nimberii ba ei piipi kin, ermba wu ei, ngii kapġi tekmba min mon?

²⁹ Ok eim yi ni piinarpi kin, mei eġe ku simin er poru nipi kin, ngii tekmba miġ pinerim. Wumb pei wu ei kanik kin, ek kulnjung.

³⁰ Pe wumb kanik yi niġmin, “A— wu ei ngii puġngun mond, ba eim tekim ni, ngii ei takpi poru ninerim mon!” pa ninjing.

³¹ Pe kang endi eim pupu kin, king endi kin opu ermbii niġim ei, eim moġpu kin, kom sipi piipi kin, kun er pendpi, king ei opu wumb 10,000 pei mendpiġ moġmun, (kar angii orung miġ) ni piipi,

eim opu wu 20,000 pei nga mendpił mołmun (kar engki mił) ni seng kin, eim kin ouni pułmun. Pupu kin, eim kom se piipi kin, wu king endi ei topu kindmbii min mon, ni piim.

³² Pe king endi eim opu wu kanilim kapłi enalim kin, wu king endi opu wumb sipi, opu konu turii mił mołulum konu ek ni kindpi, ‘Opu enerambil,’ ek ni ka erambil nipi yi nilim.

³³ Ei yi mił ku, enim mołmun konu ele, wu endi eim epi pei buł ngunarpi mułum kin, wu ei na nge kongun wu mon.”

³⁴ “Wu endi eim noman ele epi kanim kanim pei buł ngopu, na kin ekii simba. Nga noman to orung kindpi piim kin, ei eim ep kusa kis mułang kin, kongun endi pinerang si kindinmin mił eim yi mołum. Ep kusa ei epi ka; ba ep kusa singin ei pinarpi nim kin, sinim er ka ermin mił nenj?

³⁵ Ep kusa ei nge sinim aka pin ele kindnermin. Nga ep kusa ei nge kung kou enj kin endi kindnermin ku. Ep kusa ei wii si kindmin. Wumb endi eim kom pim kin, ek ei piyangłi!” pa nim.

15

Kung Siipsiip Am Pum Ek Ekin Top Nim (Masyu 18:12-14)

¹ Oł kis elmin wumb kin, wumb ku takis silmin wumb kin, ok Jiisas nim ek piinjing.

² Lo ek piik ekii silmin wumb kin, lo ek połulumun wumb, en enim yi ninjing, “Wu ei wumb oł kis elmin wumb kin, kuni ende nonum,” nik ek kis ninjing.

³ Yi ninjing kin, Jiisas eim ek ekin topu nipi wumb ngum.

⁴ “Enim mołmun konu ele wu endi, kung siipsiip 100 pei mułum wu ei, kung siipsiip endeim am ba; ba ei eim kung siipsiip 99 pei wii mondpu, si kindpi pupu kin, kung siipsiip endeim kurmba wu ei, eim kung siipsiip endeim am pum ei, kur kan sipi minj omba.

⁵ Eim kurpu andpi kan sipi kin, tu wupu, eim pepił ele pendpi tu wum. Tu wupu kin, eim ka piipi mołum.

⁶ Sipi tu wupu kin, eim nge puł wumb ni, wumb ngii mandi mołmun wumb ei, wii tang kułou tunjung. Tangin kin, ek nipi ngum, ‘Enim na kin ouni ka piingii! Na kung siipsiip endi am pum; ba nga kur kan sip tu wunj!’

⁷ Na enim kanip nind; yi mił ku, tonu epin konu ele wumb 99 pei ka mołmun wumb ei, nga noman ak tunerngii ka piingii. Ba oł kis erpi elim wu endi, eim noman ak tumba ei, tonu epin wumb ka wii owundu piingii,” pa nim. Pe nga ek ekin yi mił nim.”

Kom Ku Amb Pum Ek Ekin

⁸ Pe amb endi eim ku engki se mułmba ei, kom ku endi am ba. Kapli ei eim dup alam kał pingii, nirikring brum erpi, kur mołpu kin, kan sim.

⁹ Amb ei eim ku kan sipi kin, eim wumb puł ni, ngii mandi mołmun wumb ei, wii top wangin kin, kułou tunjung. Tangin kin, eim ek nipi wumb ngum. ‘Enim na kin ka piik ngungii; nimbił erang na ku ni kan sinj.’

¹⁰ Na enim kanip nind yi mił, ‘Epin konu ele Gos nge enjel pei, wu endi eim oł kis er andiłim wu ei, noman ak topu wang kin, enjel wu ei onum wu ei kin ka nik ka ka piłmin.’ ”

Kangi Endi Arim Si Kindpi Pum Ek Ekin

¹¹ Jiisas ek ekin nga yi nim, “Wu endi eim kingam tał mołmbuł.

¹² Pe eim kingam ekii ni, arim kanpi yi nim; ‘Wusa, nim sił epi mok tokun sił ngan kin, na nge epi mił pe simbii,’ pa nim. Pe erinjngił epi ombu mok topu, kingam tał ngum.

¹³ Pe kunum kinan enerang kin, kangi ekii ni eim epi pei sipi kin, konu turii eipi pupu mułum. Mołpu kin, eim ku ni, epi pei sipipi, oł kis erpi, wumb ngopu yi ełim.

¹⁴ Eim epi sipipi, wumb ngopu, yi erpi pang kin, ku poru nim. Neng kin, kumb kuni owundu simba kunum mandi erim. Pe eim epi endi sinerim mon.

¹⁵ Sinerang kin, eim pupu konu ele wu endi kin kongun eririm. Wu ei eim kindang, pupu kin, kung es tum.

¹⁶ Wu ei kung eim aka kis ngum. Ngang kin, aka kis ei eim kirim ele numbii, ni piim. Pe wumb endi eim kin epi endi ngunenjing mon.

¹⁷ Pe eim mołpu piim ni, ‘Na ernan nge kongun wumb ei, kuni pei seng nok er mołumun; ba na kuni je kułmbii end,’ ni piim.

¹⁸ Piipi kin, yi nim, ‘Nam ernan kin bii,’ pa nim. Pup kin, eim kanip nimbii, ‘Wusa, na nim kin, Gos kin oł kis enj,’ pa nim.

19-20 'Akip na wu ka endi mił onenj; na nim nge kangil pa ninenjii mon; ba na nim kin kongun wu mił mułmbii,' ” pa nim. Pe eim angpi kin, eim arim kin pum.

Ba eim pupu kin, konu turii ele mułum. Mułang kin, arim eim kenim. Kanpi kin, eim kingam kaimb sipi piim. Eim kaimb kis piipi kin, eim sikir pupu, eim kingam wunj kangilpi, gupu to num.

21 Pe kangi ni eim arim kanpi yi nim, 'Na wu ka mon; nim na kangil pa yi ninerii mon! Na nim kin, Gos kin, na ol kis enj,' pa nim.

22 Pe arim ni, kongun wumb kanpi yi nim, 'Enim puk kin, konduk olt ka wii ni sikir tu wuk kin, kangi ei talk kindei! Kindik kin, eim simb su kindik kin angil dong eim angil ele kindik, yi eriei!' pa nim.

23 'Puk kin, kung kou wal ka wii endi kanik kin to tu wangin kin, sinim kuni nopun, ka piyamin! Nimbił erang sinim eim onum nipin, ka piimin.

24 Nimbił erang, na kangi ei koltum ni piinj; ba nga konj mołpu kin nga orung onum. Eim am mendpił pum; ba nga orung onum,' nik ka piinjing.

25 Pe eim kingam kumna ei aka pin ele mułum. Ekii se opu kin, ngii orung ele mułum. Mołpu piim ni, golang nik, ek ka nik, non enjing, eim piim.

26 Pe kongun wu endi wii topu kin, kii sipi yi nim. 'Ei nimbił ol enmin?'

27 Wu ei ek yi nim, 'Nim nge angnim ni orung om. Wang kin, nim arnim kung kou wal ka wii endi to koipi kin, kingam om konu ka piipi kuim. Nimbił erang, eim kingam kułum ni piim; ba nga orung wang kin, eim noman ka piipi enim.'

²⁸ Ba eim kingam kumna ni popuł sipi, nirik punerim. Punerang kin, arim anda opu, ek ka kombur nipi ngum.

²⁹ Kingam ek nipi arim ngopu yi nim, ‘Kung ngii kinan na nim kin kongun wii minj er moł. Na nim niłin ek ei endi to kindnał mon; ba nim kung meme wał ni, endi na ngonan. Ngan kin na sip nam wu puł ombu ouni kin, kuni nok, ka piik, yi eranmin mon!’ pa nim.

³⁰ ‘Ba nim kinganim ei, nim ngurun epi no poru nipi kin, oł kis erpi, andłam amb kan andpi kin, nga orung wang kin, nin kung kou wał ka wii ei to koin,’ pa nim.

³¹ Pe arim ek nipi eim ngum; ‘Kangi! Kunum kunum nim na kin molkun, na epi ombu pei nim tep er mołun.

³² Ba pe sinim ka piipin kin, noman ka simba. Nimbił erang, ninim angnim koltum ni piinjpin; ba konj mołpu kin, nga orung onum. Eim am pum; ba sinim si orung sinmin,’ pa nim.”

16

Ek Ekin Topu Kongun Tep Er Mołumun Wu Ei Wu Kis

¹ Jiisas ek nipi, eim er se andiłim wumb ngum. Ngopu kin, yi nim, ‘Wu endi ku pei sałiłim wu ei eim nge kongun wumb, eim epi pei wu endi tep mondułum. Nga wumb kombur ok, wu num ei kanik kin, ek kis nik yi ninjing. ‘Nim tep mundun wu ei, nim epi pei wii si kindin,’ pa ninjing.

² Pe eim tep kongun wu ni, wii tang kin om. ‘Nimbił erang nim oł ei eran kin na ek ei piind?

Nim pukun kin, na epi pei nim kin salim mił ei nen piimbii,' pa nim. 'Nim nga na epi pei ni, na kongun wumb tep enenjii mon,' pa nim.

³ Pe kongun tep er mułum wu ni yi piim, 'Na nimbił oł ermbii? Wu owundu, na kongun wumb tep muls kongun ei, na tor kindmba ninim; na pup kin, mei akip ermbii ei, na dinga pinalim. Nga wumb kuni kenim nimbii ei, na singambił enim.

⁴ Ba nam epi endi ermbii piind oł ei eramb kin, wumb na sik, en enim ngii konu sipngii ei, wu owundu na to tor kindmba kunum ei, na wumb tep mulermbii kunum.'

⁵ Pe eim wumb endeim endeim ni, wii topu yi nim, 'Enim wu owundu kin epi endi ngo pendngii ei wei!' nim. Yi neng kin, wu endi ok om. Wang kin, kongun tep wu ei kii sim, 'Nim epi nipe mił, na wu owundu ei kin ngo pendin?'

⁶ Pe wu ni yi nim, 'Na wu owundu kin ming owundu kopung ei nge 100 pei sinj,' pa nim. Pe tep wu yi nim, 'Nim sirin pipe ei sin kin, pipe ei nge 50 ming minj pei sikir pulii,' pa nim.

⁷ Ekii se nga wu endi om. Wang kin, kongun tep wu ei kanpi yi nim, 'Nim na nge wu owundu ei kin, epi nipe mił nim sin?' Pe wu ni yi nim, 'Na kuni mong wiis kon 100 pei sinj,' pa nim. Neng kin, tep wu ni yi nim, 'Nim pipe sirin pipe ei tu wan kin, nga 80 pei kon minj pulnjii!' pa nim.

⁸ Nga ekii se wu owundu eim kongun tep er kis mundum wu ni, embe ambił tonu kindim. Nimbił erang, wu ei eim wumb noman ka peng enmin oł mił erim. Ba mei wumb en enim oł kis kanim kanim ei pułe erngii nge noman ka peng,

piik kun erik mołmun; ba Gos nge wumb tilang erang, oł ka er mołmun wumb ei yi mił mon!” Ya mei ełe wumb oł kis ełmin wumb ei nge enmin ei, wumb noman dinga peng, enmin oł erik kin, wumb tilang ełe mołmun wumb Gos nge wumb ei to mani kindinmin.

⁹ Na enim kanip nind, ‘Mei ełe ku ni epi ei sik, en enim wumb eipi ei ngok, yi erik kin, wumb puł ei tonu ongii. Pe ekii se ku ni epi ei poru nim kin, enim Gos mołum konu ełe puk epi ka wii orung singii.

¹⁰ Pe wu endi eim epi kembis ei kan kun er mołum kin, epi owundu ei kan kun er mułmba ku. Pe wu endi epi kembis ei, kongun kun er mulerim kin, epi owundu ei kongun kun enermba ku.

¹¹ Pe enim ya mei ełe epi kis ełe ku ei kan kun er mulenjing kin, wumb nii enim Gos oł epi ngang ei, kan kun er mułngii? Wu endi yi erpi kin, kan kun enermba mon.

¹² Pe enim mei ełe epi ei kan kun er mulenjing kin, Gos ninim ngumba epi ei, wumb ni kapli yi nimba epi ombu kan kun er se endnjii ei, nii mił endi yi nimba? Ei mon!

¹³ Wu endi eim noman dinga piim kin wu ei, mei ełe wumb wu owundu Seisen nge kongun ermba. Yi erim kin wu ei, Gos Owundu nge kongun kunum ende ermba ei kapli enanim, ei mon mendpił!

¹⁴ Lo ek piik ekii siłmin wumb en enim ku nin epi noman pałiim. Pe en enim molk piinjing ni, Jiisas ek ei neng kin, en enim Jiisas kin ek buł morung opu er ninjing.

15 Ba eim ek ni ngopu yi nim, “Enim oł ka enmin nik, wumb ningił ełe enmin; ba Gos enim noman ełe kaninim. Epi endi wumb en enim embe ambił tonu kindmin ei, Gos ningił ełe oł kis mendpił enmin.

16 Gos nge ek ka ni tor kindiłmin wumb ek ei ok pirim; nga lo ek ei ok pirim kunum ei, Jon wumb noł pendiliłim wu orum; ba Jon kunum ei o purum. Pe kunum ei Gos nge ek ka ei opu, konu orung orung pei punum. Pang ek ei yi mił; sinim Gos sinim tep er mołum konu ei, wumb pei piimin ei, wumb pei konu ełe tuk bin nik, kongun dinga ełmin.

17 Ekii se muł mei ei poru nimba; ba lo ek ei am punermba mon. Lo ek aninga wii kopur ku am punermba, ei mon!

18 Wumb pei en enim amb si kindik, amb eipi sik, wu eipi amb ei wunduk yi enmin. Pe wu endi eim ambim si kindrim amb ei, nga wu endi eipi sim oł ei, amb sinmin lo ei wu ei to kindpi kin, amb wundpu mił sim.”

Wu Endi Ku Sałiłim Wu Kin Lasaras Kin

19 “Ok ku ni epi pei sałiłim wu endi multum wu ei, eim konduk ka wii minj kindiłim. Wu ei kon kundii ka wii, wu king mił kindiłim; nga kunum kunum eim kuni ka minj nołum.

20 Wu ku sałiłim wu ei, ngii ondu ełe, wu endi epi sinałim wu endi mułum. Wu ei eim ngenj ełe mong mołpu kin, toru mił pei mułum wu ei embe Lasaras.

21 Wu ei eim piiliłim wu; ku ni epi pei sałiłim wu ei kuni nang kin, kuni elim ni, kuni mend ei eim

numbii ni piikim. Nga owu ok eim ngenj tonu o mułum ei, anmbil kin pen silmin.

²² Ekii se wu endi epi sinałim wu ni kułum. Kułang kin, Gos nge enjel ok kin, eim sipik, Eiparam kin ende mundnjung. Pe nga wu ku ni epi pei sałikim wu ei kułum. Kułang kin, sik tukpu to pendnjing.

²³ Pe wu ku ni epi pei sałikim wu ni, dup konu kis ele mołpu kin, ngenj kumbii owundu sipi mułum. Mołpu kin, tonu kind kenim ni, Eiparam mułum konu ei turii mił mułang kin, Lasaras mandi mułang kin, ouni mulnjunguł.

²⁴ Pe wu ku ni epi pei sałikim wu ok ku ngenj ele peng no endrim wu ni, wii dinga topu yi nrim. 'Ernan Eiparam! Nim na kaimb sikin, Lasaras kindan eim angil ei noł kindpi tu wang kin, na anmbil ele kindang jii nimba. Na ya dup ele ngenj kumbii owundu piind,' pa nim.

²⁵ Ba Eiparam yi nim, 'Kingnan, na nim piikin ok ninim konj multun kunum ei, nim epi ka kankin si nołun; ba Lasaras epi kis minj nołum. Ba akip kunum ele, eim noman ka seng mułang kin, nim ngenj kumbii owundu piin,' pa nim.

²⁶ 'Epi endi eipi yi pałim ku. Sin mołmun konu ei, enim mołmun konu ei, Gos duł owundu endi sałim duł ei, wumb ya mołmun wumb ei, enim mołmun konu ele onerngii mon! Nga wumb orung mołmun wumb ei, nga ya sin mołmun konu ele, onerngii mon ku!'

²⁷ Pe ok wu ku nin epi sałikim wu ni yi nim, 'Ernan, na nim kanip nind. Nim Lasaras kindan pupu, na ernan ngii konu ele ba,' pa nirim.

²⁸ 'Na engnan noł angil orung pei mołmun ei

Lasaras pupu, ek dinga neng kin, piingii. Mon peng kin, engnan oł ei noman ak tunenjing kin, na ya ngenj kumbii sip ei moł konu ełe, ongii ku, ei mon!’ pa nim.

²⁹ Ba Eiparam yi nim, ‘En enim Gos ek ka ni tor kindilmin wumb nge ek ni, Moses nge ek ei salim, min mon? Seng kin, ek ei piingii,’ pa nim.

³⁰ Pe nga wu ni yi nim, ‘Wusa Eiparam! Ei kapli enermba mon! Wumb koltmun wu ei endi pupu nimba, ei kapli piik kin, noman ak tungii,’ pa nim.

³¹ Pe nga Eiparam ek nipi wu ei ngum, ‘Pe Moses kin Gos ek ka ni tor kindilim wumb nge ek poł ei piinenjing kin; nga wumb kulii mer tukpu ełe angk tonu ok ningii ek ei, pii gii ninerngii mon ku.’ ”

17

Oł Kis Erpi Wumb Pii Gii Ei To Kindilim (Masu 18:6-7,21-22, Mak 9:42)

¹ Pe Jiisas eim er se andilim wumb kanpi yi nim, “Epi kanim kanim tonu omba ei je erang, wumb oł kis erngii. Ba wumb endi kis ei erang, wumb oł kis je erik mulnjung. Wumb endi oł kis erim wu ei, epi kis eim kin tonu wang kin, eim kaimb er mulmba.

²⁻³ Mon peng, wu ei mołpu, wumb kombur pii gii dinga pinalim wumb ei kin, oł kis erpi mulmba. Enim ku owundu endi sik kin, wu ei num goltum ełe kan to pendik sipik, ep noł ełe kindei!” nim. “Yi erangin kin, eim oł kis wu endi, wumb pii gii dinga pinalim oł kis je erngii ei, enermba, mon mendpil! Ei en enim kan kun er mulngii!

Pe nim angnim oł kis enim kin, nim eim ek dinga ngunjii. Nga eim noman ak tum kin, eim oł kis erim ei ni, ka enjii,' pa nim.

⁴ “Pe wu endi eim nim kin oł endi kunum angil orung nga tał pei erim kin, nga wu ei, orung opu, noman ak tumbii nim kin opu, kunum angil orung nga tał ermba. Yi erim kin, nim eim oł kis erim ei, kil ngo, ka enjii.”

⁵ Nga Jiisas nge ek se andilmin wumb, Owundu kanik yi ninjing, “Nim sin pii gii je erang opu kin, dinga pimba,” pa ninjing.

⁶ Pe Owundu yi nim, “Enim pii gii palim ei, kuni ‘Maser,’ nilmin, mong kembis wii mił yi pim kin; pe enim ond mong owundu tołum ond ei kanik yi ningii. ‘Nim puł pei pir pukun, ep noł peł ele, nga polkun piinjii!’ Nengin kin, ei kapli; enim ek ningii mił, ekii se sipi, piipi ba.”

Kongun Wumb Etmin Oł Ei

⁷ “Enim konu ele wu endi mołpu kin, eim wu kongun wii elim wu ei, eim kindang pupu, kung siipsiip es tołum min, kongun mei ele akilim min, er andpi wang kin, eim mołpu yi nimba. ‘Nim sikir wa! Kuni nunjii wa!’ nimba min?”

⁸ Min pe eim kin ek yi nimba; ‘Nim, na kuni er kun er sekin kin, ninim kan takin kin, na kuni si mengkin tu wunjii. Tu wan kin, na kuni kin noł ok namb; nga nim kuni kin noł kin ekii se nunjii.’

⁹ Wu endi eim kin kongun wii er mołulum wu ei, oł ka enim kin eim ka piipi ngumba min? Ei mon!

10 Yi pałim ei enim yi ku. Enim Gos ek nimba mił ei erngii ei kapli; ba enim yi ningii, ‘Sin kongun wu wii, sin kongun ei minj enmin.’ ”

Wu Engki Kinj Tum Ei Jiisas Er Ka Erim

11 Jiisas eim Jerusalem konu andlam ełe andpi pum. Pupu kin, Sameriya ni konu Galilii konu ełe tuk pum.

12 Pe eim opu konu endi tor wang kin, ngenj kinj bumbłum tum wu engki ok, eim kan sinjing ei, en enim konu turii mił engnjing.

13 Angk kin, ek nik wii dinga tok yi ninjing, “Jiisas tep wu owundu! Nim sin kaimb sinjii min?”

14 Pe eim en enim kanpi yi nim, “Enim puk, kułmał kałımin wumb mołmun konu ełe ngenj andan tungii. Tangin kin, kułmał kałımin owundu enim kin kułmał kelangin kin wumb pei keningii.” Yi neng pangin kin, en enim ngenj ei opu, ka erim.

15 Pe kinj bumbłum tum wu muljung konu ełe, wu endi eim kenim ni, eim ngenj ka seng kanpi kin, sikir orung pum. Pupu kin, Gos embe ambıl tonu kindim.

16 Wu ei pupu, Jiisas simb ełe gopsing pii poł mołpu kin, “Jiisas! Nim oł ka en!” pa nim. Wu ei eim Sameriya konu ełe wu.

17 Pe Jiisas wu ei kanpi, yi nim, “Na piip mił, wu engki kinj bumbłum tum ni piinj; ba wu angıl orung nga kapıl kapli kombur jili mołum?”

18 Pe wu kombur ok, Gos embe ambıl tonu kindngii onanmin? Ba ya wu konu eipi wu ei, mendpił om min?”

19 Pe eim kanpi, ek nipi ngum, “Nim angkin po! Nim nge pii gii je erang, er ka enim,” pa nim.

*Gos Sinim Wumb Tep Erpi Omba Enim
(Masyu 24:23-28,37-41)*

20 Pe lo ek piik silmin wumb Jiisas kii sinjing, “Kunum ngenj Gos opu, sinim tep erpi omba?” Pe Jiisas ek nipi, orung kindpi yi nim, “Gos opu sinim tep ermba kunum ei, omba ol ei, enim ningil ele kinerngii mon!” pa nim.

21 “En enim piinmin! Wumb ek yi ninerngii, ‘A ya ele mołum, mon orung mołum,’ yi piinmin. Gos sinim ya tuk tep er kanpi mołum.”

22 Jiisas eim nge er se andilim wu kanpi yi nim, “Enim nge noman ele ek dinga piingii. Pe mei mani nga opu wu kingam ei, omba ol ei kenmin; ba enim kan sinerngii mon!

23 Enim mułngii konu ele wumb yi ningii, ‘Orung ele mołum, a mon ya mołum. Ya onum, mon wul onum, mon al ele onum.’ Yi nik erngii ei, enim piik, ekii sik punerngii, mon!

24 Ei yi mił elim, kupu tilang enim, ei tonu, wul, al pulum. Pe wu mei mani, nga wu kingam opu mei ele wu kingam telim wu ei, eim omba kunum ei, sikir wang kin, wumb pei keningii.

25 Ba ok wu ei, eim ngenj kumbii sipi erang kin, akip kunum ele mołmun wumb, en enim wu ei kin, buł ngungii,” Jiisas yi nim.

26 “Ok Nowa kanu mulk wumb ol yi tonu orum mił; nga ekii se, wu mei mani nga opu, wu kingam telim wu ei, yi ku erngii.

27 Ok wumb pei yi erik puk, amb ngok, amb sik, kuni nok, nol nok, yi er pangin kin; Nowa eim nol

kanu owundu eġe tuk purum kunum ei, wumb pei kulnjung poru nim.

²⁸ Nga Los multum kunum ei, wumb yi erik ku. Noġ nok, kuni nok, kongun erik, epi emb talk erik, ngii takik, epi top erik sipik, nga wumb eipi kin ku sik, yi erik.

²⁹ Ba Los eim Sorom konu ei si kindpi purum ei, dup kin ku sulpa ni, ei konu kumb miġ, muġ eġim epi ei, Gos kindang orum. Opu kin, wumb pei to kundrum.

³⁰ Pe yi ku, mei mani nga opu, wu kingam moġum wu ei, tor sikir omba kunum ei, oġ yi ku ermba,” pa nirim.

³¹ “Kunum eġe, wu endi ngii tondrung moġpu; nga mani opu, nirikring eim epi simbii nipi omba ei, kapli enermba. Yi miġ ku, wu endi eim aka pin eġe muġmba ei, nga orung pupu, ngii konu epi endi sinermba mon!

³² Enim Los ambim erim oġ ei piingii. Amb ei ak to kan orung kind kanpi kin, eim ku miġ poġpu angrim.

³³ Wu endi eim noman konj kunum kunum moġpu kin, eim sipi orung simbii ni ermba wu ei, eim noman konj am ba. Pe wu endi eim nge noman konj ambil gii ninarpi, muġmba wu ei, eim ekii kunum kunum ka muġmba.

³⁴ Na enim kanip nind. Akip kunum eġe, wu taġ ngii endeim eġe or pingil ei, Gos wu endi sipi, endi pindang pimba.

³⁵ Pe nga amb taġ eġ eġip, aka pin kongun ouni eġmbil ei, Gos amb endi sipi kin, endi mundang muġmba.

³⁶ (Pe wu tał pani pin ele mułnguł ei, Gos wu endi sipi kin, wu endi mundang mułmba.)”

³⁷ Jiisas eim nge kongun wumb ek ei piik, kii sik yi ninjing, “Owundu, epi ei er omba mił nenj?” Pe Jiisas ek nipi, orung kindpi yi nim, “Wumb min epi endi kołpu pałim konu ele, kei sikapi puk, kułou tok mołumun. Yi mił ku, mei mani opu wu kingam tałpi mułum ei, sikir tor omba kunum ei, wumb pei eim keningii.”

18

Ek Ekin Ei Ek Pii Kun Elim Wu Kis

¹ Jiisas ek ekin endi nipi, er se andiłim wumb ngum, “En enim kunum kunum enim prei erik kin, enim ten kulk yi enerngii,” pa nim.

² Eim ek yi ni nim, “Konu owundu kos piilim wu endi mułum wu ei, Gos kin men tunałim. Nga eim wumb kin kaimb piinałim ku.

³ Amb endi wam kultum amb ei, konu ele mułang kin, kunum kunum amb ei opu, yi niłim. ‘Na nga opu orung wumb ei onmun. Nim na paki tokun kin, na kin kos piinjii,’ pa niłim.

⁴ Kos piilim wu ei ok, ‘Nam amb ei paki tunerbii,’ ni piim. Nga eim noman ele yi piim ei, ‘Gos kin mund mong kulerbii; nga na wumb ombu kin piinerbii ku,’ niłim.

⁵ ‘Ba amb ei wam kultum amb ei, na kin kongun owundu ngołum ei, na eim kos ele paki top nimbii,’ pa nim. ‘Kos piinerałim kin, kunum kunum wang kin, na piip kis piimbii,’ ni piim.”

⁶ Pe Owundu ek yi nim, “Enim kos piipi kun elim, wu kis ei, nipi ek ninim ei, enim piyei!

7 Nimbil erang Gos eim nge wumb sipi, mundum wumb ei, kunum kunum epin, tinga pei, Gos kin ke minj nik mołmun. Gos wumb ombu kos ełe paki tumba min mon? Pe eim kunum kinan er mołpu kin, ekii se paki tołum min mon?

8 Na ek nip enim ngond. Gos eim wumb ombu sikir paki tumba. Ba ekii se, wu mei mani opu wu kingam wu ei, ekii se opu kenmba; ya mei ełe wumb pii gii nik, prei erik, er mułngii min mon? Ei opu kenmba.”

Kułmał Kalikmin Wumb Kin Ku Takis Wumb Ek Ekin Ei

9 Wumb kombur en enim yi piinmin, “Sin oł ka erpin pii gii nipin mołmun,” ni piikmin. Piik kin, wumb kombur ei, wumb kis mołmun nik piikmin. Ba Jiisas ek ekin topu, wumb ei ngum.

10 Ngopu yi nim, “Wu tał Gos kin prei erngił, pendkił pukuł, men ngii owundu ełe tuk punjnguł. Wu endi ku takis siłim wu, nga wu endi lo ek ekii sipi ełim wu, wu tał punjnguł.

11 Pe lo ek ekii sipi ełim wu ei eim eipi pupu angpi, prei yi erim, ‘O Gos, na wu kombur mił mon. Na nim kin ka piip ngond. Nga wumb epi waning sik erik, oł kun enarik kin, amb wam mołum ei wunduk enmin oł ei, na yi enał mon! Pe na ya wu ei ku takis sipi ełim wu ei mił, na mon ku.

12 Kunum kunum kongun endeim tuk ełe, kunum tał ni ku, na kuni nonarip mowii peł. Pep kin, kuni ni epi pei ei mok top engki erip, eipi epi kandip, endeim ni ku nim ngoł.’

13 Ba ku takis silim wu ei, eim konu turii engim. Angpi kin, ei epin konu kinerim mon! Nipi kin, eim pepil eŕe topu ek nim, ‘O Gos, na oŕ kis eŕ wu. Gos nim na kaimb se!’ a nim.

14 Na enim kanip nind; wu ei ku takis silim wu ei, Gos nge ningil eŕe wu ei, kun moŕum; ba lo ek ekii sipi elim wu ei mon. Wu endi eim embe si tonu kindmbii ni ermba wu ei, Gos wu ei to mani kindmba. Ba wu endi, eim embe to mani kindmbii ni ermba, Gos wu ei, eim embe ambil tonu kindmba.”

*Jiisas Noman Ka Ek Nipi Kangil Ngum
(Masyu 19:13-15, Mak 10:13-16)*

15 Pe kangil kembis Jiisas moŕum konu eŕe to wangin kin, Jiisas angil tonu peng eŕe kindpi, ek kengip ngumba ni tu wunjung. Ba Jiisas nge ek se andilmin wu ombu kanik kin, wumb ek ngunjung.

16 Pe Jiisas kangil kembis ombu wii topu, mandi sipi, ek yi nim, “Enim kangil kembis ei kun erangin kin, na moŕ konu eŕe wangin kin, Gos sinim tep erpi moŕum oŕ ei, wumb pii gii pim kin, kangil miŕ yi Gos oŕ ei sinmin,” pa nim.

17 “Na ek ei keimi nip enim ngond. Gos sinim tep er moŕum oŕ ei, tuk ba, ei kangil yi miŕ; wu endi ek ei pii gii ninenim kin, Gos sinim tep er moŕum konu eŕe tuk punermin, mon!”

*Wu Num Ei Epi Pei Moŕum
(Masyu 19:16-30, Mak 10:17-31)*

18 Pe Jura wumb nge wu num endi Jiisas kin kii sipi, ek ni ngoŕum. “Wu ka wii, na noman konj sip kunum kunum er muŕmbii miŕ nenj?”

19 Pe Jiisas ek nipi ngum, “Nim na wu ka wii nin; ba Gos endeim mendpil ka wii mołum. Nimbił erang nim ek yi mił nin? Nim kan kun erkin piinjii.

20 Gos kengip ek Moses ngurum ek ei nim piilin. Ek yi niłim, ‘Ek kend tokun ninenjii; nim epi wangin enenjii; wumb to kundnenjii; amb wam mułmba amb ei wundnenjii; ninim arnim manim ek ningii ei piikin, ekii sinjii.’ ”

21 Pe wu num ni ek yi nim, “Na kangil kembis kin moł; pe op wu dinga moł ei, na oł ombu poru ekii sip poru nił,” pa nim.

22 Jiisas ek ei piipi, ek nipi, wu ei ngum, “Nim epi endi sinarpi nim kin, nim epi pei wumb ngokun, nga ku sinjii ku ei, wumb kurpu wii mułngii wumb ei ngunjii. Nim oł yi en kin, nim epi ka wii epin konu ełe sałim epi ei, am punałim mon! Epi ei nim sinjii. Pe nim na ond konu ełe ekii se oi!” pa nim.

23 Ba wu num ni, ek ei piipi, eim noman embin to piim. Nimbił erang wu ei, eim ku nin epi pei sim ei, wakin top si kindip punermbii ni piim.

24 Jiisas wu ei kanpi yi nim, “Wumb ku pei sałimmin wumb ei, Gos sinim tep er mołum oł ei, singii ei, kaplı enermba mon! Ba wumb ei kongun dinga erik singii.

25 Pe kung kamil ya gal alap mui gal tundii ełe mił ondu kembis ei tuk bii ni ermba; ba ei kongun dinga erpi, ngenj kumbii sipi tuk ba pałim. Yi mił ku, wu ku nin epi pei sałim wu ei, Gos sinim tep er mołum oł ei, simbii ni ermba; ba eim kongun dinga wii erpi, noman embin sipi, simba pałim

ku.”

²⁶ Wumb ek ei piik, yi ninjing, “Ek mon wu, wumb nii endi epi erpi kin noman konj sipi kunum kunum mulmba?”

²⁷ Ba Jiisas ek yi nim, “Epi endi wumb erngii kapli enermba mon; ba ei Gos kapli ermba,” pa nim.

²⁸ Pe Piisa ek yi nim, “Piini! Sin kongundpun, ngii, mei, amb kangil ni, epi si kindpin, nim kin ekii se onmun.”

²⁹ Pe Jiisas ek nipi, eim er se andilim wu ombu ngum, “Na ek keimi nip, enim ngond. Wumb endi Gos sinim tep er mołum oł ei, kongun paki topu erpi wu ei, eim amb angim noł, arim mam kangil ni, epi pei si kindpi omba.

³⁰ Wu ei nga akip Gos epi pei ngo orung kindpi oł ka erang kin, nga ekii se epin konu ka ele, noman konj kunum kunum sipi, ka mulmba,” pa nim.

³¹ Pe Jiisas eim nge ek se andilmin wu, engki nga tał sipi, ek yi nip ngum. “Enim kinei! Akip sinim Jerusalem konu ele tonu punmun. Ok Gos ek ka ni tor kindilmin wumb ek mon polk, pei yi nik, wu mei mani opu wu kingam mołum wu nik, ek keimi tor omba.

³² Pe nga Jura wu num kombur eim sik kin, wumb tilap eipi endi ngungii. Ngangin kin, wumb ei eim kin ek buł morung nik, oł kis erik kin, jipambil tok erngii.

³³ Erik kin, kepil tok, ond peri ele to kundangin kin, nga kunum tekliki ele, nga konj angpi tonu ba,” pa nim.

³⁴ Ba Jiisas eim nge ek se andilmin wumb ei, ek ei puł pii poł tunenjing. Pe eim ek ei puł koi

erim. Pe eim nge kongun wu ombu, eim ek ei pii kun enenjing.

Wu Endi Ningiġ Tumbun Muġum Wu Ei, Jiisas Er Ka Erim

(Masyu 20:29-34, Mak 10:46-52)

³⁵ Pe Jiisas eim Jeriko konu eġe tor wang, wu endi ningiġ tumbun multum wu ei, andġam wer eġe muġpu kin, wumb ku nin epi ngei, ni multum.

³⁶ Pe eim muġpu piim ni, wumb pei onjung. Wangin kin, eim wumb kii sim, “Ei nimbiġ oġ enmin?” a nim.

³⁷ Pe wumb eim kanik, yi ninjing, “Jiisas Naseres konu eġe wu onum,” pa ninjing.

³⁸ Wu ni wii dinga tum, “Jiisas, nim King Deipis nge miyem ende wu. Pe nim Owundu muġun, na kaimb se!”

³⁹ Pe wumb kumb se onjung wumb ei, eim ek ngunjung, “Nim ek tingnar!” ninjing. Ba wu ei, wii dinga nga tum. “Jiisas nim King Deipis nge miyem ende kingam, na kaimb se!”

⁴⁰ Jiisas opu angpi, wumb kanpi kin, ek yi nim, “Wu ei, ya tu wei!” nim. Wu ni mandi opu angang kin, Jiisas eim wu ni kii sim.

⁴¹ “Na nim kin, nimbiġ oġ ermbii ni piikin nin?” Pe wu ni yi nim, “Owundu, na ningiġ ei, ka seng, kenmbii nip nind,” pa nim.

⁴² Pe Jiisas wu ei kin, ek nipi ngum, “Nim ningiġ eġe tiġang ermbe ei, ninim nge pii gii je, er ka enim,” pa yi nim.

⁴³ Yi neng kin, sikir wu ni, ningiġ ka seng kenim. Wu ei, Jiisas pum konu eġe, ekii se pupu, Gos embe ambiġ tonu kindim. Kindpi kin, wumb

en enim ol ei, kanik kin, Gos embe ambil tonu kindnjing ku.

19

Jiisas Kin Sakiyas Takis Silim Wu

¹ Jiisas Jeriko konu ele tor pupu, nga bii ni pum.

² Wu endi mulum wu ei, embe Sakiyas. Wu ei, wu ku takis silmin wumb ei, tep er molulum. Wu ei, eim ku nin epi pei salilim.

³ Eim Jiisas kenmbii ni piim; ba wumb pei onjung. Sakiyas eim wu osii peng kin, Jiisas kenmba mil pinerim.

⁴ Pe eim sikir kumb se pupu, ond endi 'Sikimor' nilmin ele, tonu pum. Pupu, molpu kin, Jiisas andlam ele, omba kenmbii ni mulum.

⁵ Pe Jiisas konu ele tor opu, kan tonu kindpi yi nim, "Sakiyas, nim ond si kindkin sikir mani wa! Akip na nim kin mulmbii," pa nim.

⁶ Pe eim ka piipi, sikir mani om. Opu kin, Jiisas sipi, eim ngii konu ele sipim.

⁷ Pe wumb pei kanik kin, ek kis ninjing. Nik kin, yi ninjing, "Jiisas eim wu kis ei kin, or pimba punum," ninjing.

⁸ Pe Sakiyas eim opu wumb kumb ele angpi, yi nim, "Owundu, akip na epi pei kulou to mondup kin, epi orung sip, wumb epi sinalim wumb ei ngumbii. Nga orung sipip, wu endi kin epi waning erir konu ele, wu ei kin, kunum kapik kapli sipi, ngo orung kindmbii," pa nirim.

⁹ Pe Jiisas eim ek nipi ngum, "Akip nim ni ninim nge wumb, ya ngii ele molmun wumb ei, Gos sipi, orung sinim," pa nim. Pe nga ek nipi, wumb

ngopu yi nim, “Pe wu ei Eiparam nge tilap ende wu.

¹⁰ Wu mei mani opu wu kingam telim wu ei, wumb am punjung ei, sipi orung simba nge om.”

*Kongun Wu Engki Ku Sinjing Nge Ek Ekin Ei
(Masyu 25:14-30)*

¹¹ Wumb ek ei piyangin kin, Jiisas nga ek ekin topu ngum. Nimbił erang Jiisas eim Jerusalem konu ełe mandi om. Wumb yi ku ni piinjing ei, Gos sinim tep er mołum oł ei, mandi tor omba enim, ni piinjing.

¹² Piyangin kin, eim ek ekin yi nim, “Wu Owundu endi konu turii endi pupu, king owundu mundangin mołpu kin, nga orung omba nge punum.

¹³ Wu owundu ei opu kin, eim ku engki mił sipipi, eim kongun wu engki wii topu, ku ngond ei sik, kongun erik mułngii. Mułangin kin, “Na nga orung ombii,” pa yi nim.

¹⁴ Wumb konu ende wumb ei, wu owundu kin kis piinjing. Piyangin kin, wu owundu ei, eim si kind pendpi pum. Pang kin, wumb kombur ekii se punjung. Puk kin, yi ninjing, “Sin wu ei king mulermba,” pa ninjing.

¹⁵ Ba mon, wu ni king mundangin kin, nga si kind orung om. Opu kin, yi nim, “Na ok ku ngunj wu ombu, wii tangin wangin,” pa nim. “Na piimbii, kongun erik ku nimberii orung sinjing ei, piimbii,” pa nim.

¹⁶ Pe wu endi kumb se opu yi nim, “Wu owundu, nim ku endeim mił na ngun ei, na kongun erip pup kin, kum endeim nga sinj,” pa nim.

17 Pe king ni yi nim, “Nim kongun wu ka, nim kongun ka en. Nim epi kembis ei tep ka en ei akip na nim kindamb pukun, konu eġe owundu orung orung saġim ei, konu engki pei tep enjii,” pa nim.

18 Nga kongun wu endi opu yi nim, “Wu owundu, nim ku endeim miġ na ngun ku ni, kongun er piip kin, ku angil orung miġ sinj,” pa nim.

19 Pe wu owundu yi nim, “Na nim kindamb pukun kin, konu eġe owundu angil orung pei tep er mulnjii,” pa nim.

20 Pe nga kongun wu endi om. Opu kin, yi nim, “Wu owundu, nim ku endeim miġ ni, ya alap kin kum to pendinj paġim,” pa nim.

21 “Nimbiġ erang na nim kenj ni, nim wu wumb kin ek nikin eġin. Na kanip kin, nim kin mund mong kuls. Nim wumb eipi epi sikin, nga kuni wumb eipi kuni ei siġin.” Nga epi eipi nge nim sikin yi eġin.

22 Pe king ei ek dinga nipi, kongun wu ei ngum, “Nim kongun wu kis, ninim nin ek eġe, na nim kos er ngumbii. Keimi nim piin; na wu wumb kin ek dinga nip erip, epi wumb eipi nge ei pup sip kin, kuni wumb eipi nge sip eġe nin min?”

23 Nim na ku ei mer ku beng eġe tuk kind sen eġe, kongun er pukun, na ku endi seng, nam op kin, simbii ei, nimbiġ erang kindnen?”

24 Wumb mandi mulnjung wumb ei kanpi yi nim, “Enim wu ei, ku endeim miġ ei, sik sipik, wu endi ku kum endeim saġim wu ei ngei!” pa nim.

25 Pe wumb yi ninjing, “Owundu, ei wu ku kum endeim sim,” pa ninjing.

26 Eim ek yi nim, “Na enim kanip nind. Wu

endi epi pei simba wu ei, epi nga na epi pei eim ngumbii. Nga, wu endi eim epi kembis simba epi ei, na sip orung simbii,” pa nim.

²⁷ Ba pe wumb na kin opu orung er nik, ‘Sin kin king mulermba ninjing wumb ei, na ya eġe kumb ningiġ eġe tu wuk, to kundngii!’ ” pa nim.

Jerusalem Konu Owundu Eġe Jiisas King Miġ Tuk Pum

(Masyu 21:1-11, Mak 11:1-11, Jon 12:12-19)

²⁸ Jiisas ek ei nipi pendpi, eim andġam eġe ok andpi pupu kin, Jerusalem konu eġe tor pum.

²⁹ Pe eim pupu, Bespeis ni, Besanii konu eġe mandi opu, komung endi, ‘Olip,’ wumb yi niġmin, konu eġe tor pum. Pupu kin, eim nge ek se andiġmbiġ wu taġ kindang, kumb se punjngiġ.

³⁰ Eim wu taġ kanpi, yi nim, “Eġip konu orung eġe peġ. Pukuġ kin, konu endi tuk pu keningiġ ni, kung dongkii waġ endi, kan kuġ kindnjing paġim ei ok wumb mulenjing kung dongkii ei, kan pos si mengkiġ, tu weġ!” pa nim.

³¹ “Wu endi eġip kii sipi, ‘Kung dongkii ei, nimbiġ erngiġ enmbiġ?’ Yi nipi nim kin, eġip yi ningiġ, ‘Siġ Owundu ei, kongun peng tu weġ neng, enmbiġ pa ningiġ,’ ” pa nim.

³² Pe Jiisas wu taġ kindang pukuġ, kenjngiġ ni, Jiisas nim miġ yi kenjngiġ.

³³ Pe wu taġ ni, kung dongkii kan pos sikiġ, pengiġ. Kung dongkii arim opu, kanpi yi nim, “Nimbiġ erang eġip kung dongkii waġ kan posinmbiġ?”

³⁴ Pe wu taġ ni, yi ninjngiġ, “Siġ wu Owundu ei, kongun peng tu weġ neng, enmbiġ,” pa ninjngiġ.

35 Pe wu taʔ kung dongkii ni, Jiisas muʔum konu eʔe, tu wunjnguʔ. Pe eʔ eʔip konduk ei sikiʔ kin, tonu kung dongkii eʔe sengiʔ kin, Jiisas tonu peʔ eʔe muʔum.

36 Jiisas kung dongkii eʔe moʔpu pang kin, wumb en enim nge wu Owundu onum ni piik, en enim konduk gulk, andʔam eʔe sengin pum.

37 Pe eim opu, komung Olip eʔe mandi mani ba erang kin, pe eim nge ek se andiʔmin pei wu ombu, ka ka piinjing. Piik kin, “Sin jep oʔ pei kenjpin,” nik, wii dinga tok kin, Gos embe ambiʔ tonu kindnjing.

38 Pe enim wii dinga tok, yi ninjing, “Owundu nge embe eʔe, king ei onum ni, Gos embe ambiʔ tonu kindmba,” nik yi ninjing. “Pe epin konu eʔe emin ngo, ka sengi. Seng kin, nga Gos embe tonu mendpiʔ pangli.”

39 Pe lo ek piik ekii sik eʔmin wumb kombur, wumb tuk eʔe molk ei, piik yi ninjing, “Ek mon wu Owundu, nim nge ek se andiʔmin wu ombu, ek ngo.”

40 Pe Jiisas ek nipi, orung kindpi yi nim, “Na enim kanip nind. Ek nik wii tok yi enerangin kin, kom ku ombu, kapʔi wii tok, ek tengingii,” pa nim.

41 Jiisas eim Jerusalem konu eʔe mandi opu, wumb ombu kanpi kin, ke nim.

42 Nipi yi nim, “Pe enim oʔ ka ombu piik, noman emin sek kin, ka piingii. Ba pe epi ombu koi er paʔim ei, enim kinerngii,” pa nim.

43 “Ekii se kunum endi tonu omba ei, enim nge opu orung wumb ok, enim muʔngii konu eʔe sik, pok pok erik, mei akikik, mei ngo tonu kindik

monduk, enim kin opu ermin nik, yi erngii,” pa nim.

⁴⁴ “Pe nim kinganim noł ni, nim kin tuk mułngii wumb ei kin, pei to kundngii. Pe ku endi sik, ku endi peł ełe pindnerngii! Nimbił erang enim Gos opu paki tumba kunum ei, pii poł tunenjing,” Jiisas ek yi nim.

Gos Ngii Owundu Ełe Wumb Epi Top Enjing Ei Jiisas To Kindim

(Masyu 21:12-17, Mak 11:15-19, Jon 2:13-22)

⁴⁵ Akip Jiisas eim men ngii owundu ełe nirik pupu, wumb men ngii ełe epi top er mulnjung ei, to tor kindim.

⁴⁶ Eim ek dinga nipi yi nim, “Gos nge ek ełe, yi ninim, ‘Na nge ngii ełe prei ngii simba;’ ba enim erangin kin, ngii kis mołpu kin, ngii ei, koi er seng kin, wumb epi waning erik kin, er kis mondunmun.”

⁴⁷ Pe kunum kunum eim wu amb sipi, men ngii owundu ełe, ek emb to ngopu yi ełim. Erang kanik kin, lo ek pułmun wumb ni, lo ek piik ekii silmin wumb ni, wumb tep ełmin wu num ombu ni, eim to kundngii nge andłam kurnjung.

⁴⁸ Ba wumb pei Jiisas eim ek piimin nik, eim endim konu ełe wumb pei endinjing. Pe wu num ombu, eim kin ek endi nik, to kundngii nge andłam endi sinerim, mon.

20

Wumb Jiisas Kii Sik, “Nim Nii To Mundum,” Ninjing

(Masyu 21:23-27, Mak 11:27-33)

¹ Kunum endi Jiisas men ngii owundu eġe ek ka nipi, wumb ngum. Pe lo ek piik ekii sik eġmin wumb ni lo ek poġmun wumb ni, wu num ombu, nirik onjung ku.

² Nga wumb ombu, eim kanik yi ninjing, “Nim sin kankin nei! Nim dinga ei, jiki sikin okun nin? Nim noman dinga ei, nii ngopu oġei, erii nim?”

³ Pe Jiisas ek nipi, wumb ombu ngopu ek nim, “Pe yi ku, enim na kii sinmin oġei nge, enim kii simbii. Enim na ek nei!

⁴ Jon wumb noġ pendilim oġei, Gos epin konu eġe dinga ngum min; ya mei wumb eġmin oġei, dinga sipi erim min?”

⁵ Pe wumb en enim yi ninjing, “Sinim ei epin epi pa yi nimin ei, kapġi eim yi nimba, ‘Nimbiġ erang enim eim ek pii gii ninenjing?’ nipi yi nimba,” yi ni piinjing.

⁶ Pe ‘Sinim wumb oġ minj,’ pa nimin ei, wumb piik kin, Jon Gos ek kan ni tor kindilim wu nik, pii gii nik, sinim tungii,” pa ninjing.

⁷ Pe wu num ombu ek nik, Jiisas ngok yi ninjing, “Sin pii poġ tunanmin,” pa ninjing. “Jon wumb noġ pendilim wu ei, eim nge dinga konu jiki siġim?”

⁸ Pe Jiisas ek nipi, ngopu yi nim, “Yi miġ ku, na enim kanip ninermbii ei, na nipe dinga paġim.”

*Kongun Wumb Kis Ei Nge Ek Ekin
(Masyu 21:33-46, Mak 12:1-12)*

⁹ Pe Jiisas eim ek yi nipi pendpi, ek ekin endi nipi, wumb ngopu yi nim, “Wu endi eim ond mong wain konu ei teġim. Pe ond mong wain konu ei sipi, wumb kombur kongun erngii wumb ei ngang kin, ekii se wumb ei, ond mong wain

orung kindngii ni ngum. Ngopu pendpi kin, eim konu turii endi pupu, kunum kinan mułmba pum.

¹⁰ Pe ond mong wain ei nołmun kunum mandi erang kin, ond mong wain arim ei, eim kongun wu endi kindang opu kin, wumb ond mong wain kongun er mulnjung konu ełe om. Pe eim yi ni piim, 'Kongun wu ombu, ond mong kuni aninga ngangin kin, tu wumba,' nipi kindang om. Ba wumb kongun ełe er mulnjung ei, kongun wu ei, kepii tok, ek ngok, wii to tor kindnjing.

¹¹ Pe nga, wu endi nga kindang om. Ba wumb yi ku nga erik, wu ei tok, eim kin oł kis erik, wii pui nengin kin, pum.

¹² Pe nga wu endi kindang om. Ba wu ei, kepii tok, miyem sik, olkup to tor kindnjing.

¹³ Pe wumb yi erangin kin, ond mong kuni arim ei, yi ni piim. 'Na er ermbii mił nenj?' nim. 'Pe na kangı endeim ei na eim noman ngoł kangı ei, kindmbii ei, eim kaplı ek nimba ek ei piingii,' pa nim.

¹⁴ Ba kongun er mulnjung wumb ei, kenjing ni, wu num ni kingam om. Kanik kin, en enim ek nik, piik enjing. Erik kin, yi ninjing, 'Wu ei, eim arim nge epi eim simba wu ei, sin tamin! Topun kin, ya konu ei, sin sinim kongun er mułmun,' pa yi nik mulnjung.

¹⁵ Pe wu ni ambıl gii nik, sipik tor sipik, to kundnjung.

Ek ekin top yi nim, 'Pe wu num ei wumb kongun wumb ei kin, nipe oł ermba?'

¹⁶ Wu num ei opu, ond mong wain konu ełe kongun enjing wumb ei, pei to kondpu kin, ond mong wain konu ei wumb eipi endi ngumba. Pe

wumb en enim ek ekin ei piik kin, yi ninjing; “Mon peng yi enermba,” ni piinjing.

¹⁷ Ba Jiisas eim wumb kan orung kind kanpi kin, ek yi nim. “Ek ei nipe ek Gos ek poluʔmun ek puʔe er piimin min mon?”

‘Wumb ngii tekmin wumb ei, ngii tumunj ei si kindik; ba tumunj ei, ngii tumunj ok nge mendpiʔ tonu orum.’

¹⁸ Pe wumb pei ngii tumunj eʔe, bok tunjung kin, wumb glas ming miʔ tumb tumb ermba; min ngii tumunj ei, mani opu wumb topu nim kin, wumb ei kuʔngii ngenj kinerngii, kuʔman miʔ ermba,” pa nim.

*Jiisas Siisa Kin Ku Takis Ngumba Nik Kii Sinjing
(Masyu 22:15-22, Mak 12:13-17)*

¹⁹ Jiisas ek ekin endi nipi kin, kuʔmaʔ kaʔiʔmin wumb owundu ni, lo ek poluʔmun wumb ombu, piingii nge piipi nipi ngum. Ngang kin, pe kunum eʔe mendpiʔ eim ambiʔ gii ningii miʔ pim; ba wumb pei muʔangin kin, en enim mund mong enjing.

²⁰ Erik kin, Jiisas ermba oʔ endi koi er kan mulnjung. Muʔangin kin, eim oʔ endi ermba ni kan mulnjung wumb ei, wu kombur kindangin ok, Jiisas eim ek nipi ermba ei, ok kan mulnjung. Ok kan mulnjung wu ombu, ek kend tok, ek kun miʔ ninjing. Nik, “Eim ek yi nim,” pa nik kin, eim ambiʔ gii nik, ek piipi kun elim wu, gapman owundu muʔum konu epi sipngii enjing.

²¹ Pe wumb ombu, Jiisas kii sik, ek ninjing, “Ek mon wu, nim nin ek ei sin piinmin ei ek kun paʔim. Pe nim ek kun nikin, wumb ngokun eʔin.

Pe nim wumb mei ele wumb pei, kankin ek ei, ek ende minj nikin pulun. Ninim Gos nge ek ei mendpił nikin, wumb ngokun yi minj ełin.

²² Pe nim er piin mił nenj? Sinim Siisa wu owundu ei kin takis ngumun min mon?”

²³ Ba Jiisas eim oł kend tui ei enjing ei, Jiisas eim piim. Piipi kin, eim ek nipi, wumb ombu ngum.

²⁴ “Pe enim ku endi na andan tungii. Tangin kin, ku ele min men endi mołum ei, wumb nii mołum?” Pe wu ombu yi ninjing, “Min men ei Siisa mołum.”

²⁵ Pe Jiisas ek nipi ngopu yi nim, “Pe enim Siisa nge epi ei Siisa ngungii. Pe nga Gos nge epi ei Gos ngungii,” pa nim.

²⁶ Wumb pei mulnjung konu ele, ek neng kin, Jura wu num ombu, kunum endi eim ambil gii ningii pinerim. Eim ek nipi, orung kindim ek ei, piik noman embin tang kin, ek nik orung kindngii pinerang kin, gupu mum to mulnjung.

Wumb Kolk Nga Konj Mołmun Nik, Jiisas Kii Sinjing

(Masyu 22:23-33, Mak 12:18-27)

²⁷⁻²⁸ Pe wumb kolk nga konj tonu piinarik piilmin wumb tilap kombur ok, ek yi nilmin. “Wumb kulnjung wumb ei nga konj tonu punerngii,” nilmin wumb ombu, Jiisas kii sik yi ninjing, “Ek mon wu, Moses lo ek endi yi pultum. ‘Pe wu endi amb sipi, mołpu kin, kulmba ei, eim ambim kangil endi mulerim kin, eim nge angim amb ei simba. Sipi kin, eim angim nge kang ambil mengpi simba.’”

29 Pe wu endi eim angim noł angil orung nga tał muljung. Wu kumna amb sim ei, kangil endi mingnarpi kin, kultum.

30 Nga angim amb ei sim kin, eim kulum ku.

31 Kulang kin, nga angim endi sim ei ku, wu ni kulum. Yi mił, wu angil orung nga tał pei, amb endeim minj sik kolk, yi minj er puk. Wu angil orung nga tał pei ok, kangil endi mingnarik kin, kolk poru ninjing.

32 Nga ekii se, amb ei eim mendpil kultum ku.

33 Pe wumb kulii, nga konj tonu ongii kunum ei, amb ei, wu nii ambim mendpil mulmba? Wu angil orung nga tał, amb endeim ełe sinjing ei, wu nii amb ei, wam mendpil mulmba?’ ” pa ninjing.

34 Pe Jiisas wumb ei ek nipi ngum, “Wu amb ni, akip kunum ełe, en enim wu amb seng kin, yi enim.

35 Wumb nii endi, Gos kunum ekii se kapli konj tonu ongii nimba wumb ei, noman konj kunum kunum sik mulngii wumb ei, wu amb sik erngii ei, pii poł tunałmin mon!

36 Nga wumb ei, nga kulerngii. Nimbił erang, Gos nge enjel mołmun mił yi mulngii. Gos eim wumb ei tukpu ełe, nga tonu konj sim ei, Gos eim kingam ambilam noł mulngii.

37 Pe Moses wumb kulii ei, nga konj ok mulngii, pa yi nilim ku. Gos ok ek ka mer poł pendrim ek ei, Moses ond kembis endi dup nang kenim. Moses Gos Owundu ni, sinim kupenjpin noł ni, ek yi nim. ‘Eim Eiparam nge Gos; Eim Aisak nge Gos, eim Jeikop nge Gos mołum,’ pa nim.

38 Pe Gos ei wumb kulii ei nge Gos mon. Ba wumb ok pei konj mołmun wumb ei nge Gos. Eim

ningiŋ eŋe, wumb pei konj molmun.”

³⁹ Eim ek nipi ngang kin, nga lo ek pulmun wumb ek nik, orung kindik yi ninjing, “Ek mon wu, nim ek ka wii nin,” pa ninjing.

⁴⁰ Wumb ei mund mond kulk, nga ek endi kii sik erngii, pinerim.

*Gos Wu Endi Mei Mani Kindang Om Ei Nii?
(Masyu 22:41-46, Mak 12:35-37)*

⁴¹ Ba Jiisas ek nipi wumb ngopu kii sim, “Nimbiŋ erang, wumb molk, Krai Gos wu ei kindang na op wu ei, King Deipis nge miyem ende wu,” pa nimin.

⁴² “Mer mon Sam eŋe Deipis yi nirim,
‘Sin Owundu na Owundu kanpi yi nirim, Nim na angii tunding orung mulii!’ pa nirim.

⁴³ Nga ekii se, ‘Nim nge opu orung wumb sip kin, nim simb eŋe mani kindmbii,’ pa nim.

⁴⁴ King Deipis eim Krai Gos kindang wu ei, eim ‘Owundu’ nirim. Pe nimbiŋ erang, Deipis eim miyem ende wu ninmin?”

⁴⁵ Wumb pei molk, eim nim ek ei piinjing ni, Jiisas eim ek nipi, eim nge ek se andiŋmin wumb ngum.

⁴⁶ “Enim lo ek piik eŋmin wumb ei, ek ningii ei, enim piik kan kun erngii! En enim konduk eŋe olt endi kindik erangin kin, wumb keningii nik eŋmin. En enim yi piŋmin; oŋ ei erpin, wumb konu kulou tungii ni, wumb men ngii eŋe konu ka wii keningii ni piŋmin. Nga kuni owundu ei, sin sinim kumb eŋe pu mulamin kin, wumb keningii ni piik, enim embe tonu kindik, yi eŋmin.

⁴⁷ Pe wumb ei, en enim puk, amb wenjing kolmun amb ei, ngii konu ni, ku ni, epi ombu waning sik; ba wumb kumb ele prei kinan er puk elmin. Gos wumb mok tumba kunum ei, wumb ombu kos owundu singii,” pa nim.

21

Amb Kurpu Endi Gos Kin Epi Pei Ngum (Mak 12:41-44)

¹ Jiisas eim men ngii molpu kenim ni, wu ku salimin wu ambil ngolmun wu, en enim Gos nge men ngii ku konu ele Gos kin noman ka ku kindnjing.

² Pe eim kenim ni, amb endi wam kultum amb ei, epi endi sinalim amb, kurpu endi eim, ku kundii kembis tał, mer Gos kin noman ka piik kindnjing konu ele, kindim.

³ Pe Jiisas eim ek nim, “Na ek keimi nip enim ngond. Ya amb kurpu ei, wam kulum amb ei, eim ku kindnim amb ei, enim wumb pei eipi kindnjing ku ei, to mani kindnim.

⁴ Pe enim wumb eipi ei, enim ku pei salim ei, enim epi wii Gos kin ka pii ngonmun. Ba amb ei, eim epi endeim sinalim; ba ei ku tu wupu ngonum. Nga eim kuni simba ku ei, sinalim, mon!”

⁵⁻⁶ Wumb kombur men ngii owundu ele nik ek ninjing, “Ngii ele kom ku mon ka wii ngunjung. Nga wu amb Gos kin noman ka epi kindnjing.” Nga Jiisas ek yi nim, “Ol ei pe enim kaninmin ei, nga kis mulmba ei kunum endi simba kunum ei, ku endi tondrung pel ele pinermba. Pei er

kis erpi, konu orung orung pei eipi eipi mani kindmba,” pa yi nim.

*Oł Embin Tui Tonu Omba Jiisas Yi Nim
(Masyu 24:3-14, Mak 13:3-13)*

⁷ Pe wumb eim kii sik, yi ninjing, “Ek mon wu, kunum nenj epi ei tonu omba? Epi ei omba kunum oł endi erang kin, sin kenmin kunum ei, mandi omba, min mon?”

⁸ Jiisas eim ek yi nim, “Enim kan kun er mułngii! Wumb kombur ok, enim kin ek kend to ngungii. Ngok kin, wumb pei ok, na embe ei singii. Sik kin, yi ningii, ‘Wu ei na ond kunum mandi enim.’ Nik kin, yi erngii; ba enim ningii ek ei piik, pungii konu ekii se punerngii, mon!” pa nim.

⁹ “Wumb tilap kembis tuk ełe, en enim nginmał enmin ningii, ku. Nga wumb tilap pei konu orung orung pei opu owundu enmin nik erngii ei, enim piingii; ba enim mund mong tunerngii mon! Oł ombu ok tonu omba; ba kunum poru nimba kunum ei, sikir tonu onermba,” pa nim.

¹⁰ Jiisas eim wumb kanpi ek nipi ngum, “Pe wumb tilap endi pupu kin, wumb tilap endi kin ermba. Pe wu king endi nge tilap ei pupu kin, king endi nge tilap ełe opu erngii.

¹¹ Pe konu kopu owundu tonu omba; nga konu kombur kumb kuni owundu sepi kin, wumb ening owundu pimba ku. Nga kupu muł ełe keningii ni, muł ei owundu erpi, oł kanim kanim erang kin, enim mund mong erngii.

¹² Ba epi ombu tonu onerang kin, enim wumb ok, enim ambıl gii nik kin, oł embin tui kanim

kanim erngii. Erik kin, enim sik sipik, men ngii ɛle kos piik kin, nga enim sik, kan ngok, yi erngii ku. Yi erik kin, enim na embe ambil to mani kindmin ni erngii nik sipik, king ngii konu ɛle gapman muᅅngii konu ɛle, enim sipngii,” pa nim.

¹³ “Yi erngii kunum ɛle, enim na ek ka ni tor kindngii.

¹⁴ Kunum ɛle en enim noman ɛle, piik dinga erik kin, nga nipe ek endi ok ni orung kindmin ni, yi piinerngii mon!

¹⁵ Na nam ek enim ngamb ek ei, keimi ni piik, ni tor kindngii. Enim kin noman ka ngop ermbii, nim. Enim nge opu orung wumb ei, enim ek tok kindik, enim to mani kindmin ni erngii ei, kapli enermba. Na enim nip ngunj ek ei, kapli dinga pimba.

¹⁶ Arnim manim ni, angnim ni, miyem ende wumb ni, puᅅ wumb ok, enim nge opu orung wumb kin ngungii. Ngok kin, kombur en enim muᅅngii wumb ei, kombur to kundngii ku.

¹⁷ Pe wumb pei enim kin popuᅅ kis singii ei, nimbil erang enim na embe ambil tonu kindngii.

¹⁸ Gos epi ei piinerim kin, enim nge peng enjin ei, endi am punermba mon. Gos wumb pei noman tuk piinim ku.

¹⁹ Kunum kunum en enim dinga kind er mulnjung kin, kapli en enim noman konj mendpil singii.

²⁰ “Ba enim molk kinangin kin, opu wumb ok Jerusalem konu owundu ɛle orung orung onjung kin, enim pii poᅅ tungii ei, Jerusalem konu ɛle owundu ni, konu er kis mundngii kunum ei, mandi enim ni piik muᅅngii,” pa nim.

21 “Kunum ele, wumb Jura konu ele mołmun wumb, ei sikir puk kin, tonu komung ele pungii. Nga Jerusalem konu ele owundu tuk mołmun wumb ei, tungu puk, konu eipi eipi simba konu ele pungii. Nga wumb konu orung orung ele torung mołmun wumb ei, nga konu ele tuk punerngii.

22 Kunum ele, oł kis elmin wumb ei, Gos wumb ombu kin kumep ngumba ei, mer Gos mon ele palim ek ei, pei keimi pimba.

23 Kaimb kunum ele, amb kangil am ngopu mułmba min, kangil mułang mułmba amb ei, kaimb er mułngii! Oł embin tui ele, konu orung orung tonu wang kin, Gos eim popuł sim mił ei, eim wumb ombu kin kos erpi ngumba.

24 Wumb ei tui pei nopu poru nimba. Nga opu orung wumb ok, kan ngok, konu eipi orung orung pei kindngii. Wumb tilap eipi simb ei, Jerusalem konu ele kembngii. Yi er mułangin kin, wumb tilap eipi kunum ei, Gos to mundum kunum ei, poru nimba,” pa nim.

*Gos Kindmba Wu Ei, Wu Kingam Omba
(Masyu 24:29-31, Mak 13:24-27)*

25 “Nga tonu muł ele eni ni, kanjip ni, oi ombu, oł kanim kanim erngii. Mani mei ele konu orung orung, wumb en enim, oł embin tui peng mułangin kin, ep noł topu, gur gałi nipi ermba ei, wumb piik mund mong erngii.

26 Wumb pei en enim mei ele tonu omba ei, noman embin to piingii. Pe wumb kułmun ni piik kin, noman pepi kun enerang mułngii. Nimbil

erang tonu muł ełe oi ni, kanjip ni ombu, ołup, ermba.

²⁷ Oł ei tonu wang kin, molk keningii ni, Gos kindang opu mei wu kingam telim ei, eim kupu peł ełe omba. Opu kin, eim dinga owundu peng kin, nga eim tılang owundu ka wii ei, erang kin omba.

²⁸ Nga ekii se, oł ombu tonu wang kin, enim kunum ełe angk, en enim peng kan tonu kanik er mułngii. Nimbił erang, sinim kis mułamin kin, oł embin tui tonu orum ei, Gos sinim paki tumba nge kunum ei, mandi erang orum,” pa nim.

*Ond Pik Ei, Konu Eni Ba, Min Kumb Tumba Ei, Andan Tolum
(Masyu 24:32-35, Mak 13:28-31)*

²⁹ Nga Jiisas eim ek ekin endi nipi ngopu kin, yi nim. “En enim ond mong pik kanik kin, nga ond eipi pei kanik erei!” pa nim.

³⁰ “Pe enim kinangin kin, ond ei, onguł konj topu nim kin, konu eni owundu ba, enim nik, yi piingii. Akip kunum ei kuni mong poł tonum.

³¹ Yi mił, enim oł ombu kinangin yi mił erpi nim kin, en enim piingii. Gos sinim tep er mułmba kunum ei mandi omba, enim ni piingii!” pa yi nim.

³² “Na ek keimi nip enim ngond. Wumb kunum ełe wumb konj mułngii kunum, ei epi ombu tor omba.

³³ Muł kin mei poru nimba; ba na ek ei poru ninermba,” pa yi nim.

³⁴ “Ba enim kan kun er mułngii! Mon pim kin, enim noł kunum kunum nok wulu pang kin, en enim molk, ngenj epi ełe noman piingii; ei

mon! Pe enim noman ka peng mulenjing kin, Gos kindmba wu ei, wu kingam omba kunum ei, sikir tor omba. Eim omba ei yi mił; kung min, kei endi, karip tan sikir pupu kin, kei min, epi mondnum mił, yi sikir omba.

³⁵ Epi ei tonu omba kunum ei, wumb mołmun konu ełe orung orung pei tonu omba.

³⁶ Kunum kunum en enim kan kun er mułngii! En enim Gos kin kunum kunum prei er mułangin kin, Gos enim dinga ngumba. Ngang kin, oł embin tui enim kin tonu ombii ni ermba; ba enim pii gii nik, dinga pimba. Peng er molk kin, wu kingam Gos mei mani kindrim ei, kumb ełe engingii,” pa nirim.

³⁷ Kunum kunum Jiisas wumb pei sipipi, Gos ngii owundu ełe, wumb ek nipi ngopu, yi elim. Ba emii peng, eim pupu, komung Olip ełe mołulum. Mołpu or pepi kin, Jerusalem konu men ngii orung om.

³⁸ Nga wumb en enim ngii konu pek, kupiiring ok Gos ngii owundu ełe Jiisas nge ek ka piłmin.

22

Juras Ek Dinga Nipi, Jiisas Sipi Kin, Noman Pim Wumb Ngum

(Masyu 26:1-5, Mak 14:1-2, Jon 11:45-53)

¹ Pe kunum endi bres yiis punenim kunum ei, kuni owundu, ‘Pasopa,’ niłmin kunum ei, mandi erim.

² Pe kułmał kałiłmin owundu ni, lo ek piłmin wumb ni, en enim wumb pei mulnjung ei, mund mong tunjung. Mułangin kanik kin, en enim yi

ninjing, “Sinim Jiisas koi erpin kin, er to kundmun, mił nenj?” a ninjing.

³ Pe Seisen Juras noman ełe tuk pum. Nga Juras eim ‘Eskeriyas,’ niłmin. Jiisas eim nge ekii siłmin wumb ende wu engki nga tał, ei nge wu.

⁴ Pe Juras eim pupu, kułmał kałiłmin owundu kin, men ngii ełe tep mołumun wu ombu ni, kanpi nim. Eim Jiisas sipi, wumb ngumba ei nge er endim.

⁵ Yi ngang kin, wumb en enim ka piik, ku nin epi sik kin, wu ei ngumun, ninjing.

⁶ Pe Juras eim kaplı nipi, eim Jiisas sipi, wumb ngumba ei nge, kanpi endim. Eim kunum endi mołpu kenim ni, wumb pei Jiisas kin mulenjing.

Jiisas Kin Ekii Sinjngił Wu Tał, Kuni ‘Pasopa’ Er Ka Enjngił.

(Masyu 26:17-25, Mak 14:12-21, Jon 13:21-30)

⁷ Pe kunum ei, bres yiis punerim kunum ei, tonu wang kin, wumb kung siipsiip wał endeim ni, to kałiłmin ei, ‘Pasopa’ pa niłmin.

⁸ Pe Jiisas eim Piisa kin, Jon teł konu endi ełe kindpi yi nim, “Elił pukul kin, ‘Pasopa,’ kuni er kun erangıł, sinim kuni numun,” pa nipi kindim.

⁹ Wu tał eim kankił, yi ninjngił, “Nim piin! Sił konu jıli er kun ermbił?”

¹⁰ Pe Jiisas ek yi nim, “Elił konu owundu ełe tuk pangıł kin, wu endi noł ming endi sipi, tu wumba konu ełe, ekii se pukul kin, wu ei ngii jıli nirik ba, konu ełe, elił nirik pungul.

¹¹ Pe elił ngii ei, arim mułmba ei, kankił ningił, ‘Ek mon wu ek yi nim, Na nge ek se andiłmin wu

engki nga tał ei kin, kuni numbii palting ele, jiki salim?’

¹² Yi nengil kin, wu ei eim ngii tondrung ele palting owundu endi salim ei, ngang kin, elip sinim kuni ‘Pasopa’ er kun er singil,” pa nipi kindim.

¹³ Wu tał ni punjnguł. Pukuł kin, kenjngil ni, Jiisas nim mił yi kenjngil. Kankil kin, kuni ‘Pasopa’ nungii nge, er ka enjngil.

Jiisas Kin Ekii Sinjngil Wu Tał, Kuni ‘Pasopa’ Er Ka Enjngil.

(Masyu 26:26-30, Mak 14:22-26, 1 Korin 11:23-25)

¹⁴ Pe kuni nungii kunum seng kin, Jiisas ni, eim er se andilmin wu kin, tonu peł ele molk kin, kuni nok muljung.

¹⁵⁻¹⁶ Kuni nok molk kin, Jiisas yi nim, “Na ek keimi nind. Na enim kin kuni ‘Pasopa’ endi nop moł ei, na ka piind. Ekii se ngenj kumbii simbii. Nimbił erang ‘Pasopa’ kunum nga simba ei, na enim kin, kuni endi nunermbii, mon! Nga Gos sinim tep er mułmba kunum ei, peni ele wang kin, oł ei ek keimi pimba,” pa nim.

¹⁷ Eim ming kap noł wain endi sipi kin, Gos kin prei erim. Nga eim yi nim, “Enim noł wain ming kap ei, endeim endeim ni nui!” nim.

¹⁸ “Na ek keimi nind. Akip min ekii se, mering pei, na ond mong noł wain ei nunerngii mon! Nga Gos sinim tep er mułmba kunum ei tonu omba,” pa nim.

¹⁹ Nga bres sipi kin, Gos kin prei erpi, ngopu kin, Eim bres engin tum. Topu kin ek yi nim,

“Bres ei na ngenj mił mołum. (Na ngenj ei enim paki tond; enim nok kin, na kin piik er mułngii!

²⁰ Nok poru nengin kin, nga yi mił ku erpi, ming kap endi, ond mong noł wain mułum ni sipi, yi ku erang kin, nok poru nengin kin, yi nim; “Noł wain ei, enim kin oł konj endi erip ngond. Yi mił enim Gos nge wumb nanim kin, tep to mołpun, o ende punmun. Nga ming kap ond mong noł wain mułum ni, sipi kin, yi ku erim. Erpi kin, yi nim; ming kap ond mong noł wain ei, na enim kin kondrak konj endi end ei, na miyem mił peng kin, enim kin paki to ngond.)

²¹ Ba wu endi na sipi kin, wumb opu orung wumb angil ełe pendmba ei, akip sił kuni ende nopuł kin, peł ełe ende mołmbuł, wu ei minj.

²² Wu ei, mei mani opu wu kingam pim ei, Gos eim noman piim mił yi erim. Ba wu ei wu kingam sipi kin, wumb opu orung wumb ngumba wu ei, na kaimb sind,” pa nim.

²³ Jiisas eim ek yi neng mił, wu ombu en enim endeim endeim ni, ek nik, kii sik, piik piik enjing. Erik kin, “Sinim kin wu nii endi oł ei ermba?” enim yi kii sinjing.

²⁴ Pe eim nge ek se andiłmin wumb molk kin, ek mił enjing. Erik kin, yi ninjing, “Sinim mołmun konu ełe, wu nii owundu mołum?”

²⁵ Pe Jiisas ek nipi ngum, “Wumb king eipi ei konu eipi eipi mołmun ei, king en enim noman dinga peng kin, king owundu molk wumb tep erik, wumb yi mił ninjing. Nga en enim embe ełe oł ka erik, wumb ngok ełmin.

²⁶ Ba wu endi, wu num mułmbii nipi ermba wu ei, wu kongun wii mił mułmba. Nga wu

noman peng wu owundu mułmbii ni piimba wu ei, kongun wu mił, enim paki topu ngopu kin, kongun erpi mułmba.

²⁷ Wu nii endi wu owundu mołum? Pe wu kuni kałpi tu wułum wu ei, min tonu peł ełe mołpu kin, kuni nołum wu ei min? Nga en enim yi ku ni piik, kuni peł ełe mołpu kin, kuni nołum wu ei mendpił. Ba na enim mołmun konu ełe tuk mołup kin, kongun wu mił, enim paki top moł,” pa nim.

²⁸ “Epi kanim kanim oł embin tui na kin tonu onum kunum ei, enim na wak tunenjing; ba enim na kin mulnjung.

²⁹ Na nge Ernan sinim tep er kanpi mołum, Eim noman dinga ei na ngum. Akip na noman dinga ei, enim ngamb kin, enim mułngii,” pa nim.

³⁰ “Nam enim tep er mułmbii noman dinga ei, enim kuni peł seng kin, nok mułngii. Pe enim ok, King mił molk, Esrel wumb engki nga tał, wumb tilap ei kin, kos piłmin wu mił, mułngii.”

*Piisa Nim Nam Buł Ngunjii, Nipi Jiisas Yi Nim
(Masyu 26:31-35, Mak 14:27-31, Jon 13:36-38)*

³¹ “Saimon! Saimon! Nim piikin; pe Seisen eim enim kin kuni mong wiis ełmin oł ei mił, enim kin yi ku ermba. Ei eim enim kin mok topu wumb dinga molałmin wumb nin, nga dinga mołmun wumb, kaplı kongun erpi sipi, eim andłam ełe kindmbii ni ermba ei, dinga mił molałmin kin, wumb wii mił mołmun.

³² Ba na prei erip kin, nim Saimon paki tunj ełe nge nim pii gii ei, dinga pimba. Ekii se nim noman ak tokun orung on kin, ninim angnim noł paki tunjii,” pa nim.

³³ Piisa ek yi nim, “Owundu, na er kun er moł. Nim kin kan ngii ęle ouni bił; nga nim kulnjii ei, na er kun er moł, na nim kin ouni kułmbuł,” pa nim.

³⁴ Jiisas ek nipi yi nim, “Piisa, na nim kanip nind. Akip kunum ęle epi peng kin, kei kultu wii tunenerang kin, nim ek kunum tekliki ninjii, ‘Na wu Jiisas ninmin, ei na kinał!’ pa ninjii.”

³⁵ Pe Jiisas ek yi nim, “Ok na enim kindinj ei, enim ku ni, kon ni, simb su ei sipnerei! Kunum ei, enim epi endi simin ni piinjing min mon?” Pe en enim yi ninjing, “Sin oł endi yi ernerim mon.”

³⁶⁻³⁸ Enim Jiisas ek nipi ngopu yi nim, “Pe enim tuk mołmun wu endi ku kon pimba ei simba. Nga kon yi ku. Wu endi tui kepil sinerim kin, eim kon takis ei sipipi, ku sipi, tui kepil top ermba. Erpi kin, tui kepil simba,” pa nim. Pe wumb yi ninjing, “Owundu, nim ya kan! Sin tui kepil tał salim.” Eim yi ni piim, “Enim na ek ei pii poł tunenjing. Eim yi nim, ‘Ek ei kapil poru nim,’ pa nim. Na enim kanip nind, Gos ek ok pułum yi nirim, ‘Enim oł kis ęmin wumb mił, eim kułou tum,’ pa nim. Nimbil erang ek ei, na nind mił, keimi tonu omba. Gos mon ęle na ek nim ek ei, akip keimi tonu onum.”

*Gesemanii Konu ęle Jiisas Prei Erim
(Masyu 26:36-46, Mak 14:32-42)*

³⁹ Jiisas eim anda pupu, tonu komung Olip ęle, ba pum ei, eim kunum kunum prei erpi, yi ęlim. Oł ei erang mił, eim nge er se andilmin wumb ombu, ekil se punjung.

40 Pe eim konu ele opu kin, ek nipi er se andilmin wu ombu ngum, “Enim prei erangin kin, epi kis endi erangin kin, kenmbii nip tonu omba epi ei enim kin onermba,” pa nim.

41 Pe nga eim wu ombu mondpu kin, eim konu eipi mandi pum. Pe eim simb gopsing pii pol molpu kin, prei erim.

42 Jiisas eim wumb epi kis kanim kanim eim kin tonu wang kin, eim arim kin ke nipi, ek ekin yi topu nim. “Arnan! Nim na ming kap embin tui ei, na numbii ni piin kin, ninim noman ele sinjii. Ba nim na noman ele, nim ekii sinenjii mon. Ninim noman ele piikin enjii,” pa nim.

43 Jiisas eim Gos kin prei er mulang kin, pe tonu epin konu ele enjel endi mani opu kin, eim dinga ngum.

44 Jiisas eim noman embin kis piipi kin, eim prei dinga erpi mulang kin, eim kurun ei, miyem mił opu, mei ele mani pum.

45 Pe eim prei er pendpi angpi kin, eim ek se andilmin wumb mulnjung konu ele pum. Pupu kenim ni, or pinjing kenim ni, en enim noman embin tang kin, piik pinjing, kenim.

46 Pe Jiisas ek nipi yi nim, “Enim nimbił erang, enim or palmin? Enim konj kind, angk prei erei! Mon pim kin, ol kis endi enim kin tonu omba,” pa nim.

*Juras Jiisas Sipi, Opu Orung Wumb Ngum
(Masu 26:47-56, Mak 14:43-50, Jon 18:3-11)*

47 Jiisas eim ek nipi mulang kin, wumb tilap owundu endi onjung. Wu endi Juras nilmin wu ei, Jiisas nge ek se andilmin wu engki nga tal tuk

mołmun wu endi eim kumb se om. Eim mandi opu kin, Jiisas kin kumb gupu to numba nge om.

⁴⁸ Ba Jiisas ek nipi Juras ngum, “Juras, nim wu kingam ei, nim eim gupu to nokun sikin kin, opu orung wumb ngunjii min?”

⁴⁹ Jiisas eim nge ek se andiłmin wumb molk, kenjing ni, oł ei tonu omba enim nik, Jiisas kanik kin, yi ninjing, “Owundu, sin tui kepıi sipin kin, wumb ei tumun, min mon?”

⁵⁰ Yi nik kin, wu endi tui kepıi tang kin, kułmał kałiim owundu nge kongun wu ei, eim nge kom orung angıl tunding orung, kilip topu mani om.

⁵¹ Ba Jiisas kanpi yi nim, “Mon! Oł ei si kindei!” pa nim. Yi nipi kin, wu ni kom ełe embilang kin, kom ni, nga ok pim mił, pim.

⁵² Pe Jiisas ek nipi, kułmał kałiim owundu ombu ni, men ngii owundu ełe tep mołumun wu ombu ni, wumb num pei, wumb eim ambıl gii ningii nge ok wumb ei, Jiisas yi nim, “Enim tui nin, kepıi epi ei sik kin, tu wunmun ei, enim waning wu endi tungii nge onmun min?”

⁵³ Na enim kin kunum kunum men ngii owundu ei mołumun. Ba enim na peng ełe, enim angıl embilałmin, mon. Ba akip kunum ei, enim kunum seng enmin. Akip Seisen emii ełe mołpu kin, epi kis elim ei nge, dinga akip tor onum,” pa nim.

Piisa Ek Yi Nim, “Na Jiisas Ninmin Ei, Na Kinal.”

(Masyu 26:57,58,69-75, Mak 14:53,54,66-72, Jon 18:12-18,25-27)

⁵⁴ Jiisas eim ek nipi poru neng kin, wumb ombu eim ambıl gii ni sipnjing. Pe wumb ei, eim sipi

kin, kułmał kałilim owundu ngii konu ęle tuk sipnjing konu ęle, Piisa eim ekii se pum. Pupu kin, konu turii mił mołpu, kan mułum.

⁵⁵ Ngii owundu kung gui tukrung ęle engim konu ęle, dup kalk mulnjung konu ęle, Piisa tep to mulnjung ku.

⁵⁶ Kongun amb endi mołpu kenim ni, Piisa eim dup ęle mułum kenim. Amb ni, eim kanpi kin, yi nim, “Wu ei, Jiisas kin tep to mołulum wu,” pa nim.

⁵⁷ Ba Piisa ek nipi, “Mon!” pa nipi yi nim, “Amb, wu ei, na kinał!”

⁵⁸ Ekii se nga, wu endi Piisa kanpi kin, yi nim, “Nim eim nge tiłap ende,” pa nim. Ba Piisa yi nim, “Kawukeiya! Na mon!”

⁵⁹ Mołang kin, nga ekii se, wu eipi endi pupu yi nim, “Keimi mendpił, wu ei, eim kin tep to andilim wu. Eim Galiliı konu ęle wu,” pa nim.

⁶⁰ Ba Piisa ek dinga nipi ngopu, yi nim, “Wu, nim nin ek ei, na pii poł tunand.” Piisa eim ek yi nipi mułang kin, kei kultu wii tum.

⁶¹ Pe Owundu eim ak topu, Piisa kenim. Pe Piisa eim piim ni, Owundu ek endi eim kin nirim ek ei piim. Ek ęle nge, eim kei kultu wii tunermba kunum ei, nim yi ninjii, “Na Jiisas kinał, pa nikin, kunum tekliki enjii,” pa nirim.

⁶² Pe Piisa eim tor pupu, ke dinga wii nim.

⁶³ Wumb Jiisas ambił gii nik, ek ngok, kepıi tok enjing.

⁶⁴ Pe wumb Jiisas eim ningił ęle, alap pandi to pendik, kepıi tok, yi ninjing. “Pe nim ek ni tor kindilim wu mendpił min mon; ek ni! Wu nii nim kepıi tonum ei, ninjii,” pa ninjing.

65 Wumb ek kis kanim kanim nik, eim kin ngunjung.

*Kaunsil Wumb Ningit Ete Jiisas Kos Enjing
(Masyu 26:59-66, Mak 14:55-64, Jon 18:19-24)*

66 Ekii se konu eni tang kin, Esrel wumb num ei ni, lo ek piilmin wumb ni, ek kengip tolmun wumb ni, Gos kin kulmal kalilmin wumb ni, ok kulou tok molk kin, Jiisas sik sipik, kaunsil muum konu eke sipik, yi ninjing.

67 “Nim sin kan kin, ‘Na Gos er salim wu kindang, Krai,’ pa nilin, ei keimi min mon?” Pe Jiisas ek nipi ngopu, yi nim. “Na enim kanip nimbii; ba enim pii gii ninerngii.

68 Nga na enim kin ek kombur kii simbii nim kin, enim na ek ei ni orung kindnerngii, palim.

69 Ba pe ekii se, kunum kunum mei mani opu wu kingam ei, eim Gos angit tunding eke mulmba konu ei, Gos eim dinga wii salim,” pa nim.

70 Pe wumb yi ninjing, “Nim ek ei nin ei, nim Gos kingam molun min?” Pe eim ek yi nim, “Enim ninmin ek ei, na mendpil.”

71 Nga wumb en enim yi ninjing, “Sinim nipe ek nga nipin kii simin? Eim gupu eke, ek ei ninim, sin sinim piinmin, ei poru!”

23

*Pailos Kumb Ete, Jiisas Kos Enjing
(Masyu 27:1-2,11-14, Mak 15:1-5, Jon 18:28-38)*

1 Yi nik kin, wumb pei eim sipik, Pailos muum konu eke sipnjing.

2 Pe kos piingii nge nik, eim kin ek yi ninjing. “Sin wu ei kenjpin ni, eim sin wumb tilap eke,

ełmin oł ei, eipi erpi elim. Pe eim sin ku takis Siisa ngołmun ei, eim mon nipi, eim ‘Nam Gos kindang wu Kraisi nipi, nam King,’ pa nipi, yi elim,” pa ninjing.

³ Pe Pailos eim kii sim, “Nim Jura wumb King min?” Pe Jiisas eim ek nipi, orung kindpi, ek yi nim, “Ninim nin mił yi,” pa nim.

⁴ Pailos ek nipi, kułmał kałim owundu ni, wumb pei kanpi yi nim, “Na wu ei, erim oł endi kan sinand, mon!” pa yi nim.

⁵ Ba wumb ek dinga nik, yi ninjing, “Eim ek nipi wumb ngang kin, wumb eim ek piik, Jura konu ni, konu orung orung pei, mund mong ełmin. Pe Galilii konu ełe, eim er opu opu ya ełe onum,” pa ninjing.

Nga Jiisas Sipik, Eros Kin Kos Enjing

⁶ Pailos eim ek ei piipi kin, wumb kii sim, “Wu ei Galilii konu ełe wu min?”

⁷ Nga wumb eim kanik yi ninjing. Pe eim piim ni, Jiisas nge konu ei, Galilii konu orung ełe, Eros tep elim konu ei piinim. Kaplı Pailos ek ei piipi kin, nga kindang pupu, “Eros mołum konu ełe orung pangli,” nim. Kunum ei, Eros Jerusalem konu ełe mułum.

⁸ Eros Jiisas kanpi kin, eim ka piim. Nimbil erang Jiisas ek ei Eros piim; ba kunum kinan, eim Jiisas kenmbii ni piipi mułum. Eros eim yi piim, “Jiisas jep oł endi erang, kenmbii,” ni piim.

⁹ Yi piipi kin, Eros eim epi pei Jiisas kin kii sim; ba Jiisas eim ek endi nipi kin, orung kindnerim, mon!

¹⁰ Kułmał kałiłmin owundu ni, lo ek piilmin wumb ei ok, mandi angk kin, Jiisas kos erngii nge, ek dinga kind ninjing.

¹¹ Eros ni, eim nge opu ond wumb ni eim ek ngok, ek kis kanim kanim nik erik, konduk ka wii endi mon kanim kanim mułum kon ei kindik kin, nga eim Pailos mułum konu ełe orung kindnjing.

¹² Kumb ok, Eros eim Pailos kin opu ełmbik; ba pe eł elip, ek ka nikił, ende punjunguł.

*Pailos Yi Nim, “Ond Peri Ełe Nil Tei!” Nim
(Masyu 27:15-26, Mak 15:6-15, Jon 18:39-19:16)*

¹³ Pe Pailos eim kułmał kałiłmin owundu ni, wu num ni, wumb pei ok kułou tei nipi, wii tum.

¹⁴ Pe eim ek nipi, yi nim, “Enim wu ei ya sik tu wunjung ei, yi ninjing, ‘Wu ei sin tilap ełe, ek nipi wumb noman er kis ełim,’ nik, tu wunjung. Pe na wu ei, enim kumb ełe ek nip, wu ei kii sind; ba eim enim enmin ek ei, endi neng kin, na piinand. Wu ei, oł endi enerim. Sinim wu ei kin, kos ermin mił mon!

¹⁵ Nga Eros eim erim oł endi enerim, mon ku! Nga ei eim orung kindang onum. Piinmin! Wu ei, oł kis owundu endi erang kin, sinim kapli, eim to kundmun.

¹⁶ Pe na wu ei kepil top kindamb kin, orung pangli,” nim.

¹⁷⁻¹⁹ (Ba en enim ełmin oł ei, yi kor owundu kunum ei, kan ngii pałmin wu ei, endi tor kindilim.) Pe wumb pei wii tok kin, ek dinga nik yi ninjing, “Wu ei to kondkun, Barapas kindan kin, sin kin wangli!” ninjing. (Barapas eim konu owundu ełe gapman kin opu erpi, wu endi to

kundrum. To kundang kin, Barapas sik kin kan ngii pendik.)

²⁰ Pailos wumb nga kanpi, ek yi nirim, “Wu ei Jiisas, eim orung kindamb, ba,” ni piim.

²¹ Ba wumb wii tok, nga yi nik, “Ond peri ele, to kond!” Wumb pei yi ku ninjing.

²² Pe Pailos nga kunum ei ngang kin, kunum tekliki mił nim, “Nimbił erang, wu ei nipe oł endi erim? Na eim oł endi erim min, nip kurunj; ba oł endi erang kin, tumun ei kaplı; ba, mon!” nim. “Yi piip kin, wii kepii top kindamb, ba,” pa nim.

²³ Ba wumb dinga puk, ek dinga nik, wii dinga tok, “Ond peri ele kulanglı!” ninjing. Pe wii ek dinga nik, Pailos nim ek ei, to mani kindnjing.

²⁴ Wumb ek yi nengin kin, Pailos wumb kanpi, yi nim, “En enim dinga kindik, ‘Wu ei tumun,’ ninmin ei, wu ei, en enim sipik, tei! Na mon minj!”

²⁵ Wu ei, gapman kin opu erim ni, wu endi to kundmun nik, sik, kan ngii pendik, wu ei, wu amb pei si orung simin nik. Pe Pailos mani wu endi ei kindan, “Wanglı,” nik. Pe Pailos Jiisas kindang wang kin, wumb sipik.

Jiisas Ond Peri Ele Nil Tunjung

(Masyu 27:32-44, Mak 15:21-32, Jon 19:17-27)

²⁶ Pe opu ond wumb Jiisas sipik kin, wu endi ambił gii nik wu ei, embe Saimon. Saimon ni wu ei, eim Sairiini konu ele wu. Wu ei opu, konu owundu ele tuk bii ni erang kin, wumb ond peri ele tu wunjung. Tu wuk kin, wu ei pindang ele pindangin ko wupu kin, Jiisas pum konu ele ekii se pum.

²⁷ Pe wumb ke nik, kaimb kulk, puk kin, Jiisas pum konu eke ekii se punjung.

²⁸ Ba Jiisas ak topu amb kombur kanpi kin, ek yi nim, “Enim Jerusalem konu eke amb! Enim na kin piik ke ninerei! Ke ningii pim kin, en enim nge kangil ei piik ke nik kin, en enim nge piik ke ningii,” pa nim.

²⁹ “Piinmin! Ekii se ek endi tonu omba ei yi pimba. ‘Amb kangil mengnarik amb ni, kangil mengnenjing amb ni, amb am ngunenjing amb ni, amb ombu pei ka piingii.’ Nimbil erang kunum ei, wumb muljung kin ol embin tui enim kin tonu omba.

³⁰ Tonu om kunum eke wumb kombur komung eke ek yi ningii. Enim komung ombu mani ok kin, ‘Sin tei!’ ninin. Nga komung kembis kembis ombu yi ku, ‘Sin to pandi tei!’ ninin.

³¹ Yi mił erang enim ol ei ond konj eke enmin; ba nga ond kulii eke enim nimbil ol erngii?” Jiisas eim ek yi nim, “Ei ol konj ei tonu wang kin, enim kaninmin,” pa yi nim. “Nga ekii se ond kulii ei, mering ekii se ol ei enim na kin piik mulngii wumb ei, ol yi tonu omba ei, enim nimbil ol erngii?” pa yi nim.

³² Wumb eipi tał tu wunjung wu tał, ol kis elmbil wu tał, Jiisas tok, wu tał ouni tungii nge enjing, enjing.

³³ Pe wumb konu endi eke tor punjung konu ei, embe ‘Wumb peng embil’ konu ei yi nilmin. Nilmin konu eke, Jiisas ond peri eke tok, wu tał ol kis elmbil wu tał, nil tunjung ku. Wu endi Jiisas angil tunding orung peng kin, nga wu endi angil taring orung pim.

34 Jiisas ek nim, “Arnan, nim piin, wumb en enim oł kis en enim ei pii poł tunarik enmin. Kaplı nim wumb oł kis ei kil ngunjii,” pa nim. Pe Jiisas konduk ni alap epi ei wumb ku kembis mił epi ei kinjmał erik kin, konduk ei simin nik enjing.

35 Wumb molk, kanik mulnjung; ba wumb peng pim wumb ei, en enim ek ngok yi ninjing. “Eim wumb eipi paki topu yi elim. Pe keimi Gos eim Kraiss telim wu ei, kindang opu, wumb paki topu elim pim kin, kaplı akip ei eim paki topu, ond peri ele si kindpi, mani omba,” yi ninjing.

36 Opu ond wumb ei kin ek ngok, yi ninjing ku. Yi erik kin, mandi ok, epi kumbii elim epi ei, sipi ngumun ninjing.

37 Pe ek ngok kin, yi ninjing, “Nim keimi Jura wumb nge King pim kin, kaplı ninim paki to!” ninjing.

38 Ond peri ele, tonu eim peng ele, ek mon endi yi pulnjung, “Wu ei, Jura wumb ei nge King,” pa nik pulnjung.

39 Epi waning elmbił wu kis tał tuk wu endi, Jiisas kin ek yi nirim. “Nim Kraiss Gos kindang telin wu ei min? Kaplı ninim paki tokun kin, sił kin ouni paki tunjii ku!” pa nim.

40 Ba wu eipi endi orung pim wu ni ek ei piipi kin, wu ek nim wu ni, ek ngum, “Nim ngenj kumbii sin mił wu ei yi ku sinim. Ele nge nim Gos kin mund mong tunan min?”

41 Wumb siłip to kondunmun ei, siłip mong sinjpił ele to kondunmun. Ba ya wu ei, eim oł kis endi enerim konu ei tonmun,” pa nim.

⁴² Pe wu ni ek yi nim, “Jiisas ekii se, nim wu King dinga owundu mulun kin, na piinjii,” pa nim.

⁴³ Pe Jiisas ek nipi yi nim, “Na ek keimi nind, akip kunum ele mendpił, nim na kin Gos nge konu ka wii ele ouni mulmbuł,” pa nim.

Jiisas Kulum Poru Nim

(Masyu 27:45-56, Mak 15:33-41, Jon 19:28-30)

⁴⁴ Pe konu eni beli seng kin, Gos eni pandi topu erang kin, konu orung orung emii mił pepi pang kin, pou mił neng kin, emii pim ei poru nim.

⁴⁵ Pe mendpił alap ka wii endi, Gos ngii owundu ele, pim alap ei, tuk kilip topu, orung orung tał pim.

⁴⁶ Jiisas ond peri ele pepi, ek dinga nipi yi nim, “Arnan, na noman tuk ei, nim angil ele kindind,” nipi eim kulum.

⁴⁷ Pe opu elmin wumb ei, tep elim wu ni, kanpi kin, Gos nge embe ambil tonu kindim. Kindpi yi nim, “Keimi mendpił, wu ei, wu ol kis endi enalim.”

⁴⁸ Pe wu amb pei pei ok, enim mił kenmin nik onjung. Ok molk, kenjing ni, epi keimi peng kanik, en enim kaimb sik, pepił ele tok, nga orung punjung.

⁴⁹ Pe Jiisas nge wu puł ombu pei ni, Galilii konu ele amb kombur kin, ekii se ok, turii angk, epi kis ei Jiisas kin tonu wang kin, ei kanik mulnjung.

Jiisas Nge Ngenj Ei Sipik, Kom Ku Tukpu Endi Ele Pendnjing.

(Masyu 27:57-61, Mak 15:42-47, Jon 19:38-42)

⁵⁰ Pe wu endi multum wu ei, eim embe Josep. Wu ei konu owundu eġe multum konu ei, Jura wumb moġumun konu eġe, embe ei, ‘Arimasiya,’ pa niġmin. Wu ei, wu kaunsil moġum wu ei, oġ ka elim wu.

⁵¹ Wu ei eim kaunsil eipi ek niġmin, oġ kis eġmin eġe, ekii sipi enalim. Eim Gos konu sinim tep er moġum konu ei, ekii se peni eġe wang kenmbii nipi, minj kui er moġum.

⁵² Wu ei Pailos kin pupu, “Jiisas nge ngenj ei simbii,” pa nim.

⁵³ Pe Jiisas ngenj sipi, mani tu wupu, alap kuru endi sipi, pandi tum. Topu sipipi kin, tukpu endi eġe mani kindim tukpu ei, kom ku owundu endi tunduk sik, eġe ok wu endi tuk kindnaġmin, eġe kindim. Kindim tukpu andiġim eġe ku owundu ondu eġe ngunjung.

⁵⁴ Kor kunum ei, tonu omba mandi enim ei, kunum ka wii kunum ei er moġumun.

⁵⁵ Amb ombu Galilii konu eġe si kindik, Jiisas kin ok, nga Josep purum konu eġe ekii se puk. Puk kin, Jiisas tukpu to pendik miġ, kenmin ni punjung.

⁵⁶ Kanik poru nik kin, en enim ngii konu eġe orung puk. En enim kopung ka wii ni, epi muru ka toġum epi ei, er kun erik kin, Jiisas ngenj eġe kopung ei kindngii enjing.

Kor kunum “Kor muġei!” nik miġ kor mulnjung.

24

*Jiisas Nga Angpi Konj Tonu Pum
(Masyu 28:1-10, Mak 16:1-8, Jon 20:1-10)*

¹ Pe kongun kunum kumna, kor ei kupiiring ok, amb ombu en enim wumb tukpu eġe punjung.

Puk kin, kopung ka wii ni, epi muru ka tołum epi sik kin, epi ei er kun er sik, mił sinjing.

² Puk kin, kenik ni, ku endi pandi to pendik ni, tukpu ęle pineririm.

³ Wumb ok wumb ni, tukpu ęle tuk puk; ba Jiisas Owundu ngenj ei kinerik mon.

⁴ Pe wumb en enim noman ęle piik, mund mong erik mulk. Molk kenik ni, wu tał konduk kuru pirim wu tał, ęł ęlip mulkuł. Mulkuł wu tał nge konduk erang kin, wumb keningii pineririm.

⁵ Amb ombu en enim keningii pinerang kin, mani mei ęle kan mani kanik mulnjung. Mułangin kin, wu tał ek nikił ngunjunguł; “Nimbił erang enim wumb tukpu konu ęle wumb endi konj mołum nik kur onmun?”

⁶ Ba eim ya molałim! Eim angpi tonu pupu pum. Eim Galilii konu ęle mołpu kin, enim kin nipe ek nipi ngum ek ei, en enim piingii?

⁷ Eim ek yi nirim, ‘Wu kingam ei sipik, wumb oł ęłmin wumb ei ngangin kin, sipi to kundangin kin, tukpu konu ęle mani pu pepi kin, nga kunum tekliki pang kin, eim nga opu konj ba,’ ” nirim.

⁸ Wumb ek ei piik ni, Jiisas ok ek nirim mił piinjing.

⁹ Wumb tukpu konu ęle si kindik, orung punjung. Puk kin, ek nik, eim ek se andiłmin wu engki nga endeim mulk, konu ęle kanik nik ei, epi kenik mił nik, wumb eipi pei ngok yi enjing.

¹⁰ Pe Mariya Makandala ni, Jo Ana, ni Mariya Jeims mam ni, amb ombu mułangin kin, ek ei nik, Jiisas ek se andiłmin wumb mulk konu ęle kanik ninjing.

¹¹ Ba wumb ei, ek ei ek wii ninmin ni piik kin,

pii gii ninerik, mon.

¹² Ba Piisa angpi sikir pupu, Jiisas tukpu tuk konu eġe kenmbii nipi purum. Pe eim sip topu, tukpu eġe nirik pupu kenim ni, alap mendpiġ sim. Seng kin, eim nga orung ngii konu eġe pupu, epi ei kenim miġ piipi muġum.

Emeyas Wumb Andġam Eġe, Wu Taġ Jiisas Kenjngiġ

(Mak 16:12-13)

¹³ Pe kunum eġe mendpiġ, Jiisas pii gii ninjngiġ wu taġ eġ elip, konu endi Emeyas ni konu eġe punguġ nge punjnguġ. Pukuġ andġam ei Jerusalem konu eġe pupu, nga Emeyas konu eġe tor puġum konu ei, angġiġ orung nga taġ turii miġ salġim.

¹⁴ Wu taġ andkiġ pukuġ kin, epi pei kenjngiġ miġ ei, nikiġ punjnguġ.

¹⁵ Wu taġ eġ elip, ek nikiġ, kii sikiġ punjnguġ ei, Jiisas eim wu taġ onjnguġ konu eġe ekii se om ei kinenjngiġ.

¹⁶ Ba epi endi wu taġ ningġiġ eġe peli erang kin, Jiisas kan poġ tunenjngiġ mon!

¹⁷ Pe eim opu, ek nipi kii sipi yi nim, “Eġip epi nipe nikiġ onmbuġ?” Eim ek yi neng kin, wu taġ ni nikiġ ek piinerkiġ; kan mani kankiġ mulnjnguġ.

¹⁸ Pe wu endi embe Kliyopas wu ei, ek nipi orung kindim, “Wumb konu orung orung pei ok Jerusalem konu eġe minj moġmun. Pe nim mendpiġ Jerusalem konu epi ei tonu onum piinan min?”

¹⁹ Nga wu ei ek yi neng kin, Jiisas wu taġ kii sim, “Epi nipe?” Wu taġ eim kankiġ yi ninjngiġ, “Epi Jiisas Naseres konu eġe wu oġ ei tonu om. Eim ek

ni tor kindilim wu moꞑu kin, kongun ei nga erpi, Gos ningiꞑ eꞑe ek dinga nipi wumb ngoꞑum.

²⁰ Wumb peng pim wumb ni, kuꞑmaꞑ kaꞑiꞑmin owundu wumb ni, Jiisas sik sipik, kos piꞑim wu owundu ngunjung. Pe kos piꞑim wumb owundu ek nik piꞑik kin, wumb kombur eim ond peri eꞑe to kundnjung.

²¹ Ba kumb ok sin pii gii yi ninjpin kin, wu ei Esrel wumb kis mulnjung kin, oꞑ embin tui tonu orum kin, Gos enim paki tumba nge orum. Pe nga ek endi paꞑim ku. Epi ombu om ei, pe kunum tekliki kunum saꞑim.

²² Akip sin amb kombur ok ek nengin kin, sin mund mong enmin. Kupiiring ok en enim Jiisas tukpu to pendnjung konu eꞑe kenmin nik punjung.

²³ Ba Jiisas nge ngenj ei kinanmin nik, ok sin kanik yi ninjing. Eim kinenjpin, ba Gos nge enjel ok yi ninjing, ‘Eim konj moꞑum,’ ninjing.

²⁴ Nga sin wu kombur puk kin, keningii nge punjung ei, amb ok ninjing miꞑ ku ninjing. Ba eim kinanmin,” pa ninjing.

²⁵ Jiisas eim ek dinga nipi wu taꞑ ngum, “Eꞑip noman eꞑe dinga piꞑaꞑim min? Eꞑip ek ni tor kindilmin wumb ek pei niꞑmin ek ei eꞑip pii gii ninenjingiꞑ.

²⁶ Nimbiꞑ erang eꞑip piꞑinanmbiꞑ? Gos Kraiꞑ telim wu ei kindang, eim ngenj kumbii ok sipi kin, nga kunum ka seng kin, Gos nge dinga tiꞑang owundu ngang muꞑmba?”

²⁷ Pe eim Moses lo ek ni, ek ni tor kindilmin wumb nge ek ei nimba erim. Pe eim ek nipi wu taꞑ ngum ei, konu orung orung Gos mon eꞑe ek

nipi eim mendpił pa ninim ei, ek pułe nim yi mił nim.

²⁸ Pe wu tał eł elip konu ełe mani punjnguł. Pe Jiisas eim yi erpi ba nge pum.

²⁹ Ba wu tał eim kin ya mułmun konu ełe, emii pimba mandi enim, yi nengił. Nengił kin, Jiisas wu tał kin mułum.

³⁰ Ekii se kuni nungii pendik, Jiisas eim wu tał kin mułum. Mołpu kin, eim bres sipi, Gos kin prei erpi, wu tał ngum.

³¹ Jiisas eim wu tał kin yi erang kin, wu tał ningił pirek neng kin, Jiisas kan poł tangił kin, nga Jiisas eim mulerim. Eim am pum. Pang kin, wu tał eim nga kinenjngił mon.

³² Wu tał eł elip ek nikił piinjngił. “Siłip andłam ełe wambił kin, eim siłip kin ek ka nipi ngum. Ngopu kin, Gos nge ek pułe nipi ngopu erim. Kunum ełe siłip noman pirek neng,” yi ninjngił.

³³ Wu tał ek yi nikił kunum ełe mendpił orung pukuł, Jerusalem konu ełe pukuł. Pukuł ni, wu engki nga endeim mulk. Nga en enim nge puł wu kombur ouni mulnjung.

³⁴ Molk kin yi ninjing, “Keimi mendpił, Owundu ni nga orung om,” pa nik enjing. “Eim orung om ei, Saimon eim kenim.”

³⁵ Pe wu tał eł elip andłam ełe erim oł ei, ek poł tunjnguł. Tokuł kin, yi ninjngił. “Eim bres ambił engin topu Gos kin prei erang kin, sił eim kan poł tunjpuł,” pa ninjngił.

*Jiisas Kin Ekii Sinjing Wumb Jiisas Kenjing Ku
(Masyu 28:16-20, Mak 16:14-18, Jon 20:19-23,
Aposel 1:6-8)*

36 Pe en enim ek yi nik mułangin kin, Jiisas eim opu tuk, mii memb ełe engim, “Enim noman ende sek ka piik kin, mułngii!” Jiisas yi nim.

37 Ba wu en enim mund mong tok enjing. Wu ombu, “Sin sinim gui endi kaninmin,” ni piinjing.

38 Pe eim ek nipi wumb ngum, “Nimbił erang enim puku sik andinmin? Nimbił erang enim noman embin to piik mulnjung?”

39 Enim na simb ni angil ełe kinei! Na mendpił moł! Na gui mon! Gui ei ngenj na pałim mił pinaliłim mon!” pa nim.

40 Eim ek yi nipi kin, eim simb, angil pei andan topu ngum.

41 En enim ka wii piinjing; ba pii gii ninenjing. Pe en enim noman embin to piik mulnjung. Mułangin kin, eim yi nim, “Enim kuni kopur ya salim min?” yi kii sim.

42 Pe en enim omu endi ni ngunjung.

43 Pe Jiisas eim sipi, nang kin, kenjing.

44 Eim ek nipi ngopu yi nim, “Ok, na enim kin mołup, ek nip ngunj ei, piinjing. Moses nge ek nin, ek ni tor kindiłmin wumb ek poł nin, mon Sam ełe ek pałim ek ei, na nge ek pałim. Ekii se keimi tonu omba nir mił tonu keimi onum.”

45 Jiisas eim ek ei nipi kun erang kin, wumb Gos ek ei pii kun enjing.

46 Pe eim ek yi nim, “Krais Gos kindang tełim wu ei, eim ngenj kumbii sipi kołpu; nga kunum tekliki eim tukpu ełe angpi, nga konj tonu opu ba,” nirim.

47 “Pang kin, eim nge embe ełe, wumb ek nik ngok erangin kin, wumb tiłap ok, noman ak tok Gos ek piingii. Piyangin kin, Gos wumb

ombu ol kis kil ngumba,” pa nim. “Akip enim Jerusalem konu ele ni, konu orung orung pei ele puk, kongun ei erngii,” pa nim.

⁴⁸ Pe enim puk, ek ombu pei wumb kanik ningii.

⁴⁹ Enim piinmin! Gui Ka Gos ok enim ngumbii nirim mił, Owundu ei, akip na enim ngumbii. Ba enim puk kin, Jerusalem konu owundu ele mułangin kin, tonu epin konu ele Gos nge dinga ei enim kin kindmba,” Jiisas yi nim.

*Gos Jiisas Sipi, Tonu Epin Konu Ele Tonu Sipim
(Mak 16:19-20, Aposel 1:9-11)*

⁵⁰ Eim wumb ombu sipipi, Besanii konu ele sipipi, eim angil tonu kindpi, noman ka ek nipi ngum.

⁵¹ Pe eim ek ka nipi ngopu mułang kin, Gos eim sipi epin konu ele tonu sipim.

⁵² Wumb en enim Jiisas embe ambil tonu kindik, nga Jerusalem konu ele orung puk kin, en enim ka ka piinjing.

⁵³ Kunum kunum Gos ngii owundu ele molk kin, Gos embe ambil tonu kind mulnjung.

Gos Nge Ek Ka Ei Sinim Kin Ngołum
The New Testament in the Nii Language of Papua New
Guinea

Nupela Testamen long tok ples Nii long Niugini

copyright © 1980 Wycliffe Bible Translators, Inc.

Language: Nii

Dialect: Central Wahgi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 18 Apr 2025 from source files dated 31 Aug 2023

57529bce-9e23-5350-904d-243a1b359818